

**PREDNACRT**

**ZAKON O VODAMA  
BRČKO DISTRIKTA BOSNE I HERCEGOVINE**

**oktobar, 2015.**

## PREDNACRT

Na osnovu člana 22. stav (2) tačka c), Statuta Brčko distrikta Bosne i Hercegovine-  
prečišćen tekst ("Službeni glasnik Brčko distrikta Bosne i Hercegovine", broj: 2/10),  
Skupština Brčko distrikta Bosne i Hercegovine na svojoj \_\_\_\_\_ sjednici održanoj  
\_\_\_\_\_ usvaja

# ZAKON O VODAMA BRČKO DISTRIKTA BOSNE I HERCEGOVINE

## DIO PRVI - OPŠTI DIO

### Član 1. (Predmet Zakona)

Ovim zakonom propisuje se integralno upravljanje vodama, pravni status voda, upravljanje vodnim objektima i vodnim zemljištem, izvori i način finansiranja upravljanja vodama, nadzor i druga pitanja od značaja za upravljanje vodama u Brčko distriktu Bosne i Hercegovine (u daljem tekstu: "Distrikt").

### Član 2. (Definicije)

Izrazi korišteni u ovom zakonu imaju slijedeće značenje:

- a) *Akcident* je nenamjerni, iznenadni i neočekivani događaj koji uzrokuje štetu za ljude, imovinu ili okoliš;
- b) *Aktivnost* označava bilo koju aktivnost koja ima ili može imati uticaja na kvalitet ili kvantitet voda, na akvatične ili poluakvatične ekosisteme, na morfologiju vodotoka ili njegovo korištenje;
- c) *Bilans voda* označava odnos raspoloživih i potrebnih količina vode određenog kvaliteta, na određenom području i u određenom vremenskom periodu;
- d) *Bujični tok* (u daljem tekstu: bujica) jeste povremeni ili stalni tok u kome, uslijed intenzivnih atmosferskih padavina ili brzog topljenja snijega, dolazi do nagle izmjene vodnog režima u vidu visokih poplavnih talasa i mogućeg ugrožavanja života i zdravlja ljudi i njihove imovine, kao i ambijentnih vrijednosti;
- e) *Dobar ekološki potencijal* je stanje znatno izmijenjenog ili vještačkog vodnog tijela, tako klasifikovanog u skladu sa posebnim propisima;
- f) *Dobro ekološko stanje* označava stanje nekog tijela površinske vode, tako klasifikovanog u skladu sa posebnim propisima;
- g) *Ekosistem* označava složenu, međusobno uslovljenu cjelinu različitih tipova sredine (bare, močvare, ritove) kao staništa različitih životnih uslova i živog naselja oragnizama, koje su u cjelosti ili u većini zavisne o vodama;

- h) *I Ekvivalent stanovnika (I e.s.)* je organsko biorazgradivo opterećenje koje ima petodnevnju biohemijsku potrošnju kiseonika od 60 gr kiseonika na dan (BPK5);
- i) *Granična vrijednost emisije* je masa, izražena u obliku specifičnih parametara, koncentracije i/ili nivoa emisije, koji ne smiju biti prekoračeni u određenim vremenskim periodima;
- j) *Hemijsko stanje* označava stepen hemijskog zagađenja vode, klasifikovano u skladu s posebnim propisom;
- k) *Indirektno ispuštanje* označava ispuštanje prečišćenih otpadnih voda u podzemlje ili podzemne vode, kroz zemljište ili donji sloj zemljišta;
- l) *Inundacioni pojas* označava pojas zemljišta između korita za malu vodu i granične poplavne linije korita za stogodišnju veliku vodu na području na kojem nisu izgrađeni objekti za zaštitu od poplava (neuređeno inundaciono područje), odnosno prostor između korita za malu vodu i unutrašnje branjene nožice objekta izgrađenog za zaštitu od poplava (uređeno inundaciono područje);
- m) *Izvorište* je mjesto na zemljištu iz kojeg podzemna voda prirodno izvire na površinu, odnosno mjesto na zemljištu s kojeg se kroz bušotinu crpi voda iz vodnog tijela podzemnih voda;
- n) *Javno snabdijevanje vodom* označava poslove zahvatanja podzemnih ili površinskih voda za snabdijevanje vodom stanovništva, njihovo prečišćavanje do stepena zdravstvene ispravnosti i dovođenje do mjesta potrošnje i raspodjele korisnicima voda, ako je ukupna zahvaćena količina veća od 10m<sup>3</sup> na dan;
- o) *Jezero* je tijelo stajaće unutrašnje površinske vode;
- p) *Kolektor* jeste sakupljač otpadnih voda, kojim se sakupljena voda odvodi do postrojenja za prečišćavanje otpadnih voda;
- q) *Korito* označava terensko udubljenje kroz koje stalno ili privremeno teče voda;
- r) *Korito za male vode* je udubljenje kroz koje teku male i srednje vode vodotoka, odnosno koje je stalno pokriveno vodama prirodnih jezera i drugih površinskih voda;
- s) *Korito za velike vode* je prostor koji plavi, odnosno preko kojeg teče velika voda povratnog perioda jednom u 100 godina, odnosno prostor između objekata izgrađenih za zaštitu od poplava, kao i prostor pokriven vodama jezera, odnosno akumulacija pri visokim vodostajima vjerovatnoće pojave jednom u 100 godina;
- t) *Kvantitativno stanje* označava status koji pokazuje stepen do kojeg se na neko tijelo podzemne vode utiče direktnim i indirektnim zahvatanjem;
- u) *Materijal u vodotocima* označava šljunak, pijesak, mulj, bilje i druge slične prirodne ili vještačke materijale koji se uklanjaju iz vodotoka ili sa vodnog dobra u cilju njihovog održavanja ili regulisanja;
- v) *Mineralne vode* su podzemne vode koje prema svojim karakteristikama odgovaraju posebnim standardima za mineralne vode, a zahvataju se iz bunara ili vrela;
- w) *Obala* je pojas zemljišta neposredno uz korito tekućih i drugih površinskih voda;
- x) *Objekti za zaštitu od štetnog djelovanja voda* su vodni objekti za zaštitu od poplava, vodni objekti za zaštitu od erozija i bujica i vodni objekti za zaštitu od štetnog djelovanja unutrašnjih voda, odnosno odvodnjavanje;
- y) *Opasne materije* su materije ili grupa materija koje su toksične, nerazgradive i podložne bioakumulaciji, i druge materije ili grupe materija koje povećavaju nivo opasnosti;
- z) *Operator* je lice koje upravlja, rukovodi radom ili kontroliše pogon, postrojenje, objekat ili aktivnost, odnosno lice kojem su povjerena takva

- ovlaštenja u skladu sa propisima;
- aa) *Otpadna voda* je voda koja je promijenila svoje izvorne fizičke, hemijske ili biološke osobine rezultatom ljudskih aktivnosti;
  - bb) *Podsliv* je površina zemlje preko koje otiču svi površinski tokovi putem potoka, rijeka i eventualno jezera, do određene tačke u vodenom toku, gdje se uliva u rijeku ili jezero;
  - cc) *Podzemne vode* su sve vode ispod površine zemlje u zasićenoj zoni koje su u direktnom kontaktu sa površinom zemlje ili podslojem;
  - dd) *Poplava* je privremena pokrivenost vodom zemljišta koje obično nije prekriveno vodom. Izraz obuhvata poplave koje uzrokuju rijeke, bujice i privremeni vodotoci. Pojam ne obuhvata poplave iz sistema javne kanalizacije za odvođenje urbanih otpadnih voda.
  - ee) *Prekogranične vode* su vode koje čine ili presijecaju državnu granicu;
  - ff) *Prioritetne materije* su materije utvrđene posebnim propisima, koje predstavljaju značajan rizik za akvatične i poluakvatične ekosisteme;
  - gg) *Prioritetne opasne materije* su materije koje su utvrđene posebnim propisima, u skladu sa međunarodnom regulativom;
  - hh) *Promjena režima voda* jesu sve promjene u režimu voda, nastalih kao rezultat prirodnih sila ili ljudskih aktivnosti;
  - ii) *Recipijent* je prirodni ili vještački vodotok, jezero, akumulacija, zemljište u koje se ispuštaju otpadne i atmosferske vode;
  - jj) *Riječni sliv* je površina zemlje preko koje otiču svi površinski tokovi putem potoka, rijeka i eventualno jezera, u more, preko jednog riječnog ušća, rukavca ili delte;
  - kk) *Rijeka* je vodno tijelo koje najvećim dijelom teče po površini zemlje, ali koje jednim dijelom svog toka može da protiče podzemno;
  - ll) *Stajaće vode* su prirodna jezera, ribnjaci, bare, močvare i drugi sakupljači voda, koji imaju stalan ili povremen dotok ili oticanje tekućih ili podzemnih voda ;
  - mm) *Stanje podzemnih voda* je stanje vodnog tijela podzemne vode koje je određeno njegovim slabijim kvantitativnim ili hemijskim stanjem, u skladu sa posebnim propisima;
  - nn) *Stanje površinske vode* je stanje vodnog tijela površinske vode koje je određeno njegovim slabijim ekološkim ili hemijskim stanjem u skladu sa posebnim propisima;
  - oo) *Termalne vode* označavaju podzemne vode koje prema svojim karakteristikama odgovaraju posebnim standardima za termalne vode, utvrđeni posebnim propisom, a zahvataju se iz bunara ili vrela;
  - pp) *Termo-mineralne vode* su vode koje po svom sadržaju istovremeno ispunjavaju kriterijume termalnih i mineralnih voda utvrđene posebnim propisom;
  - qq) *Voda namijenjena ljudskoj upotrebi* označava :
    - 1) svaku vodu u njenom prirodnom stanju ili posle kondicioniranja (tretmana), namijenjene za piće, kuvanje, pripremu hrane i za druge domaće potrebe, bez obzira na njihovo porijeklo i na to da li se isporučuju putem distributivne mreže, iz cisterni, boca ili kontejnera,
    - 2) svaku vodu koja se koristi u proizvodnji hrane i proizvodnji, procesuiranju, zaštiti ili marketingu proizvoda ili materija namijenjenih ljudskoj upotrebi, za koju nadležni organi smatraju da je takvog kvaliteta da ne može uticati na zdravstvenu ispravnost proizvedenih prehrambenih artikala;
  - rr) *Voda za kupanje* je vodno tijelo površinske vode ili njegov dio namijenjen opštoj upotrebi, a ispunjava standarde kvaliteta utvrđene posebnim propisima;

- ss) *Voda za piće* je voda koja ispunjava standarde kvaliteta utvrđene posebnim propisima;
- tt) *Vode* su sve vode u Distriktu, koje su stajaće ili tekuće po površini zemlje i sve podzemne vode;
- uu) *Vodna djelatnost* je djelatnost od opšteg interesa i obuhvata: upravljanje vodama, obezbjeđenje i korišćenje voda, uz dugoročnu zaštitu kvaliteta voda i vodo-izvorišta, zaštita voda od zagađivanja, uređenje voda i vodotoka i zaštita od štetnog dejstva voda;
- vv) *Vodna infrastruktura* obuhvata objekte namjenjene uređenju vodotoka i zaštiti od štetnog djelovanja voda, objekte koji služe za monitoring voda, kao i prirodne i vještačke vodotoke uključene u vodni sistem;
- ww) *Vodni režim* označava skup hidroloških, hidromorfoloških, hidrauličkih, hemijskih i bioloških svojstava površinskih i podzemnih voda na određenom području i u određenom vremenu;
- xx) *Vodno područje* je površina zemljišta koju sačinjavaju jedan ili više susjednih riječnih slivova, zajedno sa svojim pridruženim podzemnim vodama, i koja je određeno kao glavna jedinica za upravljanje riječnim slivovima;
- yy) *Vodno pravo* je pravo na posebno korištenje vode i vodnog dobra ili materijala;
- zz) *Vodonosni sloj* je sloj ispod površine zemlje ili slojeva stijena dovoljne poroznosti i propustljivosti, koji omogućavaju ili značajan protok podzemne vode ili zahvatanje značajnih količina podzemne vode;
- aaa) *Vodotok* čini korito tekuće vode zajedno sa obalama i vodom koja njime stalno ili povremeno teče i može biti prirodni (rijeka, bujica, potok) i vještački (kanal, prosjek i izmješteno korito);
- bbb) *Zagađivanje* je direktno ili indirektno unošenje materija ili toplote u vodu, zemlju ili vazduh, uzrokovano ljudskom aktivnošću, koje može biti štetno po ljudsko zdravlje ili po kvalitet akvatičnih ili poluakvatičnih ekosistema, što uzrokuje oštećenje materijalnih dobara, remeti uživanje i druge oblike legitimnog korištenja životne sredine;
- ccc) *Zagađujuća materija* je svaka materija koja može da izazove zagađenje voda i koja je utvrđena posebnim propisima;
- ddd) *Zainteresovana strana* je lice na čije pravo, interes ili obaveze mogu da utiču određene aktivnosti drugih lica;
- eee) *Zemljište ugroženo od erozije* je zemljište na kome, uslijed djelovanja voda i vjetra, nastaju pojave ispiranja, brazdanja, podrivanja i klizanja, kao i zemljište podložno tim uticajima;

## **DIO DRUGI – GLAVNI DIO**

### **POGLAVLJE I. INTEGRALNO UPRAVLJANJE VODAMA**

#### **Član 3.**

##### **(Integralno upravljanje vodama)**

- (1) Integralno upravljanje vodama (u daljem tekstu: upravljanje vodama) obuhvata skup mjera i aktivnosti usmjerenih na održavanje i unapređenje vodnog režima u jedinstvenom vodnom sistemu na području Distrikta u cilju obezbjeđivanja

potrebnih količina voda propisanog kvaliteta za različite namjene, zaštitu voda od zagađivanja i zaštitu od štetnog djelovanja voda.

- (2) Upravljanje vodama ostvaruje se na način i pod uslovima utvrđenim ovim zakonom.
- (3) Upravljanje vodama je u nadležnosti Distrikta.

#### **Član 4.** **(Ciljevi upravljanja vodama)**

Ciljevi upravljanja vodama su:

- a) smanjenje zagađenja voda, postizanje dobrog stanja voda i sprečavanje degradacije voda;
- b) postizanje održivog korištenja voda;
- c) osiguranje pravičnog pristupa vodama;
- d) podsticanje društvenog i privrednog razvoja;
- e) zaštita i poboljšanje akvatičnih i poluakvatičnih ekosistema koji su zavisni od voda;
- f) smanjenje rizika od poplava i drugih negativnih uticaja voda;
- g) osiguranje učešća javnosti u donošenju odluka koje se odnose na vode;
- h) sprečavanje i rješavanje sukoba vezanih za zaštitu i korištenje voda;
- i) ispunjavanje obaveza iz međunarodnih ugovora koji su obavezujući za Bosnu i Hercegovinu.

#### **Član 5.** **(Načela upravljanja vodama)**

Upravljanje vodama zasniva se na opštim načelima nekomercijalnosti, održivog razvoja, cjelovitosti, jedinstva vodnog sistema, obezbjeđivanja zaštite od štetnog djelovanja voda, ekonomskog vrednovanja voda, učešća javnosti i uvažavanja najboljih dostupnih tehnika.

#### **Član 6.** **(Načelo nekomercijalnosti)**

Načelo nekomercijalnosti podrazumjeva da vode u osnovi nisu komercijalni proizvod, već naslijeđe koje se čuva, štiti i racionalno koristi.

#### **Član 7.** **(Načelo održivog razvoja)**

Načelo održivog razvoja ostvaruje se korištenjem voda zasnovanog na dugoročnoj zaštiti raspoloživih vodnih resursa, po količini i kvalitetu, tako da se potrebe sadašnjih generacija zadovoljavaju na način da se ne ugrožava mogućnost budućih generacija da zadovolje svoje potrebe.

#### **Član 8.** **(Načelo cjelovitosti)**

Načelo cjelovitosti ostvaruje se poštovanjem procesa u prirodi, čija je značajna komponenta voda, kao i povezanost i međuzavisnost akvatičnih i poluakvatičnih ekosistema.

**Član 9.**  
**(Načelo jedinstva vodnog sistema)**

Načelo jedinstva vodnog sistema obuhvata upravljanje vodama u okviru jedinstvenog vodnog područja koji se odvija u skladu sa razvojem Distrikta u cilju postizanja maksimalnih ekonomskih i socijalnih efekata na pravičan način i uz uvažavanje međunarodnih sporazuma.

**Član 10.**  
**(Načelo obezbjeđivanja zaštite od štetnog djelovanja voda)**

Načelo obezbjeđivanja zaštite od štetnog djelovanja voda ostvaruje se zaštitom stanovništva i njegove imovine od voda, uz uvažavanje zakonitosti prirodnih procesa i zaštite prirodnih vrijednosti, kao i ekonomske opravdanosti ove zaštite.

**Član 11.**  
**(Načelo ekonomskog vrednovanja voda)**

- (1) Načelo ekonomskog vrednovanja voda ostvaruje se pokrivanjem troškova obezbjeđivanja i pripreme vode za različite korisnike i troškova zaštite i uređenja voda, na osnovu principa “korisnik plaća” i “zagađivač plaća”.
- (2) Princip “korisnik plaća” podrazumijeva da svako ko koristi vodno dobro i vodni objekat, odnosno vodni sistem, kao dobro od opšteg interesa, dužan je da za to njegovo korištenje plati realnu cijenu.
- (3) Princip “zagađivač plaća” podrazumijeva da svako ko svojim aktivnostima prouzrokuje zagađenje vode dužan je da snosi troškove mjera za otklanjanje zagađenja.

**Član 12.**  
**(Načelo učešća javnosti)**

Načelo učešća javnosti podrazumijeva da javnost ima pravo na potpune, tačne i pravovremene informacije o stanju voda, o aktivnostima koje su preduzela lica koja koriste ili zagađuju vode, o radu nadležnih organa i institucija u oblasti voda, kao i na uključenje u procese pripreme i donošenja planova upravljanja vodama i kontrole njihovog izvršenja.

**Član 13.**  
**(Načelo uvažavanja najboljih dostupnih tehnika)**

Načelo uvažavanja najboljih dostupnih tehnika ostvaruje se u okviru upravljanja vodama, primjenjivanjem najboljih poznatih i dostupnih tehnika, koje predstavljaju najnaprednija dostignuća u određenim oblastima.

## **POGLAVLJE II. VODE, VODNO ZEMLJIŠTE, VODNO DOBRO I JAVNO VODNO DOBRO**

### **Odjeljak A. Vode i vodno zemljište**

#### **Član 14. (Vode)**

- (1) Vode, kao prirodno bogatstvo, su dobro od opšteg interesa.
- (2) Vode su pod posebnom zaštitom Distrikta.

#### **Član 15. (Vodna tijela)**

- (1) U cilju postizanja i očuvanja dobrog ekološkog, hemijskog i kvantitativnog stanja voda ili njihovog dobrog ekološkog potencijala, utvrđuju se:
  - a) vodna tijela površinskih voda i
  - b) vodna tijela podzemnih voda.
- (2) Vodno tijelo površinskih voda je poseban i značajan dio površinske vode, kao što je jezero, akumulacija, potok, rijeka ili kanal, dio potoka, rijeke ili kanala.
- (3) Vodno tijelo podzemnih voda je određena količina podzemne vode unutar jednog ili više vodonosnih slojeva.
- (4) Vodna tijela površinskih voda obuhvataju prirodna, vještačka i značajno izmjenjena vodna tijela.
- (5) Vještačko vodno tijelo je vodno tijelo površinskih voda nastalo ljudskom aktivnošću.
- (6) Značajno izmjenjeno vodno tijelo je vodno tijelo površinskih voda koje je zbog fizičkih promjena uzrokovanih ljudskom aktivnošću značajno promijenilo svoje karakteristike.
- (7) Vodna tijela površinskih i podzemnih voda ne mogu biti predmet prava vlasništva i drugih stvarnih prava, niti mogu biti u posjedu fizičkih i pravnih lica.
- (8) Vodna tijela površinskih voda razvrstavaju se u tipove na osnovu obaveznih i izbornih parametara.
- (9) Obavezni parametri iz stava (8) ovog člana su nadmorska visina, geografska širina i dužina, geologija i veličina sliva.
- (10) Izborni parametri iz stava (8) ovog člana su udaljenost od izvora, morfološki parametri, oblik doline i drugo.
- (11) Za tipove vodnih tijela iz stava (8) ovog člana određuju se referentni uslovi s obzirom na biološke elemente kvaliteta vode.



- (12) Šef Odjeljenja za poljoprivredu, šumarstvo i vodoprivredu Vlade Brčko distrikta Bosne i Hercegovine (u daljem tekstu: Šef Odjeljenja) podzakonskim aktom utvrđuje vodna tijela površinskih i podzemnih voda iz stava (1) ovog člana.
- (13) Šef Odjeljenja donosi podzakonski akt kojim se utvrđuju referentni uslovi iz stava (11) ovog člana.

### **Član 16.** **(Podjela površinskih voda)**

(1) Površinske vode su sve vode na teritoriji Distrikta, izuzev podzemnih voda.

(2) Površinske vode se dijele na :

a) tekuće vode :

- 1) prirodni vodotoci, kao što su bujice, potoci i rijeke, bez obzira da li imaju stalan ili povremen tok;
- 2) vještački vodotoci, kao što su kanali, uključujući vodotoke koji su nastali izmještanjem prirodnog vodotoka ili djelimičnim zahvatanjem voda iz prirodnog vodotoka ili iz stajace vode.

b) stajace vode:

- 1) prirodna jezera, uključujući i ona koja povremeno presušuju;
- 2) ribnjaci;
- 3) bare;
- 4) močvare;
- 5) druge prirodne vodne akumulacije koje imaju stalan ili povremen dotok ili oticaj površinskih ili podzemnih voda;
- 6) vodne akumulacije, koje su nastale pregrađivanjem tekućih voda ili drugim zahvatima u prostoru.

### **Član 17.** **(Vodno zemljište)**

(1) Vodno zemljište je skup zemljišnih čestica i obuhvata:

- a) zemljište na kojem je površinska voda trajno ili povremeno prisutna, zbog čega se oblikuju posebni hidrološki, geomorfološki i biološki odnosi koji određuju akvatične i poluakvatične ekosisteme, uključujući priobalna zemljišta;
- b) osnovno korito tekućih voda, uključujući ade i obale, do izrazite geomorfološke promjene;
- c) zemljište potopljeno stajacim vodama, uključujući obalu do najvišeg zabilježenog vodostaja;

- d) napušteno korito koje voda povremeno plavi, močvare i zemljište koje voda plavi zbog zahvata u prostoru, kao što su pregrađivanja tekućih voda, eksploatacije mineralnih sirovina i slično;
  - e) uređeni ili neuređeni inundacioni pojas;
  - f) zemljište ispod i pored vodnih objekata iz člana 27. ovog zakona.
- 2) Vodno zemljište može biti u vlasništvu Distrikta, fizičkog ili pravnog lica u skladu sa ovim i drugim zakonom.

### **Član 18.** **(Priobalno zemljište)**

- (1) Priobalno zemljište vodnog zemljišta iz člana 17. tačka a) je pojas zemljišta neposredno uz korito za veliku vodu vodotoka koji služi održavanju zaštitnih objekata i korita za veliku vodu i obavljanju drugih aktivnosti koje se odnose na upavljanje vodama.
- (2) Širina pojasa priobalnog zemljišta iz stava (1) ovog člana je:
- a) u neuređenom inundacionom pojasu do 10 m;
  - b) u uređenom inundacionom pojasu do 50 m, zavisno od veličine vodotoka, odnosno zaštitnog objekta, računajući od nožice nasipa prema branjenom području.
- (3) Izuzetno od stava (2) ovog člana, šef Odjeljenja može odrediti i drugačiju širinu priobalnog zemljišta, ukoliko je to potrebno zbog:
- a) zaštite voda, akvatičnih i poluakvatičnih ekosistema;
  - b) uređenja voda;
  - c) zaštite dobara, odnosno objekata posebnih vrijednosti;
  - d) omogućavanja opšteg korištenja vodnog dobra;
  - e) obavljanja drugih poslova od opšteg interesa, u skladu sa ovim zakonom.

## **Odjeljak B. Vodno dobro**

### **Član 19.** **(Vodno dobro)**

- (1) Vodno dobro obuhvata:
- a) vodna tijela i
  - b) vodno zemljište.
- (2) Vodno dobro je dobro od opšteg interesa i koristi se na način i pod uslovima utvrđenim ovim zakonom.
- (3) Granice vodnog dobra utvrđuje šef Odjeljenja.
- (4) Oznake i granice vodnog dobra na prijedlog šefa Odjeljenja upisuju se u zemljište knjige.

- (5) Vlada, na prijedlog šefa Odjeljenja, utvrđuje podzakonskim aktom način određivanja granice vodnog dobra i postupak utvrđivanja pripadnosti zemljišne čestice javnom vodnom dobru.

**Član 20.**  
**(Zahvati na vodnom dobru)**

- (1) Na vodnom dobru nije dozvoljeno izvoditi zahvate, osim za:
- a) gradnju objekata javne infrastrukture;
  - b) gradnju vodnih objekata;
  - c) mjere koje se odnose na poboljšanje hidromorfoloških i bioloških karakteristika površinskih voda;
  - d) mjere, koje se odnose na zaštitu prirode;
  - e) gradnju objekata potrebnih za korištenje voda, obezbjeđenje sigurnosti plovidbe i obezbjeđenje zaštite od utapanja na prirodnim kupalištima;
  - f) izgradnju objekata namijenjenih zaštiti voda od zagađenja;
  - g) izgradnju objekata namijenjenih odbrani, zaštiti i spašavanju ljudi, životinja ili imovine od prirodnih i drugih nesreća, kao i provođenju zadataka Policije Brčko distrikta Bosne i Hercegovine (u daljem tekstu: Policija);
  - h) izgradnju rekreacionih, sportskih i turističkih objekata;
  - i) druge namjene utvrđene u skladu sa zakonom.
- (2) Dozvoljeni zahvati iz stava (1) ovog člana, mogu se preduzimati pod uslovima propisanim ovim zakonom i Zakonom o prostornom planiranju i građenju.

**Odjeljak C. Javno vodno dobro**

**Član 21.**  
**(Javno vodno dobro)**

- (1) Javno vodno dobro je vodno dobro u vlasništvu Distrikta.
- (2) Javno vodno dobro je neotuđivo, ali može pod posebnim uslovima biti predmet ograničenog prava korištenja.
- (3) Vlada, na prijedlog šefa Odjeljenja podzakonskim aktom utvrđuje način i uslove ograničenog prava korištenja javnog vodnog dobra.

**Član 22.**  
**(Pripadnost vodnog dobra javnom vodnom dobru)**

- (1) Šef Odjeljenja rješenjem utvrđuje pripadnost vodnog dobra javnom vodnom dobru u skladu sa ovim zakonom i drugim propisima o vlasništvu i drugim stvarnim pravima.
- (2) Javno vodno dobro se upisuje u zemljišne knjige na prijedlog šefa Odjeljenja.

### **Član 23.**

#### **(Prestanak pripadnosti vodnog dobra javnom vodnom dobru)**

- (1) Vodno dobro prestaje biti dijelom javnog vodnog dobra pod sljedećim uslovima:
  - a) ukoliko se rješenjem šefa Odjeljenja iz člana 22. stav (1) ovog zakona utvrdi da vodno dobro prestaje pripadati javnom vodnom dobru;
  - b) odlukom Skupštine Brčko distrikta Bosne i Hercegovine (u daljem tekstu: Skupština) kojom je, na drugi način, za posebne opšte potrebe i namjene, definisana upotreba određenog javnog vodnog dobra.
- (2) Status javnog vodnog dobra prestaje datumom upisa u zemljišne knjige.

### **Član 24.**

#### **(Pravo preče kupovine vodnog zemljišta)**

- (1) Pravo preče kupovine vodnog zemljišta ima Distrikt.
- (2) Vlasnik koji namjerava da proda vodno zemljište dužan je da prethodno podnese pisanu ponudu Distriktu.
- (3) Ponuda iz stava (2) ovog člana podnosi se Kancelariji za upravljanje javnom imovinom Brčko distrikta Bosne i Hercegovine (u daljem tekstu: Kancelarija) i sadrži podatke o vodnom zemljištu, uključujući podatak o katastarskoj opštini, o broju katastarske parcele, o površini, o kulturi i slično, cijenu i ostale uslove prodaje.
- (4) Ako se Kancelarija ne izjasni u roku od 30 dana o ponudi, vlasnik može vodno zemljište prodati drugome, ali ne pod povoljnijim uslovima za kupca.

### **Član 25.**

#### **(Upravljanje javnim vodnim dobrom)**

Upravljanje javnim vodnim dobrom vrši Odjeljenje za poljoprivredu, šumarstvo i vodoprivredu Vlade Brčko distrikta BiH (u daljem tekstu: Odjeljenje) ili pravno lice kome su povjerena javna ovlaštenja, u obimu i na način kako im je to povjereno ovim zakonom ili drugim propisima.

## **POGLAVLJE III. VODNI OBJEKTI**

### **Član 26.**

#### **(Vodni objekti)**

- (1) Vodni objekti su građevinski i drugi objekti ili skup objekata koji zajedno sa uređajima koji im pripadaju čine tehničku, odnosno tehnološku cjelinu, a služe za uređenje vodotoka i drugih voda, za zaštitu od štetnog djelovanja voda, za zahvatanje voda radi njihovog namjenskog korištenja, za praćenje stanja voda i za zaštitu voda od zagađivanja i održavanja akvatičnih ekosistema.
- (2) Vodni objekti su dobra od opšteg interesa, osim objekata koje su fizička ili pravna lica izgradili za svoje potrebe u skladu sa ovim zakonom.

**Član 27.**  
**(Podjela vodnih objekata s obzirom na namjenu)**

Vodni objekti se dijele na osnovu njihovih namjena na vodne objekte za:

- a) uređenje vodotoka;
- b) zaštitu od poplava;
- c) zaštitu od erozija i bujica;
- d) zaštitu od štetnog djelovanja unutrašnjih voda, odnosno odvodnjavanje;
- e) korištenje voda;
- f) zaštitu voda od zagađivanja;
- g) praćenje stanja voda.

**Član 28.**  
**(Višenamjenski objekti)**

Višenamjenski vodni objekti su vodni objekti koji mogu služiti istovremeno za više namjena.

**Član 29.**  
**(Vodni objekti za uređenje vodotoka)**

Vodni objekti za uređenje vodotoka su:

- a) obaloutvrde, pragovi, naperi i drugi objekti u riječnom koritu, namijenjeni njegovoj stabilizaciji i poboljšanju režima tečenja (u daljem tekstu: regulacioni objekti),
- b) vještačka rječna korita kao što su kanali, prosjeci, izmještena riječna korita.

**Član 30.**  
**(Vodni objekti za zaštitu od poplava)**

- (1) Vodni objekti za zaštitu od poplava (u daljem tekstu: zaštitni vodni objekti) su: glavni, sekundarni i ljetnji nasipi sa pripadajućim objektima (ustave, crpne stanice), kejski i odbrambeni zidovi, rasteretni i lateralni kanali, kao i brane sa akumulacijama i retenzijama sa pripadajućim objektima za odbranu od poplava i drugi objekti za zaštitu od poplava.
- (2) Sastavnim dijelom nasipa za odbranu od poplava iz stava (1) ovog člana smatra se i zaštitni pojas sa šumom i zaštitnim zelenilom u inundacionom području, u širini od 50 m pored nasipa, odvodni kanali paralelni nasipu u branjenom području, na udaljenost od 10 m do 50 m od nožice nasipa zavisno od karakteristika vodotoka i objekta, kao i servisni putevi u branjenom području za sprovođenje odbrane od poplava.

**Član 31.**  
**(Vodni objekti za zaštitu od erozija i bujica)**

Vodni objekti za zaštitu od erozije i bujica su pregrade, ustave, regulacija donjih tokova bujica, obaloutvrde, biotehnički objekti i drugi objekti za zaštitu od erozije i bujica.

**Član 32.**  
**(Vodni objekti za zaštitu od štetnog djelovanja unutrašnjih voda, odnosno odvodnjavanje)**

Vodni objekti za zaštitu od štetnog djelovanja unutrašnjih voda, odnosno odvodnjavanje su objekti:

- a) osnovne kanalske mreže za odvodnjavanje i to: glavni i sabirni odvodni kanali u koje se slivaju vode iz melioracionog sistema ili njegovog dijela, sa objektima i uređajima na njima (mostovi i propusti na kanalima, sifoni, stepenice, brzotoci, ustave, crpne stanice i slično) i glavne crpne stanice i ustave za odvođenje voda iz sistema u recipijent (prirodni, odnosno vještački vodotok);
- b) detaljne kanalske mreže za odvodnjavanje i to: detaljni kanali za neposredno prikupljanje vode sa poljoprivrednih i drugih površina i njihovo odvođenje u sabirne kanale, kao i objekti na detaljnim odvodnim kanalima, kao što su propusti, sifoni, stepenice, brzotoci, ustave, crpne stanice i slično.

**Član 33.**  
**(Vodni objekti za korištenje voda)**

Vodni objekti za korištenje voda su objekti:

- a) za snabdijevanje vodom za piće i sanitarno-higijenske potrebe, uključujući vodozahvate kao što su bunari, kaptaže, zahvati iz vodotoka, kanala, jezera i brane sa akumulacijama, odnosno postrojenja za pripremu vode za piće, magistralni cjevovodi i rezervoari sa uređajima koji im pripadaju;
- b) za navodnjavanje, kao što su zahvati iz vodotoka, kanala, jezera i brane sa akumulacijama, glavni kanali i sekundarna mreža i uređaji koji im pripadaju;
- c) za korištenje vodnih snaga, kao što su brane sa akumulacijama, dovodni i odvodni kanali, odnosno tuneli i uređaji koji im pripadaju;
- d) za uzgoj riba;
- e) za plovidbu, kao što su plovni putevi, prevodnice, ustave i drugi pripadajući objekti i oprema;
- f) rekreacioni bazeni.

**Član 34.**  
**(Vodni objekti za zaštitu voda od zagađivanja)**

Vodni objekti za zaštitu voda od zagađivanja obuhvataju glavne kolektore, postrojenja za prečišćavanje otpadnih voda, postrojenja za preradu otpadnih muljeva, postrojenja za preradu procjednih voda sanitarnih deponija čvrstog otpada, ispusti iz postrojenja u recipijent i drugi pripadajući uređaji, kao i brane sa akumulacijama za poboljšavanje kvaliteta voda.

**Član 35.**  
**(Vodni objekti za praćenje stanja voda)**

Vodni objekti za praćenje stanja voda obuhvataju limnigrafe, vodomjerne letve, vodomjere, specijalne prelive, pijezometarske bušotine, nivomjere i druge uređaje kojima se prikupljaju podaci o stanju nivoa, količini i kvalitetu površinskih i podzemnih voda.

**Član 36.**  
**(Vlasništvo nad vodnim objektima)**

- (1) Vodni objekti iz člana 29. do 35. ovog zakona su u vlasništvu Distrikta.
- (2) Vodni objekti iz člana 31., 32., 33. izuzev tačke e) ovog člana, 34. i 35. ovog zakona koje su za svoje potrebe izgradila fizička ili pravna lica su u njihovom vlasništvu.
- (3) Vodni objekti i vlasnička prava na njima upisuju se u zemljišne knjige.

**Član 37.**  
**(Sanacija vodnog objekta)**

- (1) Ako su na vodnom objektu u javnoj svojini, nastala oštećenja pričinjena radnjama fizičkog, odnosno pravnog lica, troškovi sanacije vodnog objekta padaju na teret tog lica.
- (2) Ukoliko lice iz stava (1) ovog člana, ne izvrši sanaciju objekta, u roku koji odredi nadležni inspektor, organ koji upravlja vodnim objektom, odnosno lice kome su povjerena javna ovlaštenja za upravljanje vodnim objektom dužno je izvršiti sanaciju objekta na teret tog lica.

**Član 38.**  
**(Izgradnja i upravljanje vodnim objektima)**

- (1) Izgradnja i održavanje vodnih objekata vrši se u skladu sa ovim zakonom i posebnim zakonima.
- (2) Vodnim objektom iz članova 29., 30., 31., 32., 33. tačke b), c) i d) i 35. ovog zakona u vlasništvu Distrikta upravlja Odjeljenje i brine se o njihovom namjenskom korištenju, održavanju i čuvanju.
- (3) Vodnim objektom iz članova 33. tačka a) i 34. ovog zakona u vlasništvu Distrikta upravlja Odjeljenje za komunalne poslove Vlade Brčko distrikta Bosne i Hercegovine (u daljem tekstu: Odjeljenje za komunalne poslove) i brine se o njihovom namjenskom korištenju, održavanju i čuvanju.
- (4) Vodnim objektom iz člana 33. tačka e) ovog zakona u vlasništvu Distrikta upravlja Odjeljenje za javne poslove Vlade Brčko distrikta Bosne i Hercegovine (u daljem tekstu: Odjeljenje za javne poslove) i brine se o njihovom namjenskom korištenju, održavanju i čuvanju.
- (5) Vodnim objektom iz člana 33. tačka f) ovog zakona u vlasništvu Distrikta upravlja Kancelarija i brine se o njihovom namjenskom korištenju, održavanju i čuvanju.

- (6) Fizičko ili pravno lice koje je za svoje potrebe izgradilo vodni objekat je dužno upravljati, koristiti, održavati i čuvati vodni objekat na način kojim neće prouzrokovati štetu režimu voda i trećim licima, u skladu sa ovim zakonom i drugim propisima.
- (7) Vlada, na prijedlog šefa Odjeljenja, utvrđuje podzakonskim aktom način održavanja, korišćenja, osmatranja vodnog objekta i postupanje u slučaju kvara ili havarije na objektu ili u slučaju prestanka upotrebe vodnog objekta.

#### **Član 39.**

##### **(Prenos prava upravljanja na vodnim objektima)**

- (1) Distrikt može prenijeti pravo upravljanja na vodnim objektima koji su u javnoj svojini na javna preduzeća ili pravna lica registrovana za upravljanje melioracionim sistemima ili sistemima za zaštitu od bujica, ili za obavljanje komunalne djelatnosti vodosnabdijevanja, ili za obavljanje komunalne djelatnosti za odvod i pročišćavanje otpadnih voda, ili druga pravna lica u obimu i na način propisan ovim zakonom ili drugim aktom nadležnog organa.
- (2) Pravna lica iz stava (1) ovog člana, kojim je prenijeto pravo upravljanja na vodnim objektima, dužna su vodne objekte održavati u funkcionalnom stanju i koristiti u skladu s njihovom prirodom i namjenom, ovim zakonom i drugim podzakonskim aktima donesenim na osnovu ovog zakona.

### **POGLAVLJE IV. VODNA PODRUČJA I KATEGORIZACIJA VODA**

#### **Član 40.**

##### **(Vodno područje)**

- (1) Osnovna teritorijalna jedinica za upravljanje vodama je vodno područje.
- (2) U svrhu upravljanja vodama na teritoriji Distrikta utvrđuje se vodno područje rijeke Save.
- (3) Vodno područje rijeke Save obuhvata dio međunarodnog riječnog bazena Dunava, odnosno dio međunarodnog podbazena Save, na teritoriji Bosne i Hercegovine, odnosno Distrikta, sa podslivovima rijeke Tinje i Brke.
- (4) Granice vodnog područja utvrđuje Vlada na prijedlog šefa Odjeljenja.

#### **Član 41.**

##### **(Podjela vodnog područja)**

- (1) Vodno područje se može podijeliti na:
  - a) područja podslivova,
  - b) područja malih slivova i
  - c) sektore.
- (2) Šef Odjeljenja podzakonskim aktom utvrđuje granice podslivova, područja malih slivova i sektora iz stava (1) ovoga člana.



**Član 42.**  
**(Melioraciono područje)**

- (1) Melioraciono područje je dio vodnog područja na kome se melioracionim sistemima za odvodnjavanje i navodnjavanje uređuje vodni režim zemljišta i poboljšavaju uslovi za njegovo korištenje.
- (2) Melioraciono područje obuhvata:
  - a) poljoprivredno, šumsko i građevinsko zemljište, zemljište pod putevima i drugo zemljište sa kojeg se, sistemima za odvodnjavanje, omogućava brže i pogodnije oticanje suvišne vode;
  - b) poljoprivredno, šumsko i građevinsko zemljište, zemljište pod putevima i drugo zemljište sa kojeg dotiče voda na zemljište koje se, sistemima za odvodnjavanje, štiti od suvišne vode;
  - c) poljoprivredno, šumsko i drugo zemljište za koje se, sistemima za navodnjavanje, dovodi voda za navodnjavanje.
- (3) Šef Odjeljenja podzakonskim aktom utvrđuje melioraciono područje i njegove granice.

**Član 43.**  
**(Kategorizacija površinskih voda)**

- (1) Površinskim i podzemnim vodama upravlja se jedinstveno.
- (2) Površinske vode dijele se na vode I. kategorije i vode II. kategorije na osnovu slijedećih kriterijuma:
  - a) položaj vodotoka u odnosu na državnu granicu;
  - b) veličine i karakteristike sliva;
  - c) režima i karakteristika vodotoka sa aspekta korištenja voda;
  - d) zaštite od štetnog djelovanja voda.
- (3) Međunarodne vode obavezno se svrstavaju u vode I. kategorije.
- (4) U Distriktu, rijeke Sava, Tinja i Brka su vode I. kategorije.
- (5) Sve površinske vode koje nisu utvrđene kao vode I. kategorije svrtavaju se u vode II. kategorije.

**POGLAVLJE V. PLANSKI DOKUMENTI UPRAVLJANJA VODAMA**

**Član 44.**  
**(Planski dokumenti upravljanja vodama)**

Planski dokumenti za upravljanje vodama su:

- a) strategija upravljanja vodama na teritoriji Distrikta (u daljem tekstu: strategija);
- b) plan upravljanja vodama za vodno područje (u daljem tekstu: plan upravljanja vodama);
- c) program mjera;
- d) posebni planovi.

## **Odjeljak A. Strategija**

### **Član 45. (Strategija)**

- (1) Politika upravljanja vodama određuje se strategijom.
- (2) Strategijom se utvrđuju dugoročni pravci upravljanja vodama za period od dvanaest godina.
- (3) Strategija upravljanja vodama zasniva se na naučnim istraživanjima, kontinuiranom praćenju rasporeda stanja i pojava u vezi s vodama i njihovim korištenjem, uvažavajući specifičnosti vodne problematike vodnog područja i ciljeve zaštite voda u oblasti zaštite životne sredine.
- (4) Prijedlog strategije priprema Odjeljenje.
- (5) U cilju izrade strategije Odjeljenje angažuje pravno lice koje obavlja djelatnost iz oblasti voda.
- (6) Prijedlog strategije dostavlja se Odjeljenju za prostorno planiranje i imovinsko pravne poslove (u daljem tekstu: Odjeljenje za prostorno planiranje) i Savjetu za vode iz člana 177. ovog zakona radi davanja primjedbi i sugestija.
- (7) Strategiju usvaja Skupština, na prijedlog Vlade.

### **Član 46. (Sadržaj strategije)**

- (1) Strategija naročito sadrži:
  - a) opšti opis stanja vodnih resursa, vodnog režima i vodnih objekata u području upravljanja vodama;
  - b) okvirne ciljeve i pravce korištenja i zaštite voda, zaštite od štetnog djelovanja voda i održivog korištenja voda;
  - c) opšte prioritete za postizanje ciljeva upravljanja vodama;
  - d) ocjenu potrebnih sredstava za provođenje programa i planova, kao i rokove za postizanje ciljeva;
  - e) potrebne aktivnosti za sprovođenje utvrđene strategije, kao i za sprovođenje obaveza iz međunarodnih ugovora koje se odnose na upravljanje vodama;
  - f) specifične mjere protiv zagađenja vode u pogledu određenih ili grupa zagađujućih materija;

- g) specifične mjere za prevenciju i kontrolu zagađenja podzemnih voda sa ciljem postizanje dobrog stanja.
- (2) Vlada, na prijedlog šefa Odjeljenja, pozakonskim aktom utvrđuje detaljan sadržaj strategije.

**Član 47.**  
**(Ažuriranje Strategije)**

- (1) Po isteku šest godina od dana donošenja strategije, vrši se ažuriranje strategije, što obuhvata preispitivanje utvrđenih rješenja, dopuna podloga, izmjene i dopune sadržanih rješenja.
- (2) Odjeljenje prati realizaciju strategije i ako se u toku sprovođenja strategije bitno izmijene okolnosti, predlaže njeno usklađivanje i prije isteka roka iz stava (1) ovog člana.
- (3) Ažurirana strategija donosi se po postupku i na način predviđen za donošenje strategije.

**Član 48.**  
**(Međusobna usklađenost planskih dokumenata)**

Planski dokumenti na nivou Distrikta, u oblasti prostornog razvoja, održivog razvoja, održivog korištenja prirodnih resursa i dobara, zaštite životne sredine i drugi strateški dokumenti, međusobno se usklađuju.

**Odjeljak B. Plan upravljanja vodama**

**Član 49.**  
**(Plan upravljanja vodama)**

- (1) Za sprovođenje strategije iz člana 45. ovog zakona donosi se plan upravljanja vodama.
- (2) Plan upravljanja vodama donosi se za period od šest godina.
- (3) U cilju izrade plana Odjeljenje angažuje pravno lice koje obavlja djelatnost iz oblasti voda.
- (4) Vlada, na prijedlog šefa Odjeljenja, usvaja plan upravljanja vodama iz stava (1) ovog člana.

**Član 50.**  
**(Sadržaj plana upravljanja vodama)**

- (1) Plan upravljanja vodama sadrži:
- a) opšti opis karakteristika vodnog područja, uključujući:

- 1) za površinske vode: karte položaja i granica vodnih tijela, karte ekoregija i tipova vodnih tijela, oznaku referentnih uslova za tipove vodnih tijela;
  - 2) za podzemne vode: karte položaja i granica vodnih tijela;
- b) sažeti prikaz svih značajnih pritisaka i uticaja ljudske aktivnosti na stanje površinskih i podzemnih voda uključujući:
- 1) procjenu zagađenja od opasnih materija;
  - 2) procjenu zagađenja iz rasutih izvora, koja obuhvata pregled korištenja zemljišta;
  - 3) procjenu pritisaka na kvantitativno stanje voda i njeno zahvatanje;
  - 4) analizu ostalih uticaja ljudskih aktivnosti na stanje voda;
- c) identifikaciju i karte zaštićenih područja;
- d) kartu mreže monitoringa i kartografski prikaz rezultata programa monitoringa kojim se prati:
- 1) ekološko i hemijsko stanje površinskih voda;
  - 2) hemijsko i kvantitativno stanje podzemnih voda;
  - 3) stanje zaštićenih područja;
- e) ciljeve upravljanja vodama:
- 1) ciljeve za postizanje dobrog stanja i ekološkog potencijala vodnih tijela;
  - 2) ciljeve u vezi sa uređenjem voda i zaštite od štetnog djelovanja voda;
  - 3) ciljeve za održivo korištenje voda;
  - 4) rokove za postizanje navedenih ciljeva;
- f) pregled ekonomskih analiza korištenja voda;
- g) prikaz programa mjera uključujući i načine za dostizanje ciljeva iz tačke e) ovog člana;
- h) pregled svih detaljnijih programa i planova upravljanja vodama koji se odnose na određene riječne slivove, podslivove, sektorske planove, probleme ili tipove voda zajedno sa pregledom njihovih sadržaja;
- i) izvještaj koji obuhvata opis aktivnosti i rezultate učešća javnosti u postupku izrade plana;
- j) listu organa, odnosno institucija i način dobivanja dokumenata na osnovu kojih je izrađen plan;
- k) pregled međunarodnih obaveza koje je preuzela Bosna i Hercegovina, koje se odnose na upravljanje vodama te način njihovog izvršavanja.
- (2) Vlada, na prijedlog šefa Odjeljenja, utvrđuje podzakonskim aktom detaljan sadržaj i način izrade i donošenja plana upravljanja vodama.

### **Član 51.**

#### **(Ažuriranje plana upravljanja vodama)**

- (1) Po isteku roka od šest godina od dana donošenja plana upravljanja vodama, vrši se njegovo ažuriranje.
- (2) Ažuriran plan upravljanja vodama iz stava (1) ovog člana, pored sadržaja iz člana 50. ovog zakona, sadrži i:
  - a) pregled svih izmjena ili dopuna plana upravljanja vodama od dana njegovog donošenja;
  - b) ocjenu stepena dostignutih utvrđenih ciljeva;
  - c) kartografski prikaz rezultata monitoringa za prethodni period;
  - d) razlozi za nepostizanje svakih od utvrđenih ciljeva;

- e) razlozi zbog kojih predviđene mjere nisu preduzete;
  - f) prikaz preduzetih mjera koje nisu bile predviđene za postizanje utvrđenih ciljeva.
- (3) Ažuriran plan upravljanja vodama donosi se po postupku i na način predviđen za donošenje plana upravljanja vodama.

### **Član 52.**

#### **(Odstupanja od utvrđenih rokova za realizaciju plana upravljanja vodama)**

- (1) Ako se u toku realizacije plana upravljanja vodama, monitoringom ili na drugi način utvrdi da se, zbog fizičkih ili hemijskih promjena vodnog tijela uslijed ljudskih aktivnosti ili više sile, za pojedina vodna tijela ne mogu u planiranom roku i na planirani način ostvariti utvrđeni ciljevi koji se odnose na postizanje dobrog stanja ili dobrog ekološkog potencijala Odjeljenje, nalaže slijedeće mjere:
- a) ispitivanje uzroka koji su onemogućili ostvarivanje utvrđenih ciljeva;
  - b) preispitivanje vodnih akata, odnosno koncesija, izdatih u skladu sa ovim zakonom;
  - c) razmatranje programa monitoringa i vršenje njegovih izmjena;
  - d) usvajanje dodatnih mjera za postizanje utvrđenih ciljeva.
- (2) Odjeljenje, po sprovedenom postupku iz stava (1) ovog člana, može za pojedina vodna tijela utvrditi da se:
- a) produže rokovi za postizanje ciljeva, ako bi postizanje ciljeva u predviđenim rokovima bilo tehnički neizvodljivo, neprimjereno skupo, ili prirodni uslovi ne dozvoljavaju blagovremeno poboljšanje vodnog tijela;
  - b) privremeno ne ostvari dobro stanje voda ili dobar ekološki potencijal, ako je do pogoršanja stanja došlo uslijed prirodne katastrofe, odnosno više sile koju nije bilo moguće predvidjeti;
  - c) odrede manje strogi ciljevi ako je vodno tijelo, uslijed ljudskih aktivnosti ili prirodnih uslova, tako promjenjeno da bi ostvarivanje zadatah ciljeva bilo neizvodljivo ili neprimjereno skupo.
- (3) Ciljevi iz stava (2) tačka c) ovog člana ne smiju da ugroze postizanje ciljeva koji se odnose na dobro stanje površinskih i podzemnih voda i dobar ekološki potencijal u drugim vodnim tijelima unutar istog vodnog područja ili podsliva.

## **Odjeljak C. Program mjera**

### **Član 53.** **(Program mjera)**

- (1) Radi ostvarivanja ciljeva strategije i plana upravljanja vodama donosi se program mjera.
- (2) Vlada, na prijedlog šefa Odjeljenja usvaja program mjera.

(3) Program mjera je dio plana upravljanja vodama.

**Član 54.**  
**(Sadržaj programa mjera)**

- (1) Program mjera naročito sadrži mjere koje se odnose na:
- a) uređenje vodotoka i zaštitu od štetnog djelovanja voda;
  - b) uređenje i korištenje voda;
  - c) zaštitu voda.
- (2) Mjere koje se odnose na uređenje vodotoka i zaštitu od štetnog djelovanja voda su mjere koje se odnose na:
- a) očuvanje i izravnavanje količina voda;
  - b) zaštitu od štetnog djelovanja voda;
  - c) određivanje obima gradnje vodnih objekata i prioritete njihove realizacije.
- (3) Mjere koje se odnose na uređenje i korištenje voda su mjere koje se odnose na:
- a) očuvanje vodnih količina, uključujući i mjere kontrole zahvaćenih količina, kao i mjere koje se primjenjuju u postupcima izdavanja dozvola za korištenje voda;
  - b) vještačko obogaćivanje ili povećanje zapremine podzemnih voda, uključujući i mjere kontrole količina i kvaliteta voda korištenih u te svrhe;
  - c) obezbjeđivanje hidromorfoloških uslova vodnih tijela u skladu sa potizanjem zahtijevanog ekološkog statusa ili dobrog ekološkog potencijala vještačkih i značajno izmijenjenih vodnih tijela;
  - d) postizanje održivog korištenja voda;
  - e) povrat troškova za korištenje i zaštitu voda.
- (4) Mjere koje se odnose na zaštitu voda su mjere:
- a) kojima se kvalitet voda štiti i unapređuje, uključujući i dodatne mjere za postizanje ciljeva utvrđenih u strategiji;
  - b) kojima se osigurava odgovarajući kvalitet vode za snabdijevanje vodom za piće;
  - c) koje su utvrđene propisima iz oblasti zaštite životne sredine i zdravlja, a koje se odnose na akvatične i poluakvatične ekosisteme;
  - d) koje su utvrđene propisima iz oblasti poljoprivrede, ribarstva i drugo.
- (5) Program mjera može sadržavati i dopunske mjere, ako su potrebne za postizanje dobrog stanja voda.

**Član 55.**  
**(Preispitivanje i ažuriranje programa mjera)**

Program mjera se preispituje, i po potrebi, ažurira, svake šeste godine od dana njegovog stupanja na snagu.

## **Odjeljak D. Posebni planovi upravljanja vodama**

### **Član 56. (Posebni planovi)**

- (1) Radi sprovođenja strategije može se, pored plana upravljanja vodama, donijeti i poseban plan upravljanja vodama za pojedina pitanja upravljanja vodama, odnosno pojedine kategorije vodotoka.
- (2) Vlada, na prijedlog šefa Odjeljenja, usvaja plan iz stava (1) ovog člana.
- (3) Plan iz stava (1) ovog člana se usklađuje sa planom upravljanja vodama.
- (4) Vlada, na prijedlog šefa Odjeljenja, utvrđuje podzakonskim aktom sadržaj i način izrade i donošenja plana iz stava (1) ovog člana.

### **Član 57. (Sadržaj posebnog plana)**

Poseban plan upravljanja vodama naročito sadrži:

- a) razloge donošenja;
- b) obuhvaćeni prostor;
- c) prikaz radova i mjera iz plana upravljanja vodama za obuhvaćeni prostor;
- d) detaljnije analize i prijedlog radova i mjera utvrđenih posebnim planom.

## **Odjeljak E. Koordinacija planova i konsultacije sa javnošću**

### **Član 58. (Koordinacija planova za upravljanje vodama)**

- (1) U toku izrade plana upravljanja vodama, Odjeljenje obavezno uspostavlja i osigurava koordinaciju svih aktivnosti i redovne konsultacije sa nadležnim institucijama za izradu plana upravljanja vodama za isto vodno područje iz Republike Srpske i Federacije Bosne i Hercegovine radi osiguranja donošenja jedinstvenog plana upravljanja vodama vodnog područja u Bosni i Hercegovini.
- (2) Postupci i drugi zahtjevi, vezano za koordinaciju planova upravljanja vodama mogu biti uspostavljeni međusobnim memorandumima. ili usaglašenim podzakonskim propisima resornih institucija.
- (3) Koordinacija pripreme planova upravljanja vodama u međunarodnim vodnim područjima može dodatno biti regulisana međunarodnim sporazumima koje zaključuje Bosna i Hercegovina.

**Član 59.**  
**(Konsultovanje javnosti)**

- (1) Odjeljenje je dužno da obezbijedi aktivno učešće javnosti u procesu pripreme i donošenja strategije, odnosno plana upravljanja vodama.
- (2) Odjeljenje je dužno obavjestiti:
  - a) vremenski raspored i program rada na izradi ili ažuriranju strategije, odnosno plana upravljanja vodama, uključujući popis konsultacija koje treba obaviti, najmanje tri godine prije početka perioda na koji se strategija, odnosno plan upravljanja vodama odnosi;
  - b) pregled o stanju izrade strategije, odnosno plana upravljanja vodama, kao i pregled o značajnim pitanjima na posmatranom vodnom području, najkasnije dvije godine prije početka perioda na koji se strategija, odnosno plan upravljanja vodama odnosi;
  - c) nacrt strategije, odnosno plana upravljanju vodama, najmanje godinu dana prije početka perioda na koji se strategija, odnosno plan upravljanja vodama odnosi.
- (3) Objavještavanje iz stava (2) ovog člana vrši se na jedan od slijedećih načina:
  - a) putem objavljivanja u „Službenom glasniku Brčko distrikta Bosne i Hercegovine“;
  - b) putem objavještavanje na web stranici Vlade ili
  - c) putem sredstava javnog informisanja.
- (4) Odjeljenje je dužno omogućiti uvid u propratnu dokumentaciju i informacije korištene u izradi nacrta strategije, odnosno plana upravljanja vodama na pisani zahtjev fizičkih i pravnih lica.
- (5) Odjeljenje može, kada to smatra potrebnim, organizovati prikupljanje informacija od javnosti u formi okruglih stolova i slično, radi usvajanja informacija koje se odnose na planiranje u oblasti upravljanja vodnim područjem.
- (6) Fizička ili pravna lica mogu dostaviti Odjeljenju pisane primjedbe, prijedloge i sugestije na nacrt strategije, odnosno plana upravljanja vodama u roku od šest mjeseci nakon njihovog objavljivanja.
- (7) Odjeljenje je obavezno da u roku od tri mjeseca od isteka roka iz stava (6) ovog člana, sastavi izvještaj o stavovima povodom dostavljenih primjedbi, prijedloga i sugestija.

**POGLAVLJE VI. KORIŠTENJE VODA**

**Član 60.**  
**(Korištenje voda)**

Korištenjem voda smatra se korištenje voda za :



- a) zahvatanje, crpljenje i upotreba površinskih i podzemnih voda za različite namjene, uključujući sanitarne i tehnološke kao i snabdijevanje vodom za piće, navodnjavanje i drugo;
- b) uzgoj riba i drugih akvatičnih organizma;
- c) proizvodnju električne energije i druge pogonske namjene;
- d) plovidbu;
- e) sport, turizam, kupanje, rekreaciju i druge slične namjene i
- f) druge namjene.

**Član 61.**  
**(Način i uslovi korištenja voda)**

- (1) Korištenje voda iz člana 60. ovog zakona vrši se u skladu sa ovim zakonom i posebnim propisima.
- (2) Voda se koristi racionalno i ekonomično.
- (3) Svaki korisnik vode dužan je koristiti vodu na način kojim se ne uskraćuje pravo korištenja vode drugim licima i ne ugrožavaju ciljevi zaštite životne sredine.

**Član 62.**  
**(Opšta upotreba voda)**

- (1) Opštom upotrebom voda smatra se njeno korištenje, bez prethodnog tretmana, odnosno bez upotrebe posebnih uređaja ili izgradnje vodnih objekata, i ne isključuje druge od jednakog korištenja.
- (2) Opšta upotreba voda obuhvata naročito:
  - a) zahvatanje vode, bez posebnih naprava, iz vodotoka i jezera, za lične i potrebe domaćinstva;
  - b) zahvatanje podzemne vode ili vode sa izvora, koja se koristi iz bunara ili izvora na vlastitom zemljištu, za lične i potrebe domaćinstva;
  - c) prikupljanje i korištenje oborinskih voda za lične i potrebe domaćinstva koje se sakupljaju na vlastitom zemljištu;
  - d) korištenje voda iz rijeka, jezera i drugih površinskih voda za kupanje i rekreaciju;
  - e) korištenje voda za gašenje požara, za obavljanje poslova zaštite ljudi, životinja ili imovine od prirodnih i drugih nesreća, za provođenje zadataka Policije i za odbranu;
  - f) korištenje voda za plovidbu.
- (3) Ličnim i potrebama domaćinstva iz stava (2) ovoga člana, smatra se korištenje vode za piće, održavanje čistoće i slične potrebe u domaćinstvu, osim korištenja vode za navodnjavanje i u tehnološkom procesu pri obavljanju privredne djelatnosti.

**Član 63.**  
**(Posebna upotreba voda)**

- (1) Svako korištenje voda koje prelazi opštu upotrebu predstavlja posebnu upotrebu, za koju je potrebno steći vodno pravo, ukoliko ovim zakonom nije drugačije određeno.

- (2) Vodno pravo iz stava (1) ovog člana stiče se vodnim aktom ili ugovorom o koncesiji.

**Član 64.**  
**(Istražni radovi na izvorištu)**

- (1) Posebna upotreba vode iz izvorišta površinskih i podzemnih voda može se dozvoliti samo ako su prethodno obavljeni istražni radovi, na osnovu kojih je dokazana mogućnost njihovog racionalnog korištenja, u skladu sa ovim zakonom.
- (2) Istražnim radovima iz stava (1) ovog člana smatraju se radovi i hidrogeološka i druga ispitivanja, kojima se utvrđuje postojanje, rasprostranjenost, količine, hemijske i druge karakteristike, kao i kvalitet i pokretljivosti površinskih i podzemnih voda.

**Član 65.**  
**(Obaveze izvođača istražnih i drugih radova)**

- (1) Ako se prilikom istražnih geoloških, rudarskih i drugih radova naiđe na vodonosni sloj, izuzev potpovršinskog vodonosnog sloja, izvođač radova dužan je da bez odlaganja preduzme mjere radi sprečavanja zagađivanja podzemnih voda i da o vodonosnom sloju i preduzetim mjerama obavijesti Odjeljenje, Odjeljenje za prostorno planiranje i vodoprivrednog inspektora.
- (2) Izvođač radova dužan je ovlaštenim licima organa iz stava (1) ovog člana dopustiti uzimanje podataka i obavljanje potrebnih ispitivanja radi utvrđivanja ležišta, količine i kvaliteta vode, kao i poduzeti potrebne mjere osiguranja.
- (3) Ako organ iz stava (1) ovog člana obavijesti izvođača radova da se vode iz vodonosnog sloja iz stava (1) ovog člana neće odmah koristiti, izvođač radova je dužan da o svom trošku zatvori bušotinu.
- (4) Bunari i bušotine sa slobodnim isticanjem vode moraju biti opremljeni uređajima za regulisanje isticanja vode i zaštitu voda od zagađivanja.

**Član 66.**  
**(Isključenje ili ograničenje posebne upotrebe vode planom upravljanja vodama)**

Planom upravljanja voda može biti isključena ili ograničena posebna upotreba vode, ukoliko se njome:

- a) ugrožava zdravlje i bezbjednost ljudi;
- b) ugrožava prirodna ravnoteža akvatičnih i poluakvatičnih ekosistema, odnosno zaštićenih područja;
- c) znatno ograničava opšta upotreba voda;
- d) ograničava uređenje voda i zaštita od štetnog djelovanja voda.

**Član 67.**  
**(Privremeno ograničenje ili obustavljanje vodnog prava)**

Šef Odjeljenja može privremeno ograničiti pravo na posebno korištenje voda:

- a) ako je uslijed prirodnih pojava dovedeno u pitanje obezbjeđivanje količina vode ili ugrožen njen kvalitet, prirodna ravnoteža akvatičnih i poluakvatičnih ekosistema ili smanjena bezbjednost od štetnog djelovanja voda;
- b) u slučaju većeg oštećenja vodnih objekata, odnosno rekonstrukcije vodnog objekta;
- c) ako se voda ne koristi racionalno i ekonomično, u skladu sa vodnim aktom, odnosno dodijeljenom koncesijom;
- d) ako korištenje voda ima za posljedicu njeno zagađivanje i ugrožavanje akvatičnih i poluakvatičnih ekosistema;
- e) u drugim slučajevima, koji za posljedicu imaju nedostatak vode ili smanjenu bezbjednost od štetnog djelovanja vode.

**Član 68.**  
**(Prioriteti u korištenju voda)**

- (1) Korištenje voda po slijedećem redoslijedu ima prioritet nad korištenjem voda za ostale namjene:
  - a) snabdijevanje stanovništva vodom za piće;
  - b) protivpožarna zaštita i odbrana;
  - c) sanitarne potrebe;
  - d) napajanje stoke.
- (2) Planom upravljanja vodama može se, zbog određenih specifičnih uslova i potreba, odrediti pravo prvenstva korištenja vode za ostale namjene, uz obavezno davanje prvenstva za namjene iz stava (1) ovog člana.
- (3) Pravo prvenstva u korištenju voda za namjene iz stava (1) ovog člana ima područje izvorišta, u obimu koji odgovara potrebama i ako se te potrebe ne mogu zadovoljiti na ekonomičniji i racionalniji način, u odnosu na potrebe za vodom izvan tog područja za iste namjene.

**Član 69.**  
**(Snabdijevanje vodom za piće)**

Vode koje su planom upravljanja vodama određene za piće ne mogu se koristiti za druge svrhe, izuzev za gašenje požara i odbranu, niti na način koji bi nepovoljno uticao na količinu i svojstva vode.

**Član 70.**  
**(Kvalitet vode)**

Voda koja se koristi za piće, za proizvodnju i preradu životnih namirnica i predmeta opšte upotrebe i sanitarno-higijenske potrebe mora, u pogledu kvaliteta, ispunjavati uslove u pogledu zdravstvene ispravnosti utvrđene propisima.

**Član 71.**  
**(Obaveza kontrole kvantiteta i kvaliteta vode)**

- (1) Fizičko ili pravno lice koje obavlja poslove snabdijevanja vodom dužno je:
  - a) postaviti uređaje i obezbijediti stalno i sistematsko registrovanje količina vode i ispitivanje kvaliteta vode na vodozahvatu;
  - b) preduzimati mjere za obezbjeđenje zdravstvene ispravnosti vode za piće i održavati higijenu u objektu;
  - c) preduzimati mjere za obezbjeđenje tehničke i higijenske ispravnosti uređaja.
- (2) Fizičko ili pravno lice koje koristi vodu u procesu rada ili proizvodnje dužno je da obezbjedi stalno i sistematsko registrovanje količina vode.
- (3) Lica iz stavova (1) i (2) ovog člana dostavljaju Odjeljenju najmanje jednom godišnje, podatke o mjerenjima količine i kvaliteta vode na vodozahvatu.
- (4) Odjeljenje podatke iz stava (3) ovog člana unosi u vodni informacijski sistem.
- (5) Kontrolu kvaliteta vrše ovlaštene laboratorije.
- (6) Šef Odjeljenja utvrđuje podzakonskim aktom način i postupak mjerenja količina vode iz stava (1) tačka a) ovog člana.
- (7) Odjeljenje za zdravstvo i ostale usluge Vlade Brčko distrikta Bosne i Hercegovine (u daljem tekstu: Odjeljenje za zdravstvo) utvrđuje podzakonskim aktom vrstu, način i obim ispitivanja kvaliteta vode, uslove koje ovlaštene laboratorije moraju ispuniti i način dobijanja ovlaštenja.

**Član 72.**  
**(Vodna tijela, odnosno izvorišta namijenjena za regionalno ili javno snabdijevanje vodom)**

- (1) Vodna tijela, odnosno izvorišta koja služe za regionalno ili javno snabdijevanje vodom su od opšteg interesa.
- (2) Granice vodnog tijela, odnosno izvorišta iz stava (1) ovog člana utvrđuju se u skladu sa članom 19. ovog zakona.
- (3) Vodna tijela, odnosno izvorišta iz stava (1) ovog člana upisuju se u zemljišne knjige.

**Član 73.**  
**(Zaštita izvorišta)**

Područja na kojima se nalaze izvorišta za snabdijevanje vodom za piće i za sanitarno-higijenske potrebe, odnosno izvorišta od značaja za ljudsku upotrebu ili korištenje mineralnih, termalnih, termomineralnih ili drugih podzemnih voda zaštićuju se od namjernog ili slučajnog zagađivanja i drugih uticaja koji mogu nepovoljno djelovati na izdašnost izvorišta i na zdravstvenu ispravnost vode određivanjem zone sanitarne zaštite.

**Član 74.**  
**(Zone sanitarne zaštite)**

- (1) Zona sanitarne zaštite izvorišta iz člana 73. ovog zakona dijeli se na tri zone zaštite:
  - a) šira zona zaštite;
  - b) uža zona zaštite i
  - c) zona neposredne zaštite.
- (2) Zone sanitarne zaštite iz stava (1) ovog člana predstavljaju zaštićeno područje i određuju se u skladu sa hidrološkim, hidrogeološkim i drugim svojstvima zemljišta i podslivova, vrstom izvorišta i njegovog okruženja, kapacitetom izvorišta i drugim činjenicama koji utiču na izdašnost izvorišta.
- (3) Odluku o proglašenju zona sanitarne zaštite izvorišta iz stava (1) ovog člana donosi Vlada, na prijedlog šefa Odjeljenja za zdravstvo.
- (4) Na osnovu odluke iz stava (3) ovog člana, zone sanitarne zaštite unose se u plan upravljanja vodama, prostorne i druge planske dokumente.
- (5) Vlada, na prijedlog šefa Odjeljenja za zdravstvo u saradnji sa Odjeljenjem, utvrđuje podzakonskim aktom način i uslove određivanja, održavanja i korištenja zona sanitarne zaštite.

**Član 75.**  
**(Ostvarivanje prava na navodnjavanje)**

- (1) Zahvatanje i korištenje površinskih i podzemnih voda za navodnjavanje poljoprivrednih kultura i zemljišta ili drugog zemljišta ostvaruje se pod uslovima određenim ovim zakonom.
- (2) U svrhu građenja, odnosno korištenja melioracionog sistema za navodnjavanje, odnosno odvodnju od interesa za više vlasnika ili korisnika zemljišta, može se osnovati posebno pravno lice, kao zadruga, udruženje ili slično, u skladu sa posebnim propisima.
- (3) Pravo na upravljanje i korištenje javnog vodnog objekta koji je u službi melioracionih sistema može se prenijeti na pravno lice iz stava (2) ovog člana u skladu sa članom 39. ovog zakona.
- (4) Pravno lice kome je preneseno pravo iz stava (3) ovog člana dužno je pribaviti pravo na korištenje vode i osigurati finansijska sredstva za održavanje i rad melioracionog sistema.
- (5) Pravno lice kome je preneseno pravo iz stava (3) ovog člana može poslove tehničkog održavanja povjeriti pravnom licu registrovanom za obavljanje djelatnosti navodnjavanja.
- (6) Vlasnici, odnosno korisnici iz stava (2) ovog člana dužni su da snose srazmjerne troškove upravljanja i održavanja objekata iz sistema za navodnjavanje.

**Član 76.**  
**(Kvalitet vode za navodnjavanje)**

- (1) Voda koja je namijenjena za navodnjavanje poljoprivrednih kultura i zemljišta mora biti propisanog kvaliteta.
- (2) Šef Odjeljenja podzakonskim aktom, uz prethodno mišljenje Odjeljenja za zdravstvo, utvrđuje parametre kvaliteta vode iz stava (1) ovog člana.

**Član 77.**  
**(Korištenje vodnih snaga)**

- (1) Korištenje vodnih snaga za proizvodnju električne energije ili za pogon uređaja snagom vode ostvaruje se u skladu sa ovim zakonom.
- (2) Objekti i uređaji za korištenje vodnih snaga moraju se projektovati i graditi na način koji:
  - a) omogućava vraćanje vode istog kvaliteta poslije iskorištene energije u vodotok ili druge površinske vode;
  - b) ne umanjuje postojeći obim i ne sprječava korištenje vode za snabdijevanje vodom, navodnjavanje i druge namjene, u skladu sa ovim zakonom;
  - c) ne umanjuje stepen zaštite i ne otežava sprovođenje mjera zaštite od štetnog djelovanja voda;
  - d) ne pogoršava uslove sanitarne zaštite i ne utiče negativno na ekološko stanje voda i stanje životne sredine;
  - e) ne dovodi do gubitka ustanovljene posebne međunarodne zaštite vodotoka, odnosno drugih površinskih voda.
- (3) Pri projektovanju i izgradnji brana i akumulacija za korištenje vodnih snaga treba u najvećem mogućem stepenu, obezbijediti njihovo višenamjensko korištenje, kao što je zaštita od štetnog djelovanja voda, snabdijevanje vodom, navodnjavanje, povećanje proticaja u cilju popravke kvaliteta vode u malovodnim periodima i druge namjene.
- (4) Pravo na korištenje vodnih snaga za pogon jednostavnijih uređaja i postrojenja za potrebe jednog ili više domaćinstava i za obavljanje djelatnosti manjeg obima od značaja za život ljudi u ruralnom području, kao što su zahvatanje vode za snabdijevanje vodom, pokretanje mlinova, pilana, kovačnica i slično, može se steći na osnovu vodne dozvole.
- (5) Dodjela prava korištenja vodnih snaga za proizvodnju električne energije ili za pogon uređaja snagom vode, u odnosu na druge namjene određene ovim zakonom, vrši se na osnovu utvrđenog javnog interesa za:
  - a) poboljšanje opšteg standarda ljudi,
  - b) stepen zaštite životne sredine,
  - c) zaštita zdravlja i racionalnijeg korištenja vodne snage.

**Član 78.**  
**(Korištenje vode za plovidbu)**

- (1) Voda za plovidbu koristi se na način i pod uslovima utvrđenim ovim zakonom i drugim propisima.
- (2) Izgradnja vodnih objekata u funkciji plovidbe vrši se u skladu sa ovim zakonom.
- (3) Dislociranje ili vađenje materijala iz vodotoka mora biti u saglasnosti sa funkcijama plovidbe.

**Član 79.**  
**(Korištenje vode za uzgoj ribe i drugih akvatičnih organizma)**

- (1) Korištenje voda za uzgoj ribe i drugih akvatičnih organizama vrši se u skladu sa ovim zakonom i drugim propisima.
- (2) Hladnovodni ribnjaci, na vodama najvišeg kvaliteta, mogu se graditi ukoliko se njima ne ugrožavaju funkcije tih voda kao izvorišta za snabdijevanje vodom za piće.
- (3) Toplovodni ribnjaci se mogu graditi na svim mjestima u području aluvijalne ravni, osim na mjestima na kojima se koriste ili nalaze izvorišta podzemnih voda ili na kojima se planira izgradnja vodnih objekata za zaštitu od poplava i zaštitu voda.
- (4) Pravna lica koja upravljaju akumulacijama, kanalima i drugim akvatorijumima imaju pod jednakim uslovima, prvenstvo prilikom dodjele ribolovnih područja na tim akumulacijama, kanalima i drugim akvatorijumima.
- (5) Poribljavanje, uzgoj i izlov ribe i drugih akvatičnih organizma vrši se u skladu sa osnovnom namjenom akumulacije, kanala ili drugog akvatorija.

**Član 80.**  
**(Korištenje vode za sport, turizam, kupanje i rekreaciju)**

- (1) Namjene, odnosno uslovi za korištenje akumulacija i drugih akvatorija za sport, kupanje, rekreaciju na vodama i turizam određuju se prostornim planom i drugim planskim dokumentima, u skladu sa ovim zakonom.
- (2) Planskim dokumentima iz stava (1) ovog člana, u skladu sa namjenom i režimom zaštite akumulacije ili drugog akvatorija, određuju se sadržaji koji se mogu realizovati u zoni tih akvatorija, uključujući i sadržaje koji prevazilaze opštu upotrebu voda.
- (3) Sadržaj koji prevazilaze opštu upotrebu voda iz stava (2) ovog člana su parkirališta, pristupne staze do vode i oko akvatorija, plaže i sanitarni uređaji na njima, dozvoljene aktivnosti na vodi, kao što su splavarenje, rafting, kajakaštvo, jedrenje i drugo u prostoru vodnog dobra i sve drugo što je u vezi sa namjenama akumulacija, odnosno akvatorija i režimom njihove zaštite.

**Član 81.**  
**(Dislociranje ili vađenje materijala)**

- (1) Dislociranje ili vađenje materijala iz vodotoka dozvoljeno je samo ako doprinosi očuvanju ili poboljšanju vodnog režima, u obimu kojim se ne narušava vodni režim, stabilnost obala i prirodna ravnoteža akvatičnih i poluakvatičnih ekosistema ili ako to služi sprovođenju mjera zaštite.
- (2) Dislociranje ili vađenje materijala vrši se na osnovu vodne saglasnosti, odnosno ugovora o koncesiji, u skladu sa ovim zakonom.
- (3) Dislociranje ili vađenje materijala iz vodotoka može vršiti fizičko ili pravno lice koje je registrovano za obavljanje djelatnosti dislociranja ili vađenja materijala iz vodotoka i ispunjava uslove utvrđene podzakonskim aktom iz stava (5) ovog člana.
- (4) Fizičko ili pravno lice iz stava (3) ovog člana koje vrši dislociranje ili vađenje materijala iz vodotoka dužno je da vodi urednu evidenciju o vrsti i količini izvađenog materijala i podatke o vrsti i količini izvađenog materijala dostavlja Odjeljenju.
- (5) Vlada, na prijedlog šefa Odjeljenja, podzakonskim aktom uređuje bliže uslove koje mora ispunjavati pravno lice iz stava (3) ovog člana u pogledu zaposlenih i mehanizacije, sadržaja i načina vođenja evidencije, kao i načina i rokova dostavljanja podataka o količini izvađenog materijala iz stava (4) ovog člana.

**POGLAVLJE VII. UREĐENJE VODOTOKA I ZAŠTITA OD ŠTETNOG  
DJELOVANJA VODA**

**Odjeljak A. Uređenje vodotoka**

**Član 82.**  
**(Uređenje vodotoka)**

Uređenja vodotoka obuhvata:

- a) radnje i aktivnosti na izgradnji i održavanju vodnih objekata iz člana 29., 30., 31. i 32. ovog zakona na vodnom dobru;
- b) izvođenje radnji i aktivnosti na održavanju stabilnosti obala i korita vodotoka i druge radnje i aktivnosti na vodnom dobru kojima se omogućava kontrolisani i neškodljivi tok vode, leda i nanosa;

**Član 83.**  
**(Radnje i aktivnosti na održavanje vodnog dobra i vodnih objekata)**

Radnje i aktivnosti iz člana 82. ovog zakona obuhvataju naročito:

- a) radove na održavanju prirodnih i vještačkih vodotoka kao što su oblaganje korita i obala, čišćenje, uklanjanje i dislociranje nanosa, djelimično



- produbljanje dna korita, ublažavanje zavoja bez značajnije promjene trase korita i slično;
- b) zemljani i slični radovi na uređenju i održavanju obala, zemljani radovi u inundacionom pojasu i na vodnom zemljištu, krčenje i košenje rastinja, obnavljanje i održavanje propusta i prijelaza;
  - c) održavanje regulacionih i zaštitnih vodnih objekata kao što je popravak, ojačanje i obnavljanje nasipa, krčenje, košenje i radovi na vegetativnoj zaštiti objekata, zamjena oštećenih dijelova vodnih objekata i slično;
  - d) održavanje vodnih objekata za odvodnju kao što je čišćenje, tehničko i vegetativno održavanje objekata i pojasa uz objekte, zemljani radovi na manjim dopunama kanalske mreže, ublažavanje zavoja i nagiba, drenažni radovi, izrada tipskih propusta i sličnih objekata koji su sastavni dio kanalske mreže, njihovo obnavljanje, zamjena i slično.

#### **Član 84.** **(Poboljšanje hidromorfološkog stanja površinskih voda)**

- (1) Radi poboljšanja narušene prirodne ravnoteže akvatičnih i poluakvatičnih ekosistema, ili zbog slabog stanja voda, naročito na vještačkom i značajno izmijenjenom vodnom tijelu, sprovode se mjere za poboljšanje dinamike prirodnih procesa voda.
- (2) Mjere za poboljšanje hidromorfološkog stanja obuhvataju obnovu i ponovno uspostavljanje strukture i oblika vodnog tijela koje utiču na poboljšanje njegovog hemijskog i ekološkog stanja.

#### **Član 85.** **(Planiranje i izvođenje uređenja)**

Radnje i aktivnosti iz člana 82. ovog zakona planiraju se i izvode na način da bitno ne pogoršavaju karakteristike režima voda i bitno ne remete prirodnu ravnotežu akvatičnih i poluakvatičnih ekosistema.

#### **Član 86.** **(Obaveze Distrikta)**

- (1) Distrikt obezbjeđuje uređenje vodotoka u skladu sa članom 82. ovog zakona.
- (2) Obim obezbjeđenja uređenja vodotoka određuju se planom upravljanja vodama i programom mjera iz člana 53. ovog zakona.

---

### **Odjeljak B. Zaštita od štetnog djelovanja voda**

#### **Član 87.** **(Zaštita od štetnog djelovanja voda)**

- (1) Zaštita od štetnog djelovanja voda obezbjeđuje se radi smanjenja ili sprječavanja ugroženosti ljudi i materijalnih dobara od štetnog djelovanja voda i otklanjanja posljedica njihovog djelovanja.

- (2) Zaštita od štetnog djelovanja voda obezbjeđuje se radnjama, mjerama i aktivnostima planiranja, izgradnje, održavanja i upravljanja zaštitnim vodnim objektima, uređenja vodotoka, sprovođenja odbrane od štetnog djelovanja voda i izvođenjem drugih potrebnih mjera i aktivnosti.
- (3) Zaštita od štetnog djelovanja voda obuhvata zaštitu od poplava spoljnim i unutrašnjim vodama (u daljem tekstu: zaštita od poplava), zaštitu od leda na vodotocima, zaštitu od erozije i bujica.
- (4) Radnje, mjere i aktivnosti iz stava (2) ovog člana:
  - d) sprovode se na način da u što manjoj mogućoj mjeri ugroze kvalitet vode i da ne oštete vodno dobro i priobalno zemljište, vodne objekte i drugu infrastrukturu, kao i da u najvećoj mogućoj mjeri očuvaju hidromorfološke karakteristike vodotoka;
  - e) mogu se sprovesti i izvan ugroženog područja ako se njima povećava stepen zaštite;
  - f) ne smiju pogoršavati uslove zaštite od poplava nizvodno i uzvodno od mjesta na kome su radnje, mjere i aktivnosti preduzete.

#### **Član 88.**

##### **(Obim zaštite od štetnog djelovanja voda)**

- (1) Distrikt obezbjeđuje zaštitu od štetnog djelovanja voda i potrebne mjere na ugroženim područjima.
- (2) Obim zaštite od štetnog djelovanja voda i potrebne mjere iz stava (1) ovog člana određuju se upravljanjem rizicima od štetnog djelovanja voda, koje obuhvata:
  - a) izradu preliminarne procjene rizika od poplava;
  - b) izradu i sprovođenje planova upravljanja rizicima od poplava;
  - c) izradu opšteg i operativnih planova odbrane od poplava;
  - d) sprovođenje redovne i vanredne odbrane od poplava;
  - e) sprovođenje odbrane od leda na vodotocima;
  - f) izradu planova zaštite od erozije i bujica.
- (3) Kod određivanja obima zaštite iz stava (1) ovog člana u obzir se naročito uzimaju:
  - a) značaj ugroženog područja, veličina naselja, vrijednost infrastrukture ili zemljišta;
  - b) prirodne i socijalne prilike stanovništva na ugroženom području;
  - c) potrebne mjere za zaštitu, uključujući i ocjenu njihove izvodljivosti, visinu troškova, kao i posljedice za prirodnu ravnotežu;
  - d) osjetljivost vodnog talasa na mogućnost iznenadnog zagađenja.

#### **Član 89.**

##### **(Ugrožena područja)**

- (1) Radi obezbjeđenja zaštite od štetnog djelovanja voda određuju se ugrožena područja i to:

- a) područje koje je ugroženo uslijed poplava (u daljnjem tekstu: poplavno područje),
  - b) područje koje je ugroženo uslijed erozije vodom (u daljnjem tekstu: erozivno područje).
- (2) Područja iz stava (1) ovog člana se utvrđuju na osnovu:
- a) prirodne mogućnosti i uslova za nastanak štetnog djelovanja voda,
  - b) broja potencijalno ugroženih stanovnika i
  - c) veličine moguće štete na zemljištu, objektima i drugim dobrima.
- (3) Područja iz stava (1) ovog člana utvrđuje Vlada, na prijedlog šefa Odjeljenja.
- (4) Radi zaštite od štetnog djelovanja voda, s obzirom na stepen ugroženosti, zemljište na ugroženom području može se podijeliti na kategorije.
- (5) Ugrožena područja unose se u prostorni plan i druge planske dokumente, a katastarske parcele u tim zonama vode se u vodnom informacionom sistemu.
- (6) Šef Odjeljenja podzakonskim aktom utvrđuje uslove i način određivanja ugroženog područja i razvrstavanje zemljišta na kategorije ugroženosti.

**Član 90.**  
**(Poplavno područje)**

Poplavno područje je područje uz vodotok koje može biti poplavljeno tokom poplavnog događaja uslijed izlivanja vode iz korita, bez obzira na to da li je područje osigurano zaštitnim objektima.

**Član 91.**  
**(Erozivno područje)**

- (1) Erozivno područje je zemljište koje je stalno ili povremeno pod uticajem površinske, dubinske ili bočne erozije vode, a koje je:
- a) izvor plavina (erozivno žarište);
  - b) pod uticajem bujica;
  - c) sastavljeno od tla podložnog ispiranju.
- (2) Erozivno područje određuje se na osnovu karakteristika, intenziteta i kategorije erozije, položaja i načina korišćenja zemljišta.

**Član 92.**  
**(Preliminarna procjena rizika od poplava)**

- (1) Preliminarna procjena rizika od poplava izrađuje se za teritoriju Distrikta i naročito sadrži:
- a) karte vodnog područja u odgovarajućoj razmjeri, sa granicama podslivova, prikazom topografije i načina korišćenja zemljišta;

- b) opis poplava iz prošlosti koje su imale značajnije štetne posljedice na zdravlje ljudi, životnu sredinu, kulturno naslijeđe i privredne aktivnosti i vjerovatnoću pojave sličnih događaja u budućnosti, koji bi mogli imati slične posljedice;
  - c) procjenu potencijalnih štetnih posljedica budućih poplava, na zdravlje ljudi, životnu sredinu, kulturno naslijeđe i privredne aktivnosti, uzimajući u obzir topografske, hidrološke i geomorfološke karakteristike i položaj vodotoka, uključujući ugrožena područja, efekat postojećih zaštitnih objekata, položaj naseljenih mjesta i industrijskih zona, planove dugoročnog razvoja i klimatske promjene od uticaja na pojavu poplava.
- (2) Preliminarnu procjenu rizika od poplava donosi šef Odjeljenja.
  - (3) Šef Odjeljenja podzakonskim aktom bliže utvrđuje sadržaj i metodologiju za izradu preliminarne procjene rizika od poplava.

**Član 93.**  
**(Karta ugroženosti i karta rizika od poplava)**

- (1) Karta ugroženosti i karta rizika od poplava izrađuje se za ugrožena područja na kojima postoje ili se mogu javiti značajni rizici od poplava.
- (2) Karta ugroženosti od poplava sadrži podatke o granicama ugroženog područja, poplavnog područja različitog povratnog perioda, dubini ili nivou vode i, po potrebi, brzini ili protoku vode.
- (3) Karta rizika od poplava sadrži podatke o mogućim štetnim posljedicama poplava na zdravlje ljudi, životnu sredinu, kulturno naslijeđe, privrednu aktivnost i druge informacije od značaja za upravljanje rizikom od poplava.
- (4) Karte iz stava (1) ovog člana donosi šef Odjeljenja.
- (5) Odjeljenje vrši preispitivanje, a po potrebi ažuriranje karata iz stava (1) ovog člana, po isteku šest godina od dana njihove izrade.
- (6) Šef Odjeljenja podzakonskim aktom bliže utvrđuje sadržaj i metodologiju za izradu karata iz stava (1) ovog člana.

**Član 94.**  
**(Plan upravljanja rizicima od poplava)**

- (1) Planom upravljanja rizicima od poplava obezbjeđuje se upravljanje rizicima smanjivanjem mogućih štetnih posljedica poplava na zdravlje ljudi, životnu sredinu, kulturno naslijeđe i privrednu aktivnost.
- (2) Plan iz stava (1) ovog člana donosi se za teritoriju Distrikta, odnosno za vodno područje.
- (3) Plan iz stava (1) ovog člana izrađuje se na osnovu karti iz člana 93. ovog zakona, po metodologiji koja sadrži:
  - a) ciljeve upravljanja rizicima od poplava i mjere za njihovo postizanje;

- b) prioritete i način sprovođenja plana upravljanja rizicima od poplava;
  - c) nadležne organe i pravna lica;
  - d) sredstva potrebna za sprovođenje plana upravljanja rizicima od poplava;
  - e) način usklađivanja sa planom upravljanja vodama i
  - f) uključenje javnosti.
- (4) Plan upravljanja rizicima od poplava donosi, preispituje i ažurira se po postupku i na način donošenja plana upravljanja vodama.

**Član 95.**  
**(Opšti i operativni planovi odbrane od poplava)**

- (1) Odbrana od poplava organizuje se i sprovodi u skladu sa:
- a) opštim planom odbrane od poplava i
  - b) operativnim planovima odbrane od poplava.
- (2) Opšti plan odbrane od poplava naročito sadrži:
- a) radove i mjere koje se preduzimaju preventivno i u periodu nailaska spoljnih i unutrašnjih velikih voda;
  - b) način institucionalnog organizovanja odbrane od poplava;
  - c) dužnosti, odgovornosti i ovlaštenja rukovodilaca odbrane od poplava, organa i drugih lica nadležnih za odbranu od poplava;
  - d) način osmatranja i evidentiranja hidroloških i drugih podataka;
  - e) prognozu pojava i obavještanje.
- (3) Operativni plan odbrane od poplava sadrži podatke i mjere potrebne za efikasno sprovođenje odbrane od poplava i to:
- a) mjerodavne vodostaje;
  - b) vodna područja;
  - c) zaštitne objekte;
  - d) kriterijume za proglašenje redovne i vanredne odbrane od poplava;
  - e) način obavještanja;
  - f) imena rukovodilaca odbrane od poplava;
  - g) štabove za odbranu od poplava;
  - h) naziv organa odnosno pravnih lica koja sprovode odbranu od poplava i
  - i) sredstva za operativno sprovođenje zaštite.
- (4) Opšti plan odbrane od poplava donosi Vlada, na prijedlog šefa Odjeljenja za period od šest godina.
- (5) Operativni plan odbrane od poplava donosi Vlada, na prijedlog šefa Odjeljenja na period od jedne godine.
- (6) Operativni plan odbrane od poplava donosi se najkasnije do 30. novembra tekuće godine, za narednu godinu.
- (7) Operativni plan odbrane od poplava donose i pravna lica čija je imovina ugrožena štetnim djelovanjem voda.

**Član 96.**  
**(Odbrana od poplava)**

- (1) Odbranu od poplava čine mjere i aktivnosti, koje se preduzimaju usljed nailaska velikih spoljnih i unutrašnjih voda i usljed zagušenja ledom.
- (2) Odbrana od poplava može biti preventivna, redovna i vanredna, a spovodi se u skladu sa opštim planom i operativnim planom odbrane od poplava.
- (3) Preventivnu odbranu od poplava čine radnje i aktivnosti uređenja vodotoka.
- (4) U zavisnosti od stepena opasnosti odbrana od poplava može biti redovna i vanredna.
- (5) Redovna i vanredna odbrana od poplava se proglašava:
  - a) na riječnoj dionici, kada vodostaj dostigne kote propisane operativnim planom odbrane od poplava, a očekuje se dalji porast vodostaja, ili kada su zaštitni objekti ugroženi uslijed dugotrajno visokih vodostaja;
  - b) na melioracionom području, kada se utvrđenim režimom rada sistema za odvodnjavanje ne može spriječiti plavljenje melioracionog područja, odnosno njegovog dijela, a ispunjeni su kriterijumi i uslovi utvrđeni operativnim planom odbrane od poplava;
  - c) ako su, uslijed stvaranja, pokretanja i nagomilavanja leda na vodotoku ugroženi objekti na vodotoku i priobalju.
- (6) Mjere i aktivnosti redovne i vanredne odbrane od poplava su:
  - a) mjere na ugroženim područjima i zaštitnim vodnim objektima kojima se sprečava nastanak težih posljedica od poplava;
  - b) neprekidna dežurna služba u vrijeme opasnosti i za vrijeme trajanja velikih voda;
  - c) povećan nadzor nad zaštitnim objektima i na ugroženim područjima;
  - d) odstranjivanje naplavina u cilju povećanja kapaciteta protočnosti riječnog korita;
  - e) sprovođenje privremenih mjera kao što je postavljanje odbrambenog nasipa, nasipanje, saniranje proboja i drugo.
- (7) Za vršenje mjera i aktivnosti preventivne, redovne i vanredne odbrane od poplava Odjeljenje angažuje fizičko ili pravno lice.
- (8) Vlada, na prijedlog šefa Odjeljenja, podzakonskim aktom uređuje bliže uslove koje mora ispunjavati fizičko ili pravno lice iz stava (7) ovog člana.

**Član 97.**  
**(Obaveze sudjelovanja u odbrani od poplava)**

- (1) U slučaju da se odbrana od poplava ne može osigurati materijalnim sredstvima i ljudstvom predviđenim opštim i operativnom planom odbrane od poplava, pravna lica i građani sa područja ugroženih poplavama dužni su radom i materijalnim

sredstvima, mehanizacijom, vozilima, alatom i drugom opremom, građevinskim i drugim materijalom, sudjelovati u odbrani od poplava.

- (2) U slučaju iz stava (1) ovog člana, Vlada donosi odluku o sudjelovanju u odbrani od poplava.
- (3) U slučaju da sudjelovanje lica iz stava (1) ovog člana nije dovoljno za sprovođenja odbrane od poplava, Vlada utvrđuje obavezu sudjelovanja u odbrani od poplava i pravnih lica i građana sa drugih područja.
- (4) Pravnim licim i građanima iz stavova (1) i (3) ovog člana pripada naknada stvarnih troškova nastalih tokom sudjelovanja u odbrani od poplava.
- (5) Vlada, na prijedlog šefa Odjeljenja, utvrđuje podzakonskim aktom način utvrđivanja troškova i isplate stvarnih troškova iz stava (4) ovog člana.

#### **Član 98.**

##### **(Obaveze pravnog lica koje koristi brane sa akumulacionim i retenzionim basenima)**

- (1) Pravno lice koje koristi brane sa akumulacionim i retenzionim basenima, dužno je da ih održava i koristi na način kojim se obezbeđuje prihvatanje poplavnih talasa.
- (2) Lice iz stava (1) ovog člana dužno je da, u periodu redovne i vanredne odbrane od poplava, svakodnevno dostavi Odjeljenju podatke o stanju i stepenu napunjenosti akumulacionih basena.

#### **Član 99.**

##### **(Zaštita od leda)**

- (1) Ako se, zbog nagomilavanja leda, stvore ledene barijere koje mogu prouzrokovati poplave ili ako uslijed pokretanja leda u rijekama dođe ili može doći do oštećenja zaštitnih vodnih objekata i drugih objekata, u koritu i na priobalnom zemljištu preduzimaju se mjere i radovi za razbijanje leda, utvrđeni opštim i operativnim planom odbrane od poplava.
- (2) Radi zaštite od oštećenja mostova, prelaza preko vodotoka, vodnih, plovnih i drugih objekata i postrojenja vlasnik, odnosno korisnik tih objekata i postrojenja dužan je da preduzme mjere i radove iz stava (1) ovog člana.

#### **Član 100.**

##### **(Zaštita od erozije i bujica)**

- (1) Radi sprječavanja i otklanjanja štetnog djelovanja erozije i bujica sprovode se preventivne mjere, grade i održavaju vodni objekti za zaštitu od erozije i bujica i izvode zaštitni radovi u skladu sa planom upravljanja vodama i planom zaštite od erozije i bujica.
- (2) Preventivnim mjerama iz stava (1) ovog člana smatraju se:
  - a) zabranjene radnje:

- 1) pustošenje, krčenje i čista sječa šuma;
  - 2) ogoljavanje površina;
  - 3) nekontrolisano kopanje i preoravanje livada, pašnjaka i neobrađenih površina, radi uzgoja jednogodišnjih kultura;
  - 4) zatrpavanje izvora i nekontrolisano sakupljanje i odvođenje tih voda;
  - 5) dugotrajno skladištenje čvrstog materijala;
  - 6) izgradnja objekata bez odgovarajuće planske i projektne dokumentacije;
  - 7) dislociranje ili vađenje materijala sa dna ili padina, osim za potrebe obezbjeđenja propusne sposobnosti korita bujica;
  - 8) izgradnja objekata koji bi mogli da ugroze stabilnost zemljišta, kao što su vodenice, brane, kanali, ribnjaci i slično;
  - 9) druge radnje kojima se pospješuje erozija i stvaranje bujica;
- b) korišćenje poljoprivrednog i drugog zemljišta u skladu sa zahtjevima antierozionog uređenja zemljišta.
- (3) Zaštitnim radovima iz stava (1) ovog člana smatraju se biotehnički i biološki zaštitni radovi i to:
- a) pošumljavanje;
  - b) uzgoj i održavanje zaštitne vegetacije;
  - c) krčenje rastinja;
  - d) zatravljivanje;
  - e) terasiranje, podizanje voćnjaka i vještačkih livada;
  - f) melioracija pašnjaka;
  - g) čišćenje korita i
  - h) drugi slični radovi.

### **Član 101.**

#### **(Osmatranje, mjerenje i rano upozoravanje)**

- (1) Osmatranje i mjerenje prirodnih pojava koje se odnose na zaštitu od štetnog djelovanja voda obuhvata naročito:
- a) praćenje i prognozu vanrednih hidroloških stanja i prirodnih pojava kao što su poplave, pojava bujica i erozije i leda na vodotocima;
  - b) praćenje i prognozu vanrednih meteoroloških stanja;
  - c) praćenje stanja visokih pregrada (brana) na osnovu podataka monitoringa vodnih objekata ili vodnih objekata iz člana 35. ovog zakona;
  - d) praćenje stanja i drugih vodnih objekata značajnih za zaštitu od štetnog djelovanja voda.
- (2) Centar za obavještanje Brčko distrikta BiH osigurava pravovremeno obavještanje Odjeljenja i stanovništva na ugroženim područjima o osmatranjima i mjerenjima iz stava (1) ovog člana.

### **Član 102.**

#### **(Sanacije posljedica štetnog djelovanja voda)**

- (1) Sanacija posljedica štetnog djelovanja voda izvodi se na osnovu programa sanacije kojim se utvrđuje vrste i obim potrebnih radova i mjera.



- (2) Ako su posljedice štetnog djelovanja voda nastale na vodnom, priobalnom ili drugom zemljištu, ili na vodnoj infrastrukturi ili drugom vodnom objektu i uređaju koji je u vlasništvu Distrikta, sredstva za njihovu sanaciju osigurava Distrikt.
- (3) Ako su posljedice štetnog djelovanja voda nastale na vodnom objektu ili uređaju namijenjenom za posebnu upotrebu voda i vodnog dobra koji nije u vlasništvu Distrikta, njegovu sanaciju osigurava vlasnik ili operator.
- (4) Ako lice iz stava (3) ovog člana ne izvrši sanaciju, a od značaja je za funkcionisanje sistema zaštite od štetnog djelovanja voda, Odjeljenje izvršava sanaciju a na teret tog lica.
- (5) Fizičko, odnosno pravno lice koje je prouzrokovalo štetu na vodnom objektu u javnoj svojini dužno je izvršiti sanaciju ili nadoknaditi troškove sanacije.
- (6) Program sanacije iz stava (1) ovog člana donosi Vlada, na prijedlog šefa Odjeljenja, u roku od šest mjeseci od dana procjene štete.
- (7) Procjena štete vrši se u skladu sa ovim i zakonom iz oblast zaštite od prirodnih i drugih nesreća.

## **POGLAVLJE VIII. ZAŠTITA VODA OD ZAGAĐIVANJA**

### **Odjeljak A. Zaštita voda od zagađivanja**

#### **Član 103. (Zaštita voda od zagađivanja)**

- (1) Zaštita voda od zagađivanja obuhvata skup mjera i aktivnosti kojima se štiti i unapređuje kvalitet voda do nivoa propisanog za korištenje po pojedinim namjenama.
- (2) Zaštita voda od zagađivanja sprovodi se radi:
  - a) očuvanja života i zdravlja ljudi;
  - b) smanjenja zagađenja i sprečavanja daljeg pogoršanja stanja voda;
  - c) obezbjeđenja neškodljivog i nesmetanog korištenja voda za različite namjene;
  - d) zaštite akvatičnih i poluakvatičnih ekosistema i
  - e) postizanja standarda kvaliteta životne sredine.
- (3) Zaštita voda od zagađivanja sprovodi se zabranom, ograničavanjem i sprječavanjem unošenja u vode opasnih i štetnih materijala, propisivanjem, nalaganjem i preduzimanjem drugih mjera za očuvanje i poboljšanje kvaliteta voda.

#### **Član 104. (Ciljevi zaštite životne sredine)**

- (1) Ciljevi zaštite životne sredine su:

- a) sprječavanje pogoršanja stanja vodnih tijela površinskih i podzemnih voda i postizanje njihovog najmanje dobrog stanja;
  - b) postizanje dobrog ekološkog potencijala i dobrog hemijskog stanja vještačkih ili značajno izmjenjenih vodnih tijela;
  - c) zaštita, unapređenje i obnova vodnih tijela površinskih voda radi postizanja stanja iz tačaka a) i b) ovog člana;
  - d) zaštita, unapređenje i obnova vodnih tijela podzemnih voda radi postizanja stanja iz tačke a) ovog člana;
  - e) sprovođenje progresivnog smanjenja zagađenja vodnih tijela površinskih voda prioritarnim materijama;
  - f) postepeno smanjenje zagađenja vodnih tijela podzemnih voda uzrokovanog ljudskom aktivnošću;
  - g) harmonizacija standarda i ciljeva zaštite voda u zaštićenim zonama prema kojima su uspostavljena pojedina zaštićena područja iz tačke d) stav (1) ovog člana, sa međunarodnim standardima za takvu zaštitu.
- (2) Najduži rok za ostvarivanje ciljeva iz stava (1) tačke a), b) i g) ovog člana je 15 godina od dana stupanja na snagu ovog zakona.

#### **Član 105.** **(Modifikacija ciljeva životne sredine)**

Za određena vodna tijela koja su jače ugrožena ljudskim aktivnostima ili je njihovo prirodno stanje takvo da bi postizanje ciljeva zaštite životne sredine bilo teško izvodivo ili nesrazmjerno skupo, mogu se uspostaviti manje zahtjevni ciljevi od ciljeva iz člana 104. ovog zakona, ako su ispunjeni sljedeći uslovi:

- a) da se potrebe zaštite životne sredine i društveno-ekonomske potrebe ne mogu ostvariti na drugi način, iako bi to bila znatno bolja opcija po životnu sredinu, ali je ona neracionalno skupa;
- b) da je postignuto najmanje umjereno stanje za površinske vode, uz uticaje koji se objektivno nisu mogli izbjeći zbog karaktera ljudske aktivnosti ili zagađenja;
- c) da se osiguraju najmanje moguće promjene dobrog stanja podzemnih voda, uz uticaje koji se objektivno nisu mogli izbjeći zbog karaktera ljudske aktivnosti ili zagađenja;
- d) da ne dolazi do daljeg pogoršanja stanja određenog vodnog tijela i
- e) da su razlozi za uspostavljanje manje zahtjevnih ciljeva zaštite životne sredine izričito navedeni u planu upravljanja vodama.

#### **Član 106.** **(Izuzeci u odnosu na ciljeve zaštite životne sredine)**

- (1) Izuzeci od ciljeva iz člana 104. ovog zakona mogu se predvidjeti planom upravljanja vodama kada je:
  - a) zbog promjene karakteristika vodnog tijela nemoguće postići dobro stanje podzemnih voda, dobro ekološko stanje površinskih voda ili, gdje je to značajno, dobar ekološki potencijal vještačkog vodnog tijela i gdje je nemoguće spriječiti pogoršanje stanja vodnih tijela;

- b) uslijed ljudskih aktivnosti u sklopu održivog razvoja nemoguće spriječiti pogoršanje vodnog tijela iz visokog u dobro stanje.
- (2) Izuzeci od ciljeva zaštite životne sredine mogu se predvidjeti ako:
- a) su preduzeti svi koraci za ublažavanje negativnog uticaja na stanje vodnog tijela;
  - b) su razlozi modifikacije i promjene navedeni i objašnjeni u planu upravljanja vodama;
  - c) su koristi za ljudsko zdravlje, sigurnost i održivi razvoj veće od onih koje bi se postigle ispunjavanjem ciljeva iz člana 104. ovog zakona;
  - d) se koristi, koje su dobivene ovim modifikacijama ili promjenama, ne mogu postići na drugi način zbog tehničke neizvodivosti ili nerealno visokih troškova.
- (3) Manje strogi ciljevi zaštite životne sredine uspostavljeni u planovima upravljanja vodama revidiraju se svakih šest godina.

### **Član 107.**

#### **(Postepeno postizanje ciljeva zaštite životne sredine)**

- (1) Rokovi iz člana 104. stav (2) ovog zakona, mogu se produžiti u planu upravljanja vodama za svrhe postepenog postizanja ciljeva zaštite životne sredine, pod uslovom da ne dođe do daljnjeg pogoršanja stanja vodnog tijela, ako bi:
- a) postizanje poboljšanja u određeno vrijeme bilo tehnički neizvodljivo ili nesrazmjerno skupo;
  - b) prirodni uslovi onemogućili blagovremeno poboljšanje stanja vodnog tijela.
- (2) Produženje rokova i razlozi za produženje posebno se razrađuju i obrazlažu u planu upravljanja vodama.
- (3) Produženja rokova iz stava (1) ovog člana je ograničeno najduže na period do narednog ažuriranja plana upravljanja vodama, izuzev, ako u tom periodu, prirodni uslovi ne dozvoljavaju postizanje ciljeva.

### **Član 108.**

#### **(Klasifikacija stanja vodnih tijela)**

- (1) Klasifikacija stanja vodnih tijela površinskih i podzemnih voda određuje se na osnovu jačine promjena uzrokovanih ljudskim aktivnostima.
- (2) Stanje vodnog tijela površinskih voda određuje se njegovim ekološkim i hemijskim stanjem, zavisno od toga koje je lošije.
- (3) Ekološko stanje vodnog tijela površinskih voda klasifikuje se kao visoko, dobro, umjereno, slabo i loše.
- (4) Hemijsko stanje vodnog tijela površinskih voda klasifikuje se kao dobro i loše.

- (5) Klasifikacija se vrši prema referentnim uslovima koji se utvrđuju podzakonskim propisom iz člana 15. stav (13) ovog zakona.
- (6) Stanje vodnog tijela podzemne vode određuje se njegovim kvantitativnim i hemijskim stanjem zavisno od toga koje je lošije.
- (7) Za vještačka i značajno izmijenjena vodna tijela podzemnih voda primjenjuju se uslovi za određivanje ekološkog stanja vodnih tijela površinskih voda iz stava (5) ovog člana, uzimajući one koji su im najbliži.
- (8) Referentni uslov za kvalifikovnje visokog ekološkog stanja vodnog tijela je maksimalni ekološki potencijal vodnog tjela.

## **Odjeljak B. Planiranje zaštite voda od zagađivanja**

### **Član 109. (Plan zaštite voda od zagađivanja)**

- (1) Zaštita voda sprovodi se u skladu sa planom zaštite voda od zagađivanja.
- (2) Plan zaštite voda od zagađivanja naročito sadrži:
  - a) mjere za kontrolu, sprječavanje, prekidanje i smanjivanje unošenja u površinske i podzemne vode opasnih materija;
  - b) mjere za sprečavanje unošenja i odlaganje otpadnih i drugih materija na područjima na kojima to može uticati na pogoršanje kvaliteta voda;
  - c) mjere za prečišćavanje otpadnih voda;
  - d) mjere prevencije i kontrole unošenja opasnih materija, radi sprečavanja njihovog uticaja;
  - e) mjere zaštite akvatičnih i poluakvatičnih ekosistema od opasnih i prioriternih materija, uključujući i prioritne opasne materije;
  - f) način sprovođenja interventnih mjera u određenim slučajevima zagađivanja;
  - g) organe i pravna lica koji su dužni sprovesti pojedine mjere i radove;
  - h) rokove za smanjenje zagađivanja vode;
  - i) odgovornosti i ovlaštenja u vezi sa sprovođenjem zaštite voda, izgradnje objekata, sa pratećim uređajima za prečišćavanje otpadnih voda i
  - j) druge mjere potrebne za zaštitu i unapređenje kvaliteta voda.
- (3) Sastavni dio plana iz stava (1) ovog člana je i klasifikacija vodnih tijela površinskih i podzemnih voda utvrđena u skladu sa ovim zakonom.
- (4) Plan iz stava (1) ovog člana usklađuje se sa strategijom i planom upravljanja vodama.

**Član 110.**  
**(Donošenje plana)**

- (1) Plan zaštite voda od zagađivanja donosi Vlada, na prijedlog šefa Odjeljenja, za period od šest godina.
- (2) Odjeljenje svake druge godine, računajući od dana donošenja plana zaštite voda od zagađivanja, podnosi izvještaj Vladi o izvršenju tog plana.

**Odjeljak C. Zabrane i obaveze zagađivača**

**Član 111.**  
**(Zabrane radi zaštite kvaliteta vode)**

Radi zaštite kvaliteta voda, zabranjeno je:

- a) unošenje u površinske i podzemne vode otpadnih voda koje sadrže opasne i prioritete materije iznad propisanih graničnih vrijednosti emisije koje mogu dovesti do pogoršanja trenutnog stanja;
- b) ispuštanje otpadne vode u stajaće vode, ako je ta voda u kontaktu sa podzemnom vodom, koja može prouzrokovati ugrožavanje dobrog ekološkog ili hemijskog stanja stajaće vode;
- c) ispuštanje sa plovnih objekata ili sa obale opasnih materija koje direktno ili indirektno dospjevaju u vode, a potiču od bilo kog uređaja sa broda ili uređaja za prebacivanje na brod ili sa broda;
- d) ispuštanje prekomjerno termički zagađene vode;
- e) korištenje đubriva ili sredstava za zaštitu bilja u obalnom pojasu do 5 m;
- f) ispuštanje u javnu kanalizaciju otpadnih voda koje sadrže opasne materije iznad propisanih vrijednosti:
  - 1) koje mogu štetno djelovati na mogućnost prečišćavanja voda iz kanalizacije;
  - 2) koje mogu oštetiti kanalizacioni sistem i postrojenje za prečišćavanje voda;
  - 3) koje mogu negativno uticati na zdravlje lica koja održavaju kanalizacioni sistem;
- g) korištenje napuštenih bunara kao septičkih jama;
- h) ostavljanje, u koritu za veliku vodu prirodnih i vještačkih vodotoka i jezera, kao i na drugom zemljištu, materijala koji mogu zagađivati vode;
- i) pranje vozila, mašina, opreme i uređaja u površinskim vodama i na vodnom zemljištu.

**Član 112.**  
**(Granične vrijednosti emisije)**

- (1) Radi sprječavanja pogoršanja kvaliteta vode i životne sredine, određuju se granične vrijednosti emisije za određene grupe ili kategorije opasnih materija, i to za:
  - a) tehnološke otpadne vode prije njihovog ispuštanja u javnu kanalizaciju;
  - b) tehnološke i druge otpadne vode koje se neposredno ispuštaju u recipijent;

- c) vode koje se posle prečišćavanja ispuštaju iz sistema javne kanalizacije u recipijent;
  - d) otpadne vode koje se ispuštaju u recipijent iz septičke i sabirne jame.
- (2) Vlada, na prijedlog šefa Odjeljenja donosi podzakonski akt kojim utvrđuje:
- a) granične vrijednosti emisije iz stava (1) ovog člana, kao i rokove za njihovo dostizanje;
  - b) granične vrijednosti opasnih materija u površinskim i podzemnim vodama i sedimentu, uključujući i prioritete opasne materije u površinskim vodama i rokove za njihovo dostizanje.

### **Član 113.**

#### **(Obaveza prečišćavanja otpadnih voda)**

- (1) Fizičko, odnosno pravno lice koje ispušta ili odlaže materije koje mogu zagaditi vodu dužno je te materije, prije ispuštanja u sistem javne kanalizacije ili recipijent, djelimično ili potpuno odstraniti, u skladu sa ovim zakonom i posebnim zakonima.
- (2) Fizičko, odnosno pravno lice koje ispušta otpadnu vodu neposredno u recipijent dužno je obezbjediti prečišćavanje otpadnih voda do nivoa koji odgovara graničnim vrijednostima emisije, odnosno do nivoa kojim se ne narušavaju standardi kvaliteta životne sredine recipijenta, uzimajući od ova dva kriterija kojim je utvrđen strožiji nivo.
- (3) Radi obezbjeđivanja prečišćavanja otpadnih voda, lice koje ispušta otpadnu vodu u recipijent ili javnu kanalizaciju dužno je obezbjediti sredstva i utvrditi rokove za izgradnju i pogon uređaja za prečišćavanje otpadnih voda, u skladu sa planom zaštite voda od zagađivanja i posebnim zakonom koji uređuju oblast zaštite životne sredine.
- (4) Vlada, na prijedlog šefa Odjeljenja, podzakonskim aktom utvrđuje uslove i način ispuštanja otpadnih voda u javnu kanalizaciju.

### **Član 114.**

#### **(Obaveza mjerenja količine i ispitivanja kvaliteta otpadnih voda)**

- (1) Pravno lice koje ispušta otpadne vode u recipijent i javnu kanalizaciju, dužno je postaviti uređaje za mjerenje, kontinuirano mjeriti količine otpadnih voda i ispitivati biohemijske i mehaničke parametre kvaliteta otpadnih voda.
- (2) Pravno lice koje ima uređaje za prečišćavanje otpadnih voda, dužno je mjeriti količine i ispitivati kvalitet otpadnih voda prije i poslije prečišćavanja, obezbjediti redovno funkcionisanje uređaja za prečišćavanje otpadnih voda i voditi dnevnik njihovog rada.
- (3) Pravna lica iz stavova (1) i (2) ovog člana dostavljaju izvještaje o izvršenim mjerenjima kvartalno Odjeljenju i Odjeljenju za prostorno planiranje.
- (4) Mjerenja količina i ispitivanje kvaliteta otpadnih voda vrši ovlašteno pravno lice, u skladu sa ovim zakonom.

- (5) Vlada, na prijedlog šefa Odjeljenja, podzakonskim aktom utvrđuje način i uslove za mjerenje količine i ispitivanje kvaliteta otpadnih voda i sadržaj izvještaja o izvršenim mjerenjima, kao i uslove koje je ovlašteno lice iz stava (4) ovog člana dužno ispunjavati u pogledu opreme i kadra.

#### **Član 115.**

##### **(Obaveza kontrole ispravnosti objekata)**

- (1) Pravno lice koje vrši sakupljanje, odvođenje i prečišćavanje otpadnih voda i zaštitu voda dužno je obezbijediti kontrolu ispravnosti objekata za sakupljanje, odvođenje i prečišćavanje otpadnih voda svakih pet godina u pogledu vodonepropusnosti.
- (2) Pravno lice iz stava (1) ovog člana dužno je jedanput godišnje obezbijediti kontrolu ispravnosti uređaja za mjerenje količina otpadnih voda.
- (3) U cilju kontrole ispravnosti objekata iz stava (1) i uređaja iz stava (2) ovog člana pravno lice angažuje drugo pravno lice koje je ovlašteno za tu vrstu poslova.
- (4) Ovlašteno pravno lice iz stava (3) ovog člana izdaje potvrdu o ispravnosti objekta iz stava (1) i uređaja iz stava (3) ovog člana.
- (5) Obaveza vršenja kontrole ispravnosti objekata iz stava (1) ovog člana odnosi se i na septičke i sabirne jame.

#### **Član 116.**

##### **(Obaveze u slučaju neposredne opasnosti od zagađivanja)**

- (1) Ako dođe do neposredne opasnosti od zagađivanja, odnosno do zagađivanja površinskih i podzemnih voda, fizičko, odnosno pravno lice iz člana 113. ovog zakona dužno je preduzeti mjere za sprječavanje, odnosno za smanjivanje i sanaciju zagađenja voda i planirati sredstva i rokove za njihovo ostvarivanje.
- (2) Ako fizičko, odnosno pravno lice ne preduzme mjere za smanjivanje i sanaciju zagađenja voda iz stava (1) ovog člana, Odjeljenje preuzima potrebne mjere na teret tog lica.

#### **Član 117.**

##### **(Obaveza zaštite voda od zagađivanja sa plovnih objekata)**

U luci, pristaništu, marini i zimovniku moraju biti postavljeni uređaji za preuzimanje otpadnih mineralnih ulja, uljnih smješa, otpadnih voda i drugih otpadnih materija sa plovnih objekata, u skladu sa posebnim zakonom.

#### **Član 118.**

##### **(Obaveza održavanja uređaja za mineralna ulja)**

Vlasnik, odnosno korisnik naftovoda i uređaja za prihvatanje, preradu i čuvanje mineralnih ulja, dužan je iste održavati na način da onemogući oticanje i curenje ulja u vode, u skladu sa posebnim zakonom.

**Član 119.**  
**(Obaveza prijave zagađenja)**

Ako građanin, vlasnik, odnosno korisnik dijela obale, zapovjednik plovnog objekta i drugo odgovorno lice na plovnom objektu primijeti da je došlo do zagađivanja voda u vodotoku ili jezeru, dužno je, bez odlaganja obavijestiti Policiju i nadležnog inspektora.

**Član 120.**  
**(Postupanje usljed iznadne opasnosti)**

- (1) Ako je usljed iznenadnog slučaja, kvara ili iz drugih razloga nastala opasnost zagađenja vode i obalnog vodnog zemljišta, lice ili operator, u vezi sa čijim je djelovanjem ili propustom nastala ta opasnost, dužno je bez odlaganja:
  - a) preduzeti sve potrebne mjere za sprečavanje ili ublažavanje uticaja koji su prouzrokovali iznenadnu opasnost;
  - b) spriječiti ponovni nastanak opasnosti;
  - c) o nastaloj opasnosti obavijestiti nadležne organe: Odjeljenje, Odjeljenje za javnu sigurnost, Odjeljenje za zdravstvo, Odjeljenje za prostorno planiranje, Policiju, vodoprivrednog inspektora, inspektora za zaštitu životne sredine.
- (2) Svako lice ili ovlašteno pravno lice koje vrši monitoring stanja voda dužno je da, po saznanju nastanka opasnosti iz stava (1) ovog člana, bez odlaganja o tome obavijesti nadležne organe: Odjeljenje, Odjeljenje za javnu sigurnost, Policiju, vodoprivrednog inspektora i inspektora za zaštitu životne sredine.
- (3) Poduzimanje potrebnih mjera za otklanjanje ili sprečavanje zagađenja vrši se u skladu sa planom iz člana 109. ovog zakona, na teret lica iz stava (1) ovog člana.
- (4) Šef Odjeljenja za prostorno planiranje uz saglasnost šefa Odjeljenja donosi pravilnik o postupcima i mjerama u slučaju akcidenta na vodama i obalnom vodnom zemljištu.

**Odjeljak D. Monitoring voda i zaštićenih područja**

**Član 121.**  
**(Monitoring voda)**

- (1) Monitoring voda je proces stalnog posmatranja jednog ili više pokazatelja kvaliteta i kvantiteta voda, prema utvrđenom programu monitoringa voda.
- (2) Program monitoringa voda uzima u obzir i zaštitu akvatičnih i poluakvatičnih ekosistema i vrsta koje direktno zavise od vode.
- (3) Distrikt uspostavlja i obezbjeđuje jasan i sveobuhvatan monitoring voda na vodnom području rijeke Save radi obezbjeđivanja jasnog, usaglašenog i sveobuhvatnog pregleda stanja površinskih i podzemnih voda.



- (4) Monitoring se organizuje na način da blagovremeno i vjerodostojno obezbjeđuje sljedeće podatke:
- a) za površinske vode: zapreminu, vodostaj i proticaj do stepena značajnog za ekološki i hemijski status i dobar ekološki potencijal, kao i parametre ekološkog i hemijskog statusa i ekološkog potencijala;
  - b) za podzemne vode: nivoe i kontrolu hemijskog i kvantitativnog statusa;
  - c) stanje akvatičnih i poluakvatičnih ekosistema;
  - d) ostale elemente utvrđene odredbama ovog zakona.
- (5) Monitoring voda u zaštićenim područjima obuhvata i dodatne pokazatelje stanja voda, u skladu sa podzakonskim aktom iz člana 127. stav (2) ovog zakona.

**Član 122.**  
**(Godišnji program monitoringa)**

- (1) Monitoring voda izvršava se u skladu sa godišnjim programom monitoringa voda.
- (2) Godišnji program monitoringa voda naročito sadrži:
- a) broj i položaj mjernih profila na površinskim vodama;
  - b) broj i položaj pijeometara i drugih objekata za mjerenje količine i nivoa podzemnih voda;
  - c) način i broj mjerenja količine i nivoa površinskih i podzemnih voda;
  - d) način i postupak ispitivanja kvaliteta voda;
  - e) broj i uslove u kojima se vrši ispitivanje;
  - f) sadržaj izvještaja o utvrđenom kvalitetu voda.
- (3) Godišnji program monitoringa voda donosi šefa Odjeljenja.

**Član 123.**  
**(Sprovođenje godišnjeg programa monitoringa voda)**

- (1) Monitoring voda sprovodi Odjeljenje u skladu sa godišnjim programom monitoringa voda.
- (2) Mjerenje i ispitivanje kvaliteta voda iz godišnjeg programa monitoringa voda vrši ovlašteno pravno lice.
- (3) Pravno lice iz stava (2) ovog člana dužno je sačiniti godišnji izvještaj o stanju i promjenama kvaliteta voda i isti dostaviti Odjeljenju.
- (4) Odjeljenje je dužno omogućiti korištenje rezultata monitoringa svim zainteresovanim fizičkim, odnosno pravnim licima bez naknade.
- (5) Šef Odjeljenja podzakonskim aktom bliže propisuje radnje i aktivnosti koje se odnose na monitoring voda.

## **Član 124.**

### **(Obaveza operatora da sprovodi praćenje stanja voda i izvještavanje)**

- (1) Operator je obavezan da, o svom trošku, za vlastite ili objekte kojima upravlja, vrši praćenje stanja voda u odnosu na količine, uticaj na vode izazvan postrojenjima ili aktivnostima i da podnosi izvještaje o podacima praćenja stanja voda kako je određeno u vodnom aktu, odnosno u ugovoru o koncesiji ili programu monitoringa voda iz člana 122. ovog zakona.
- (2) Ukoliko operator ne izvrši radnje iz stava (1) ovog člana, Odjeljenje upozorava operatora o obavezi iz stava (1) ovog člana.
- (3) Ukoliko operator nakon tri mjeseca od upozorenja iz stava (2) ovog člana, ne izvrši obavezu iz stava (1) ovog člana, potrebne radnje obezbjeđuje Odjeljenje na teret operatora.

## **Odjeljak E. Zaštićena područja**

### **Član 125.**

#### **(Zaštićena područja)**

- (1) Zaštićena područja su područja koja zahtijevaju posebnu zaštitu u skladu sa ovim zakonom i posebnim propisima.
- (2) Zaštićena područja na vodnom području su:
  - a) zone sanitarne zaštite izvorišta iz člana 73. ovog zakona;
  - b) područja rezervne vode;
  - c) područja vodnih tijela namjenjenih zaštiti prirode, odnosno ekonomski važnih akvatičnih vrsta;
  - d) područja vodnih tijela namjenjena rekreaciji, uključujući i područja određena za kupanje;
  - e) područja podložna eutrofikaciji i područja osjetljiva na nitrate;
  - f) područja namijenjena zaštiti staništa ili vrsta gdje je održavanje ili poboljšanje stanja voda bitan uslov za njihov opstanak i reprodukciju.
- (3) Odjeljenje vodi registre zaštićenih područja iz stava (1) ovog člana.
- (4) Registri iz stava (2) ovog člana naročito sadrže podatke o položaju i karakteristikama zaštićenih područja.
- (5) Šef Odjeljenja, uz prethodnu saglasnost šefa Odjeljenja za prostorno planiranje i šefa Odjeljenja za zdravstvo, podzakonskim aktom utvrđuje kriterijume i način određivanja zaštićenih područja iz stava (1) ovog člana, sadržaj i način vođenja registara iz stava (3) ovog člana, kao i detaljnije obaveze, ograničenja i zabrane u zaštićenom području.

### **Član 126.**

#### **(Obaveze, ograničenja i zabrane u zaštićenim područjima)**

- (1) U zaštićenom području, mogu se ograničiti ili zabraniti radnje ili aktivnosti koje mogu ugroziti kvantitativno ili kvalitativno stanje voda.
- (2) Vlasnik ili posjednik zemljišta u zaštićenom području je obavezan sprovoditi mjere za zaštitu kvantiteta i kvaliteta voda.
- (3) Ograničenja i zabrane, periodično se preispituju i redefinišu u zavisnosti od rezultata praćenja stanja voda.
- (4) Primjena dobre poljoprivredne prakse, obavezna je u osjetljivim područjima.
- (5) Šef Odjeljenja podzakonskim aktom iz člana 125. stav (5) ovog zakona detaljnije utvrđuje obaveze, ograničenja i zabrane u zaštićenom području.

**Član 127.**  
**(Monitoring voda u zaštićenom području)**

- (1) Monitoring voda u zaštićenom području je obavezan i obuhvata monitoring vode i monitoring aktivnost u zaštićenim području.
- (2) Šef Odjeljenja podzakonskim aktom utvrđuje način monitoringa voda u zaštićenom području.

**Član 128.**  
**(Renaturalizacija površinskih voda)**

- (1) U cilju poboljšanja narušene prirodne ravnoteže ekosistema površinskih voda šef Odjeljenje, u saradnji sa Odjeljenjem za prostorno planiranje, daje inicijativu za sprovođenje njihove renaturalizacije.
- (2) Mjere i metode renaturalizacije utvrđuju se planom upravljanja vodama, a sprovode se u saradnji sa Odjeljenjem za prostorno planiranje.
- (3) Renaturalizacija može biti okarakterisana kao hitna, potrebna ili preporučljiva o čemu odlučuje šef Odjeljenja uz saglasnost šefa Odjeljenja za prostorno planiranje.
- (4) Šef Odjeljenja podzakonskim aktom utvrđuje kriterije klasifikacije renaturalizacije.

**Član 129.**  
**(Ograničenje u svrhu zaštite akvatičnih i poluakvatičnih organizama)**

- (1) U cilju zaštite akvatičnih i poluakvatičnih organizama i njihovih staništa pri opterećivanju vode ili vodnog zemljišta, vodi se računa o:
  - a) održavanju uslova za reprodukciju akvatičnih i poluakvatičnih organizama;
  - b) održavanju odgovarajućih uslova u zimskim skloništima akvatičnih i poluakvatičnih organizama;
  - c) održavanju ostalih uslova vezanih za održanje i razvoj akvatičnih i poluakvatičnih organizama, uključujući njihovu zamjenu i obogaćivanje;
  - d) očuvanje postignutih ciljeva iz članu 104. ovog zakona.

- (2) Obaveze iz stava (1) ovog člana, utvrđuju se vodnim aktom.
- (3) Šef Odjeljenja za prostorno planiranje podzakonskim aktom utvrđuje detaljnije metode i uslove zaštite za pojedinačne slučajeve opterećenja voda, obala ili vodnog zemljišta u skladu sa posebnim propisima.

## **POGLAVLJE IX. VODNI AKTI**

### **Član 130. (Vodni akti i vrste vodnih akata)**

- (1) Vodni akti su upravni akti kojima se utvrđuje neko pravo, obaveza ili pravni interes za treće fizičko ili pravno lice.
- (2) Vodnim aktima utvrđuju se uslovi i način ostvarivanja prava na vodu, radi obezbjeđenja jedinstvenog vodnog režima i ostvarivanja upravljanja vodama i pravičnog pristupa vodama.
- (3) Vodni akti su:
  - a) vodna smjernica,
  - b) vodna saglasnost i
  - c) vodna dozvola.
- (4) Vodne akte izdaje Odjeljenje.
- (5) Postupak za izdavanje vodnih akata sprovodi se u skladu sa Zakonom o upravnom postupku Brčko distrikta Bosne i Hercegovine (u daljem tekstu: Zakon o upravnom postupku), osim ako ovim zakonom nije drukčije propisano.

### **Član 131. (Aktivnosti za koje se izdaju vodni akti)**

- (1) Vodni akti se izdaju za sljedeće aktivnosti:
  - a) zahvatanje voda u svim privrednim granama i djelatnostima, a naročito, i ne ograničavajući se, za:
    - 1) industriju i energetiku;
    - 2) poljoprivredu;
    - 3) snabdijevanje vodom;
    - 4) uslužne djelatnosti koje u tehnološkom postupku koriste vodu i ispuštaju tehnološke otpadne vode;
    - 5) turističke, sportske i rekreacione djelatnosti;
  - b) ispuštanje otpadnih voda u površinske vode;
  - c) ispuštanje tehnoloških otpadnih voda iz člana 112. ovog zakona u javni kanalizacioni sistem;
  - d) indirektno ispuštanje otpadnih voda u podzemne vode;
  - e) vještačko prihranjivanje podzemnih voda;
  - f) dislociranje ili vađenje materijala iz vodotoka;
  - g) izgradnja objekata za iskorištavanje hidroenergije;

- h) trajno podizanje nivoa vode i kao rezultat toga plavljenje zemljišta;
  - i) izgradnja vodnih objekata iz članova 29., 30., 31., 32. ovog zakona;
  - j) izgradnja vodnih objekata za plovidbu;
  - k) izgradnja saobraćajnica;
  - l) izgradnja mosta ili nekog drugog objekta iznad ili u vodotoku ili na vodnom zemljištu;
  - m) izgradnja ili uređenje deponija otpada;
  - n) u postupku dodjele koncesija,
  - o) za promet opasnih materija, kao i proizvoda od tih materija koji nakon upotrebe dospijevaju u vode;
  - p) za uzgoj riba;
  - q) za postavljanje kanalizacije, vodovoda, gasovoda, električnih, telefonskih, telegrafskih vodova, optičkih kablova i sličnih instalacija.
- (2) Izuzetno od stava (1) ovog člana, vodna dozvola se ne izdaje za aktivnosti iz stava (1) tačka f) ovog člana.
- (3) Pored aktivnosti navedenih u stavu (1) ovog člana, vodni akti se izdaju i za aktivnosti koje mogu:
- a) privremeno ili trajno da degradiraju kvalitet voda, ili ometaju poboljšanje njihovog postojećeg kvaliteta;
  - b) da štetno utiču na akvatične i poluakvatične ekosisteme;
  - c) da povećaju rizik od štetnog djelovanje voda;
  - d) da značajno:
    - 1) smanje kvantitet voda;
    - 2) promijene morfologiju vodotoka;
    - 3) izmijene dubinu, nivo vode ili protok vodotoka;
    - 4) ometaju korištenje površinskih voda u rekreacione svrhe.
- (4) Aktivnosti iz stavova (1) i (3) ovog člana detaljnije se uređuju podzakonskim aktom iz člana 134. stav (6) ovog zakona.

### **Član 132.** **(Objekti i aktivnosti za koje nije potreban vodni akt)**

- (1) Vodni akt nije potreban za:
- a) korištenje vode koja ne prelazi obim opšte upotrebe vode iz člana 62. ovog zakona;
  - b) aktivnosti i objekte koji obezbjeđuju vodu za redovne porodične djelatnosti priključkom na javni vodovodni sistem, a ispuštanje otpadnih voda vrše u javni kanalizacioni sistem;
  - c) građenje novih i rekonstrukciju postojećih stambenih objekata koji se priključkom na javni vodovodni sistem snabdijevaju vodom, a ispuštanje otpadnih voda vrše u javni kanalizacioni sistem;
  - d) održavanje prirodnih i veštačkih vodotoka i inundacionih područja za obezbjeđenje propusne sposobnosti, regulacionih i zaštitnih objekata i vodnih objekata osnovne kanalske mreže za odvodnjavanje koje obezbjeđuje Odjeljenje;

- e) objekte i aktivnosti koji ne podliježu obavezi pribavljanja ekološke dozvole u smislu odredbi Zakona o zaštiti životne sredine Brčko distrikta Bosne i Hercegovine (u daljem tekstu: Zakon o zaštiti životne sredine), a koji vodu za obavljanje privredne djelatnosti osiguravaju priključkom na javni vodovodni sistem i ispuštaju otpadne vode u javni kanalizacioni sistem.
- (2) Objekti i aktivnosti iz stava (1) ovog člana detaljnije se uređuju podzakonskim aktom iz člana 134. stav (6) ovog člana.

**Član 133.**  
**(Obaveze imaoca prava na korištenje voda)**

Vodnim aktom može se, na osnovu Strategije ili plana upravljanja vodama, odrediti da imalac prava na korištenje voda:

- a) kod planiranja, izgradnje i rada objekta, omogući i korištenje tog objekta za zaštitu od štetnog djelovanja voda;
- b) omogući korištenje vodnog objekta i za opštu upotrebu voda ili za snabdijevanje vodom za piće, ako to suštinski ne pogoršava uslove sprovođenja njegovog prava na korištenje voda.

**Odjeljak A. Postupak izdavanje vodnog akta**

**Član 134.**  
**(Postupak izdavanja vodnog akta)**

- (1) Vodni akt se izdaje na pisani zahtjev investitora, odnosno korisnika, kao i nadležnog organa uprave (u daljem tekstu: podnosilac zahtjeva).
- (2) Odjeljenje pokreće postupak izdavanja vodnog akta po zahtjevu podnosioca zahtjeva ili po službenoj dužnosti ako se radi o zaštiti javnog interesa.
- (3) Uz zahtjev za izdavanje vodnog akta podnosilac zahtjeva dužan je dostaviti potrebne podake o lokalitetu, vrsti i obimu aktivnosti koja se namjerava sprovesti kao i tehničku dokumentaciju kojom se obrađuje konkretna aktivnost.
- (4) Tehničku dokumentaciju, iz stava (3) ovog člana izrađuje pravno lice koje je registrovano za izradu tehničke dokumentacije koja je predviđena u skladu sa ovim zakonom.
- (5) Procedura za izdavanje vodnih akata, koji se odnose na prekogranične vode, se sprovodi u skladu sa bilateralnim ili multilateralim ugovorima.
- (6) Šef Odjeljenja donosi podzakonski akt kojim utvrđuje sadržaj, oblik, vrstu, uslove, način izdavanja, aktivnosti i objekte za koje je potreban vodni akt, način čuvanja vodnog akta, troškove postupka, vrstu i sadržaj podataka i tehničke dokumentacije, kao i uslove koje moraju ispunjavaju pravna lica iz stava (4) ovog člana, kao i druga pitanja od značaja za vodne akte.

**Član 135.**  
**(Stručno mišljenje)**

- (1) U postupku izdavanja vodnih akata, Odjeljenje može zatražiti stručno mišljenje od stručnjaka iz drugih organa i institucija Distrikta.
- (2) Ukoliko se stručno mišljenje ne može osigurati u skladu sa stavom (1) ovog člana, Odjeljenje može, u cilju pribavljanja stručnog mišljenja, angažovati pravno lice odnosno preduzetnika koja obavlja djelatnost iz oblasti voda.
- (3) Šef Odjeljenje utvrđuje podzakonskim aktom postupak pribavljanja stručnog mišljenja iz stava (2) ovog člana, kao i uslove koje mora ispunjavati pravno lice odnosno preduzetnik iz stava (2) ovog člana.

**Član 136.**  
**(Saradnja organa u postupku izdavanja vodnih akata)**

- (1) U postupku izdavanja vodnog akta, Odjeljenje saraduje sa nadležnim organima iz drugih oblasti i pribavlja njihova mišljenja, saglasnosti, izjave, i druge podatke o činjenicama od važnosti za izdavanje vodnog akta.
- (2) Ukoliko se u postupku donošenja vodnog akta, a posebno vodnih smjernica, utvrdi postojanje razloga iz kojih proizilazi da objekat, instalacija ili predložena aktivnost koja se nalazi ili odvija na teritoriji Distrikta može imati negativne uticaje na vodne resurse na teritoriji Republike Srpske, odnosno Federacije Bosne i Hercegovine, prije donošenja vodnog akta, Odjeljenje pribavlja mišljenje nadležnog organa Republike Srpske, odnosno Federacije Bosne i Hercegovine.
- (3) Ukoliko se razlozi iz stava (2) ovog člana odnose na negativne uticaje na vodne resurse druge države, Odjeljenje prosljeđuje podatke iz dokumentacije nadležnom organu države, u cilju njegovog izjašnjavanja.
- (4) U slučaju negativnih mišljenja nadležnih organa iz stavova (2) i (3) ovog člana, postupak izdavanja vodnog akta se ne obustavlja, ali se pokreće postupak arbitražnog traženja rješenja između strana.

**Član 137.**  
**(Oglašavanje zainteresovanih strana i javnosti)**

- (1) Odjeljenje je dužno da prije izdavanja vodnih smjernica, obavijesti zainteresovane strane i javnost na području Distrikta o podnesenom zahtjevu na jedan od slijedećih načina:
  - a) isticanjem Obavještenja na oglasnoj ploči;
  - b) objavom Obavještenja na web stranice Vlade;
  - c) oglašavanjem Obavještenja putem sredstava javnog informisanja.
- (2) U slučaju da izdavanje vodnih smjernica ima uticaj na riječni sliv na području entiteta Bosne i Hercegovine (u daljem tekstu: entiteti), zainteresovane strane i

javnost obavještavaju se u najmanje dva sredstva javnog informisanja koja su dostupna javnosti na teritoriji Distrikta i entiteta.

- (3) Obavještenje iz stava (1) ovog člana sadrži informacije propisane podzakonskim aktom iz člana 134. stav (6) ovog zakona.
- (4) Odjeljenje je dužno zainteresovanim stranama i javnosti odrediti rok za pisano izjašnjenje o predloženim aktivnostima iz zahtjeva, koji ne može biti duži od 30 dana od dana oglašavanja.
- (5) Odjeljenje može, na osnovu slobodne procjene, organizovati javnu raspravu o predmetu iz stava (1) ovog člana.

## **Odjeljak B. Vodne smjernice**

### **Član 138. (Vodne smjernice)**

- (1) Vodne smjernice izdaju se u postupku pripreme tehničke dokumentacije za izgradnju novih, rekonstrukciju ili uklanjanje postojećih objekata i izvođenje drugih radova ili aktivnosti koji mogu trajno, povremeno ili privremeno uticati na promjene u vodnom režimu, odnosno ugroziti ciljeve zaštite životne sredine, kao i za izradu planskih dokumenata za uređenje prostora.
- (2) Vodnim smjernicama određuje se tehnički i drugi zahtjevi koji moraju da se ispune pri aktivnostima i radovima iz stava (1) ovog člana radi usklađivanja sa odredbama ovog zakona.

### **Član 139. (Rok važenja vodnih smjernica)**

Vodne smjernice prestaju da važe po isteku dvije godine od dana njihovog izdavanja, ako u tom roku nije podniet zahtjev za izdavanje vodne saglasnosti.

### **Član 140. (Vodne smjernice za izdavanje koncesija)**

- (1) Kod pokretanja postupka za dodjelu koncesije za korištenje voda i vodnog dobra u skladu sa Zakonom o koncesijama Brčko distrikta Bosne i Hercegovine (u daljem tekstu: Zakon o koncesijama), organ koji podnosi prijedlog za dodjelu koncesije, odnosno zainteresovano lice koje podnosi inicijativu radi podnošenja prijedloga za dodjelu koncesija, dužni su prije pokretanja postupka za dodjelu koncesije, pribaviti vodne smjernice.
- (2) Ako su vodne smjernice izdate na zahtjev organa iz stava (1) ovog člana, nakon dodjele koncesije prenose se na koncesionara.
- (3) Koncesionar je dužan pribaviti ostale vodne akte u skladu sa ovim zakonom.



## **Odjeljak C. Vodna saglasnost**

### **Član 141. (Vodna saglasnost)**

- (1) Vodnom saglasnošću se utvrđuje da je tehnička dokumentacija za aktivnosti i objekte, kao i planska dokumentacija za uređenje prostora, urađena u skladu sa izdatim vodnim smjernicama.
- (2) Vodna saglasnost izdaje se prije početka izgradnje novih objekata, rekonstrukcije ili uklanjanja postojećih objekata, odnosno izvođenja drugih aktivnosti i radova koji mogu trajno, povremeno ili privremeno uticati na promjene u vodnom režimu, odnosno ugroziti ciljeve zaštite životne sredine, kao i prije donošenja planskih dokumenata za uređenje prostora.
- (3) Izuzetno od stava (1) ovog člana, vodna saglasnost može se izdati i bez vodnih smjernica ako, na osnovu tehničke dokumentacije, Odjeljenje utvrdi da aktivnosti i radovi koji su predmet tehničke dokumentacije ne remete vodni režim.

### **Član 142. (Rok važenja vodne saglasnosti)**

- (1) Vodna saglasnost prestaje da važi u roku od dvije godine od dana njenog izdavanja, ako u tom roku nije podniet zahtjev za izdavanje građevinske dozvole.
- (2) Vodna saglasnost za dislociranje ili vađenje materijala iz vodotoka izdaje se na određeno vrijeme, a najduže za period od dvije godine.

### **Član 143. (Prenošenje prava iz vodne saglasnosti)**

- (1) Pravo stečeno na osnovu vodne saglasnosti ne može se bez saglasnosti Odjeljenja prenijeti na drugo lice.
- (2) Saglasnost iz stava (1) ovog člana donosi šef Odjeljenja, u roku od dva mjeseca od dana podnošenja zahtjeva.

### **Član 144. (Objekti i postrojenja za koje se ne može izdati vodna saglasnost)**

- (1) Vodna saglasnost ne može se izdati za objekte i postrojenja koja ispuštaju otpadne vode ili druge opasne materije na površinu zemlje, u zemlju ili vodu čijim projektom nije predviđena izgradnja uređaja za prečišćavanje otpadnih voda odnosno uređaja za smanjenje količina i koncentracija opasnih materija u skladu sa ovim zakonom.
- (2) Za objekte i postrojenja iz stava (1) ovog člana vodna saglasnost je uslov za izdavanje građevinske dozvole.

## **Odjeljak D. Vodna dozvola**

### **Član 145. (Vodna dozvola)**

- (1) Vodnom dozvolom se utvrđuju način, uslovi i obim korištenja voda, ispuštanja otpadnih voda, odlaganja čvrstog i tečnog otpada, skladištenja i ispuštanja opasnih i drugih materija koje mogu zagaditi vodu, kao i uslovi za druge radove kojima se utiče na vodni režim.
- (2) Vodnom dozvolom se utvrđuje da su ispunjeni uslovi određeni vodnom saglasnošću.
- (3) Vodna dozvola može se izdati bez vodnih smjernica i vodne saglasnosti za izgrađene objekte i sisteme koji imaju upotrebnu dozvolu i ne utiču nepovoljno na vodni režim.
- (4) U slučaju iz stava (3) ovog člana, vodnom dozvolom utvrđuju se uslovi pod kojima se može vršiti djelatnost koja je predmet izdavanja vodne dozvole.

### **Član 146. (Važnost i preispitivanje vodne dozvole)**

- (1) Vodna dozvola, izdaje se na određeno vrijeme, a najduže za period od 15 godina.
- (2) Kada se vodna dozvola izdaje na period duži od pet godina, utvrđeni uslovi preispituju se nakon navršene svake pete godine.
- (3) Odjeljenje, po službenoj dužnosti pokreće postupak preispitivanja iz stava (2) ovog člana.

### **Član 147. (Zabrana prenosa prava)**

Pravo stečeno na osnovu vodne dozvole ne može se prenositi na drugog korisnika.

### **Član 148. (Prestanak važnosti vodne dozvole)**

- (1) Vodna dozvola prestaje da važi:
  - a) istekom roka važnosti vodne dozvole,
  - b) odricanjem korisnika od prava iz vodne dozvole i
  - c) nekorištenjem prava iz vodne dozvole bez opravdanih razloga, duže od dvije godine.
- (2) Rješenje o utvrđivanju prestanka važnosti vodne dozvole izdaje šef Odjeljenja.
- (3) U slučaju iz stava (1) tačka a) ovog člana, na zahtjev korisnika, vodna dozvola može se obnoviti.

**Član 149.**  
**(Odobrenje za priključak i upotrebna dozvola)**

(1) Operator vodovodnog, odnosno kanalizacionog sistema, ne može izdati odobrenje za priključak na vodovodni, odnosno kanalizacioni sistem fizičkim ili pravnim licima iz člana 132. stav (1) tačka b) i c) ovog zakona, ako sistem na koji se daje odobrenje za priključak nema vodnu dozvolu.

(2) Za objekte i aktivnosti za koje je u skladu sa članom 131. ovog zakona potrebna vodna dozvola, upotrebna dozvola se ne može izdati bez prethodno pribavljene vodne dozvole.

**Odjeljak E. Vodni nalog**

**Član 150.**  
**(Vodni nalog)**

(1) Vodni nalog je vodni akt kojim se nalaže nosiocu prava da u određenom roku izvrši neku radnju, odnosno da se uzdrži od nekog činjenja, radi otklanjanja opasnosti od nastalog ili mogućeg poremećaja vodnog režima, odnosno poremećaja stabilnosti riječnog korita ili vodnog zemljišta, kao i uspostavljanja stanja u skladu sa uslovima utvrđenim u vodnom aktu.

(2) Vodni nalog izdaje Odjeljenje po službenoj dužnosti ili na prijedlog vodoprivrednog inspektora u skladu sa Zakon o upravnom postupku, osim ako ovim Zakonom nije drugačije određeno.

**Član 151.**  
**(Žalba na vodni nalog)**

(1) Protiv vodnog naloga može se izjaviti žalba.

(2) Žalba ne odlaže izvršenje vodnog naloga.

**Odjeljak F. Oduzimanje vodnog akta**

**Član 152.**  
**(Oduzimanje vodnog akta)**

(1) Zbog nepostupanja u skladu sa izdatim vodnim nalogom, vodni akt može se privremeno ili trajno oduzeti.

(2) Postupak za oduzimanje vodnog akta pokreće Odjeljenje po službenoj dužnosti ili na prijedlog vodoprivrednog inspektora.

(3) Odjeljenje odmah obavještava nosioca prava iz vodnog akta o pokrenutom postupku za oduzimanje vodnog akta.

- (4) Rješenje o trajnom ili privremenom oduzimanju vodnog akta donosi šef Odjeljenja.
- (5) Rješenje o trajnom oduzimanju vodnog akta, dostavlja se i Odjeljenju za prostorno planiranje.
- (6) Lice kojem je oduzet vodni akt, može zatražiti izdavanje novog vodnog akta u skladu sa propisanim uslovima.

**Član 153.**  
**(Privremeno oduzimanje)**

- (1) Vodni akt oduzeće se privremeno, ako nosilac prava iz vodnog akta ne postupi u skladu sa izdatim vodnim nalogom, i ako zbog neizvršenja naloga neće doći do neposredne opasnosti po život i zdravlje ljudi i poremećaja u privredi.
- (2) Vodni akt oduzeće se privremeno oduzeti na period do šest mjeseci, u kom roku se nosiocu prava iz vodnog akta obustavlja pravo koje je stekao na osnovu tog akta i u kom roku je nosilac prava iz vodnog akta dužan da izvrši radnju zbog koje mu je privremeno oduzet vodni akt.

**Član 154.**  
**(Trajno oduzimanje)**

Vodni akt se oduzima trajno ako:

- a) u određenom roku nosilac prava iz vodnog akta ne postupi u skladu sa izdatim vodnim nalogom, zbog čega mu je vodni akt privremeno oduzet;
- b) bi neizvršavanje izdatog vodnog naloga moglo dovesti do teške i neposredne opasnosti za život ili zdravlje ljudi ili ako je došlo do poremećaja u privredi;
- c) je podnosilac zahtjeva dao netačne podatke koji su nadležni organ doveli u zabludu u pogledu činjenica odlučujućih za izdavanje vodnog akta;
- d) su uslovi iz akta bitno prekršeni, uprkos pisanog upozorenja vodoprivrednog inspektora;
- e) se aktivnost ne vrši u periodu od dvije uzastopne godine;
- f) aktivnosti uzrokuju uticaje koji su zabranjeni ovim zakonom, a ti isti uticaji ne mogu biti spriječeni ili ublaženi izmjenama vodnog akta.

## **POGLAVLJE X. KONCESIJE**

**Član 155.**  
**(Koncesija na javnom vodnom dobru)**

- (1) Javno vodno dobro može se dodijeliti u koncesiju radi :
  - a) unapređivanja vodnih sistema;
  - b) obezbjeđenja održivog korištenja voda zasnovanog na dugoročnoj zaštiti raspoloživih vodnih resursa;
  - c) pravilnog, ekonomičnog i efikasnog korištenja javnog vodnog dobra i obezbjeđivanja finansijskih sredstava za unaprjeđenje voda.

(2) Koncesija na javnom vodnom dobru stiže se na način i po postupku propisanom Zakonom o koncesijama.

**Član 156.**  
**(Predmet koncesija na javnom vodnom dobru)**

Osim slučajeva predviđenih Zakonom o koncesijama, koncesija na javnom vodnom dobru može se dodijeliti za:

- a) korištenje vode za potrebe snabdijevanja vodom naselja;
- b) korištenje vode za proizvodnju napitaka, flaširanje, odnosno pakovanje vode;
- c) korištenje vodnih snaga za proizvodnju električne energije i pogon postrojenja;
- d) korištenje voda za tehnološke i slične potrebe pravnih lica;
- e) crpljenje podzemnih voda;
- f) zahvatanje voda za navodnjavanje za različite namjene, naročito poljoprivrednog zemljišta;
- g) uzgoj ribe i drugih akvatičnih organizama u privredne i druge svrhe;
- h) dislociranje ili vađenje materijala iz vodotoka;
- i) zahvatanje mineralnih, termalnih i termomineralnih voda;
- j) korištenje voda za splavarenje, uključujući i korištenje voda za rafting, vožnju kanuima i drugim sličnim plovilima;
- k) korištenje voda za postavljanje plutajućih ili plovećih objekata radi obavljanja ugostiteljske ili druge privredne djelatnosti.

**Član 157.**  
**(Slučajevi za koje koncesija nije potrebna)**

Za korištenje voda, izvođenje radova, izgradnju i korištenje vodnih objekata za obavljanje poslova od opšteg interesa, koncesija nije potrebna ukoliko je investitor ili izvršilac Distrikt, odnosno javno preduzeće čiji je osnivač Distrikt.

**Član 158.**  
**(Prava i obaveze koncesionara)**

Pored elemenata utvrđenih Zakonom o koncesijama, ugovor o koncesiji sadrži prava i obaveze koncesionara, naročito:

- a) prema drugim korisnicima voda i prostora;
- b) u održavanju vodnog režima u vodotoku i na priobalnom zemljištu;
- c) u očuvanju akvatičnih i poluakvatičnih ekosistema;
- d) u pogledu rješavanja društvenih potreba koje prouzrokuje izvođenje radova ili izgradnja vodnih objekata koji su predmet koncesije;
- e) u smanjenju nepovoljnih efekata izvođenja radova ili izgradnje vodnih objekata na okruženje.

**Član 159.**  
**(Raskid ugovora o koncesiji)**

- (1) Pored slučajeva utvrđenim Zakonom o koncesiji, ugovor o koncesiji raskida se ako:
  - a) se koncesionom djelatnošću u kontinuitetu znatnije ugrožava život i zdravlje ljudi i životna sredina, koji utiču na poremećaj većih razmjera, a mjere predviđene posebnim propisima nisu dovoljne da to spriječe;
  - b) koncesionar ne otkloni nedostake u roku određenom rješenjem vodoprivrednog inspektora;
  - c) koncesionar ne prilagodi obim i način korištenja voda promjenama u vodnom režimu u skladu sa vodnim nalogom;
  - d) je koncesionar u vezi sa obavljanjem koncesione djelatnosti pravosnažno osuđen za krivično djelo protiv životne sredine.
- (2) U slučaju raskida ugovora o koncesiji iz stava (1) ovog člana, koncesionar nema pravo na naknadu štete.

**POGLAVLJE XI. VODNA DOKUMENTACIJA**

**Član 160.**  
**(Vodna dokumentacija)**

Vodnu dokumentaciju čine:

- a) vodne knjige i
- b) vodni katastar.

**Član 161.**  
**(Vodna knjiga)**

- (1) Vodna knjiga je registar o izdatim vodnim aktima.
- (2) Odjeljenje je dužno da sva izdata vodna akta vodi u vodnoj knjizi.
- (3) Vodna knjiga sadrži: upisnik vodnih smjernica, upisnik vodnih saglasnosti, upisnik vodnih dozvola, upisnik vodnih naloga, upisnik zaključaka o odbacivanju zahtjeva stranke, upisnik akata za postupanje po zahtjevu stranke, zbirku isprava i tehničku dokumentaciju.
- (4) Vodna knjiga vodi se u pisanoj i elektronskoj formi.
- (5) Vodne knjige se sastoje od registra, zbirke isprava i tehničke dokumentacije.
- (6) Šef Odjeljenja podzakonskim aktom bliže utvrđuje sadržaj, način vođenja i obrazac vodne knjige.

**Član 162.**  
**(Vodni katastar)**

- (1) Vodni katastar čine katastri :
  - a) vodnog dobra;
  - b) vodnih objekata;
  - c) uređenja i zaštite od štetnog djelovanja voda;
  - d) korištenja voda;
  - e) zaštite voda;
  - f) ostale vodne infrastrukture.
- (2) Podaci iz vodnog katastra su javni.
- (3) Vodni katastar je sastavni dio vodnog informacionog sistema.

**Član 163.**  
**(Sadržaj i način vođenja vodnog katastra)**

- (1) Katastar vodnog dobra sadrži: registar, zbirku isprava i tehničku i ostalu dokumentaciju o površinskim i podzemnim vodama, vodnom zemljištu i materijalima sa vodnog zemljišta.
- (2) Katastar vodnih objekata sadrži: registar, zbirku isprava i tehničku dokumentaciju o vodnom objektu.
- (3) Katastar uređenja i zaštite od štetnog djelovanja voda sadrži: registar, zbirku isprava i tehničku dokumentaciju o poplavnim područjima, erozivnim područjima i štete na ugroženim područjima.
- (4) Katastar korištenja voda sadrži: registar, zbirku isprava i tehničku i ostalu dokumentaciju o izvorištima voda i korisnicima voda, o količini i kvalitetu zahvaćene vode za pojedine namjene.
- (5) Katastar zaštite voda sadrži: registar, zbirku isprava i tehničku i ostalu dokumentaciju o izvorima zagađivanja voda, količini i vrsti emisije i recipijentima.
- (6) Pravno lice koje je sopstvenim sredstvima izgradilo vodne objekte dužno je da, na zahtjev Odjeljenja, dostavi podatke za vodne katastre iz stavova (1), (2), (3), (4) i (5) ovog člana.
- (7) Vodni katastar vodi Odjeljenje.
- (8) Vodni katastar vodi se u pisanoj i elektronskoj formi.
- (9) Šef Odjeljenja podzakonskim aktom bliže utvrđuje sadržaj i način vođenja vodnog katastra.

## **POGLAVLJE XII. VODNI INFORMACIONI SISTEM**

### **Član 164. (Vodni informacijski sistem)**

Vodni informacijski sistem uspostavlja se radi klasifikovanja voda, praćenja i unapređenja vodnog režima, planiranja razvoja vodnih sistema i upravljanja vodama u Distriktu.

### **Član 165. (Ciljevi uspostavljanja vodnog informacijskog sistema)**

- (1) Opšti ciljevi uspostavljanja vodnog informacijskog sistema su:
  - a) racionalizacija, integracija i optimizacija odlučivanja u sektoru voda, kroz proces korištenja informacione i komunikacione tehnologije;
  - b) razmjena i sintetizacija informacione interne, odnosno unutar sektora voda, kao i eksterno, odnosno sa vanjskim i međunarodnim institucijama;
  - c) korištenje savremenih metoda komunikacije i odlučivanja.
- (2) Posebni ciljevi uspostavljanja vodnog informacijskog sistema, pored ostalih, su:
  - a) unapređenje tačnosti i pouzdanosti informacione iz sistema upravljanja vodama;
  - b) skraćivanje vremena dostupnosti informacione sistemu upravljanja vodama;
  - c) uspostavljanje osnove za kontinuirano praćenje promjena sistema upravljanja vodama;
  - d) racionalno korištenje i zaštita vodnih resursa;
  - e) povećanje kvaliteta u donošenju razvojnih odluka;
  - f) povećanje intelektualnog i humanih kapaciteta;
  - g) stvaranje pozitivne slike o upravljanju vodama zasnovane na profesionalnom i odgovornom načinu rada.

### **Član 166. (Uspostavljanje vodnog informacijskog sistema)**

- (1) Vodni informacijski sistem uspostavlja i vodi Odjeljenje.
- (2) Vodne informacione sisteme uspostavlja i vode i javna preduzeća koja se bave vodnom djelatnošću, kao dijelovi vodnog informacijskog sistema iz stava (1) ovog člana.

### **Član 167. (Sadržaj vodnog informacijskog sistema)**

- (1) Vodni informacijski sistem sadrži najmanje dvije osnovne grupe podataka, i to:
  - a) podatke u nadležnosti organa, institucija i drugih pravnih lica u sektoru voda,
  - b) podatke u nadležnosti organa, institucija i drugih pravnih lica koje su van sektora voda, a od značaja za upravljanje vodama.
- (2) Osnovnu grupu podataka iz stava (1) tačka a) ovog člana, između ostalog, čine:



- a) vodni katastar;
  - b) vodna knjiga;
  - c) registar koncesija na vodama i vodnom dobru;
  - d) evidencija o inspekcijskim pregledima;
  - e) podaci o intelektualnim i humanim kapacitetima;
  - f) ostala dokumentacija.
- (3) Osnovnu grupu podataka iz stava (1) tačka b) ovog člana čine:
- a) geografski podaci i resursi;
  - b) demografska, sociološka i privredna grupa podataka.
- (4) Vodni informacioni sistem obezbjeđuje formiranje, održavanje, prezentaciju i distribuciju podataka o stanju kvaliteta voda, klasama vodnih tijela površinskih i podzemnih voda, vodnoj dokumentaciji, zakonodavnim, organizacionim, strateškim i planskim mjerama u oblasti upravljanja vodama, naučno-tehničke i druge informacije od značaja za upravljanje vodama i razmjenu informacija sa drugim informacionim sistemima na državnom i međunarodnom nivou.
- (5) Šef Odjeljenja podzakonskim aktom bliže utvrđuje sadržaj i način vođenja vodnog informacionog sistema, metodologiju, strukturu, kategorije i nivoe sakupljanja podataka, kao i sadržaj podataka o kojima se obavještava javnost.

#### **Član 168.**

##### **(Registar koncesija na javnom vodnom dobru)**

- (1) Odjeljenje vodi registar koncesija javnom vodnom dobru.
- (2) Registar koncesija javnom vodnom dobru sadrži podatke o odlukama nadležnih organa i ugovorima o koncesijama na javnom vodnom dobru.
- (3) Organ koji dodjeljuje koncesiju dužan je dostaviti podatke o dodjeli koncesije Odjeljenju.

#### **Član 169.**

##### **(Evidencije o inspekcijskom pregledu)**

Vodoprivredni inspektor dužan je obavijestiti Odjeljenje o inspekcijskom pregledu, ukoliko predmet kontrole ima uticaj na vodni režim.

#### **Član 170.**

##### **(Obaveza ustupanja podataka za vodni informacioni sistem)**

Organi, institucije i druga fizička i pravna lica koji posjeduju podatke od značaja za upravljanje vodama obavezni su da Odjeljenju ustupe podatke koje posjeduju, a koji su potrebni radi vođenja vodnog informacionog sistema.

## **POGLAVLJE XIII. ZABRANE, OGRANIČENJE PRAVA VLASNIKA, ODNOSNO KORISNIKA ZEMLJIŠTA**

### **Član 171. (Opšte zabrane)**

Na vodnom dobru i priobalnom zemljištu zabranjene su aktivnosti i zahvati u prostoru koji mogu:

- a) ugroziti stabilnost vodnog i priobalnog zemljišta;
- b) umanjiti stepen zaštite od štetnog djelovanja voda;
- c) spriječiti normalan protok vode, naplavina i mulja;
- d) onemogućiti opstanak i razmnožavanje akvatičnih i poluakvatičnih organizama.

### **Član 172. (Zabrane i ograničenja)**

(1) U cilju očuvanja i održavanja vodnih tijela površinskih i podzemnih voda i zaštitnih i drugih vodnih objekata, sprječavanja pogoršanja vodnog režima, obezbjeđenja prolaza velikih voda i sprovođenja zaštite od štetnog djelovanja voda, kao i zaštite životne sredine, zabranjeno je:

- a) obavljati radnje na nasipu, obodnom i odvodnom kanalu, u inundacionom području, kojima se može ugroziti stabilnost vodnih objekata, a naročito:
  - 1) vršiti vađenje materijala kao što je šljunak, pjesak, kamen i glina, u inundacionom području, odnosno branjenom području na udaljenosti manjoj od 100 metara od vanjske, vodne, nožice nasipa;
  - 2) obrađivati zemlju na udaljenosti manjoj od 10 metara od nožice nasipa;
  - 3) na nasipu i njegovom zaštitnom pojasu i u inundacionom području istovarati ili ostavljati bilo kakav materijal, izuzev materijala za odbranu od poplava kao što je deponija kamena i zemlje;
  - 4) puštati po nasipu, obodnom i odvodnom kanalu stoku radi ispaše ili prevoditi stoku izvan mjesta određenog za prelaz;
  - 5) podizati ograde i živice i saditi drveće na udaljenosti manjoj od 20 metara sa unutrašnje strane i 10 metara sa vanjske strane od nožice nasipa, kao i graditi objekte stambene, privredne i druge, sa unutrašnje strane nasipa na udaljenosti manjoj od 20 metara od nožice nasipa i u inundacionom pojasu;
  - 6) graditi bunare na udaljenosti manjoj od 50 metara od vanjske nožice nasipa, kopati, bušiti jame ili paralelne kanale na udaljenosti manjoj od 20 metara od unutrašnje nožice, odnosno 10 metara od vanjske nožice nasipa;
  - 7) podizati pregrade u inundacionom području;
  - 8) oštećivati ili uništavati uređaje na nasipu kao što su rampe, oznake, vodomjeri ili uređaje za registraciju promjena na vodama ili druge znakove.
- b) graditi objekte, saditi drveće, orati i kopati zemlju i obavljati druge radnje kojima se remeti funkcija ili ugrožava stabilnost melioracionih kanala za odvodnjavanje i u obostranom pojasu širine od najmanje 5 metara od tih kanala preduzimati radnje kojima se ometa redovno održavanje ovih kanala;
- c) odlagati čvrsti otpad i druge materijale u vodotoke, akumulacije, retenzije, melioracione i druge kanale, upuštati zagađene vode ili druge materije i vršiti radnje, kojima se može oštetiti korito i obala vodotoka, uticati na promjenu

- njegove trase, nivoe vode, količinu i kvalitet vode, ugroziti stabilnost zaštitnih i drugih vodnih objekata ili otežati održavanje vodnog sistema;
- d) izvoditi radove koji bi mogli ugroziti stabilnost brane ili njenu namjenu, kao i mijenjati prirodne uslove u okolini akumulacionih i retenzionih basena na način kojim bi se prouzrokovalo klizanja terena, pojave erozije ili nastajanje vododerina i bujica;
  - e) oštećivati ili neovlašteno rukovati akumulacijama i njihovom opremom, crpnim stanicama, ustavama, kanalima, tunelima, kulama zatvaračnicama i njima pripadajućim objektima, dalekovodima, trafo- stanicama i sistemom veza, ili ometati njihov rad;
  - f) neovlašteno koristiti pristupne puteve do zaštitnih objekata;
  - g) u poplavnom području graditi objekte na način kojim se ometa proticanje vode i leda ili suprotno odredbama ovog zakona;
  - h) mijenjati ili presjecati tokove podzemnih voda, odnosno iskorišćavati te vode u obimu kojim se ugrožava snabdijevanje vodom za piće ili tehnološkom vodom, ugrožavaju mineralna i termalna izvorišta, stabilnost tla i objekata;
  - i) mijenjati pravac i jačinu toka površinske vode koja prirodno protiče ili otiče sa vodnog zemljišta koje je u privatnoj svojini;
  - j) vršiti, bez odgovarajućih vodnih akata, intervencije u koritu, kao osiguranje obala, pregrađivanje korita, proširenje i produbljenje korita i drugo;
  - k) mijenjati pravac vodotoka i kanala bez vodne saglasnosti i vodne dozvole, odnosno protivno uslovima određenim u vodnoj saglasnosti i vodnoj dozvoli;
  - l) unositi u vodotoke, jezera, akumulacije i retenzije, kao i deponovati na obale vodotoka, jezera, akumulacija i retenzija kamen, zemlju, jalovinu i druge čvrste i tečne materije i materijale;
  - m) saditi drveće na udaljenosti manjoj od 10 metara od linije dopiranja velikih voda vodotoka, odnosno 10 metara od rubne linije akumulacije ili retenzije, obodnog ili vještačkog kanala, izuzev zaštitnih šuma;
  - n) podizati zgrade i druge objekte koji ne služe odbrani od poplava na udaljenosti manjoj od 10 metara od linije dopiranja stogodišnjih velikih voda za sve površinske vode, izuzev ako je vlasniku ili korisniku uslovljena izgradnja objekta prethodnim preduzimanjem zaštitnih mjera kojima se onemogućavaju ili smanjuju štetne posljedice od voda;
  - o) graditi ili postavljati ograde ili prepreke na udaljenosti manjoj od 10 metara od poplavne linije dopiranja velikih voda vodotoka, kojima se sprečava prilaz obalama vodotoka;
  - p) vršiti radnje koje mogu oštetiti korita i obale vodotoka, jezera, kanala, akumulacije i retenzije ili smetati slobodnom oticanju vode;
  - q) izvoditi radove u blizini vodotoka, jezera, kanala, tunela, akumulacije i retenzije, koji bi mogli ugroziti stabilnost zaštitnih vodnih objekata ili njihovu upotrebu (kopanje zemljišta, šljunka, pijeska, kamena i slično);
  - r) izvoditi druge radove koji bi mogli da ugroze stabilnost i otežaju održavanje regulacionih, zaštitnih i drugih vodnih objekata.

(2) Zabrana vršenja radnji iz stava (1) ovog člana može se proširiti i izvan granica vodnog zemljišta, ako bi se tim radnjama ugrozio vodni režim ili vodni objekti.

**Član 173.**  
**(Otklanjanje štete)**

- (1) Fizičko, odnosno pravno lice, koje počini zabranjenu radnju iz člana 172. ovog zakona, dužno je da po rješenju vodoprivrednog inspektora izvrši radnje radi uspostavljanja stanja koje je postojalo prije nego što je šteta nastala (u daljem tekstu: uspostavljanje prijašnjeg stanja).
- (2) Ukoliko lica iz stava (1) ovog člana ne uspostaviti prijašnje stanje o njegovom trošku, Odjeljenje će to učiniti o trošku tog lica.
- (3) Ako štetu nije moguće popraviti, lice iz stava (1) ovog člana dužno je nadoknaditi štetu.

**Član 174.**  
**(Obaveze vlasnika odnosno korisnika vodnog zemljišta)**

- (1) Vlasnik, odnosno korisnik vodnog zemljišta dužan je:
  - a) dopustiti prolaz preko zemljišta licima koja su ovlaštena da premjeravaju, snimaju, projektuju i obilježavaju zemljište ili vode za potrebe izgradnje ili rekonstrukcije vodnih objekata, licima koja vrše inspekcijski nadzor, kao i licima koja izvode radove na izgradnji, rekonstrukciji i održavanju vodnih objekata;
  - b) dopustiti korištenje korita za veliku vodu i obale rijeke u širini od 5 m licima koja su ovlaštena da vrše pregled stanja i održavanje riječnih korita i obala;
  - c) omogućiti korištenje odgovarajućeg materijala sa svog zemljišta, kao i prolaz lica i mehanizacije, radi sprovođenja zaštite od štetnog djelovanja voda;
  - d) dopustiti slobodno oticanje vode koja dolazi sa uzvodnih zemljišta, bez promjene pravca i brzine vode;
  - e) gazdovati šumama na inundacionom području tako da se ne prave smetnje prirodnom oticanju vode i leda;
  - f) omogućiti privremeno deponovanje materijala izvađenog iz vodotoka, jezera ili akumulacija radi izvršenja radova i njegovo transportovanje preko tog zemljišta;
  - g) dozvoliti postavljanje i rad mjernih instrumenata, neophodnih za istraživanja, iskopavanja ili bušenja, eksperimentalna pumpanja, uzimanje uzoraka i druge poslove vezane za istraživanja voda za potrebe snabdjevanja vodom ili drugih istraživačkih djelatnosti, pod uslovima i na način propisan ovim ili drugim zakonom, kao i za potrebe monitoringa voda.
- (2) Vlasnik, odnosno korisnik nepokretnosti koja se nalazi u zoni sanitarne zaštite dužan je da način korištenja nepokretnosti prilagodi uslovima utvrđenim za korišćenje i održavanje zona sanitarne zaštite.
- (3) Vlasnik, odnosno korisnik zemljišta ima pravo na naknadu stvarne štete u slučajevima iz tačaka a), b), c), f) i g) stava (1) ovog člana, kao i za korištenje materijala iz tačke c) stav (1) ovog člana.

- (4) Međusobna prava i obaveze koje nastanu u vezi sa izvođenjem radova iz tačaka a), b), c), f) i g) stava (1) ovog člana sporazumno uređuju vlasnik, odnosno korisnik zemljišta i investitor.

**Član 175.**  
**(Preduzimanje aktivnosti)**

- (1) Vlasnik, odnosno korisnik vodnog zemljišta ili vodnog objekta na obali dužan je da na dijelu na kome je vlasnik, odnosno korisnik:
- a) učestvuje u izvođenju manjih radova na održavanju korita za veliku vodu, osim korita za malu vodu, radi sprečavanja erozije, odronjavanja obala ili smanjenja propusne moći korita za vodu;
  - b) ukloni sam ili učestvuje u uklanjanju iz korita vodotoka ili sa svog zemljišta predmeta koji mogu narušiti vodni režim;
  - c) ukloni drvo iz korita bujičnog toka.
- (2) Šef Odjeljenja bliže definiše podzakonskim aktom aktivnost iz stava (1) ovog člana i postupak odobrenja tih aktivnosti.

**Član 176.**  
**(Ustanovljavanje prava služnosti)**

- (1) Vlasnik, odnosno korisnik zemljišta dužan je da dozvoli da preko njegovog zemljišta drugi vlasnik, odnosno korisnik ustanovi pravo služnosti kako bi izvodio radove odvođenja, odnosno dovođenja vode do svog zemljišta, ako za to ne postoji cjelishodnije tehničko ili ekonomsko rješenje.
- (2) Ako vlasnici, odnosno korisnici zemljišta ne postignu sporazum o ustanovljavanju prava služnosti i o visini odgovarajuće naknade, odluku donosi sud.

**POGLAVLJE XIV. SAVJET ZA VODE**

**Član 177.**  
**(Savjet za vode)**

- (1) Savjet za vode je stručno tijelo koje razmatra stručna pitanja, daje stručna mišljenja i učestvuje u realizaciji projektnih zadataka u oblasti upravljanja vodama.
- (2) Vlada, na prijedlog šefa Odjeljenja imenuje i razrješava predsjednika i članove Savjeta za vode, koji odražava sastav stanovništva Distrikta i zastupljenost oba pola.
- (3) Članovi Savjeta za vode se biraju iz reda istaknutih stručnjaka koji imaju značajne rezultate u radu i doprinos u sektoru voda i upravljanja vodama.
- (4) Mandat članova Savjeta za vode traje četiri godine.
- (5) Savjet za vode donosi poslovnik o radu.

- (6) Članovi Savjeta za vode imaju pravo na naknadu za rad u Savjetu za vode, koja se isplaćuje iz budžeta Distrikta.
- (7) Bliži uslovi, broj članova, način imenovanja, razrješenja, visina nadoknade iz stava (6) ovog člana i druga pitanja koja se odnose na uspostavu i rad Savjeta za vode utvrđuju se podzakonskim aktom koji donosi Vlada, na prijedlog šefa Odjeljenja.

**Član 178.**  
**(Poslovi Savjeta za vode)**

Savjet za vode obavlja slijedeće poslove:

- a) učestvuje u pripremi nacрта strategije, plana upravljanja vodama i drugih planskih dokumenata predviđenih ovim zakonom;
- b) razmatra i daje mišljenje na nacрте zakona i drugih propisa kojima se uređuju pitanja upravljanja vodama;
- c) razmatra i daje mišljenje o bilo kojim strateškim dokumentima drugih sektora koji imaju uticaja na sektor voda;
- d) daje prijedloge za unapređenje stanja u oblasti voda;
- e) predlaže Odjeljenju studijske ili istražne poslove koji se odnose na sve vidove upravljanja vodama;
- f) razmatra i daje mišljenje o bilo kojem pitanju od interesa za vodno područje, a u vezi je sa međuentitetskom saradnjom;
- g) razmatra i daje mišljenje o bilo kojem pitanju od interesa za vodno područje, a odnose se na korištenje ili zaštitu vodnog resursa;
- h) razmatra i daje mišljenje o bilo kojem pitanju iz sektora voda a koje je od značaja za Distrikt, Bosnu i Hercegovinu, međuentitetsku saradnju ili međunarodne obaveze.

**POGLAVLJE XV. ORGANIZACIJA I FINASIRANJE UPRAVLJANJA VODAMA**

**Član 179.**  
**(Poslovi Odjeljenja)**

(1) Poslovi Odjeljenja su:

- a) izrada planskih dokumenata za upravljanje vodama i normativnih akata;
- b) studijsko i analitički poslovi, kao izrada projektnih zadataka, konceptijskih rješenja, i investicijskih programa;
- c) uređenje vodotoka i zaštita od štetnog djelovanja voda, kao što je praćenje hidroloških stanja, procjena poplavnih rizika, praćenje stanja vodotoka i stanja regulacioni i zaštitnih vodnih objekata, izgradnja i održavanje regulacionih i zaštitnih vodnih objekata; nadzor nad građenjem i održavanjem regulacionih i zaštitnih vodnih objekata; upravljanje poplavnim rizicima; sprovođenje obrane od poplava,
- d) poslovi u melioracijskoj odvodnji, kao što je izgradnja, održavanje i nadzor nad objekatima za zaštitu od štetnog djelovanja unutrašnjih voda, odnosno odvodnjavanje;

- e) zaštita voda, kao što je upravljanje kvalitetom voda, sprovođenje monitoringa površinskih i podzemnih voda u odnosu na hidrološko stanje, kvalitativno stanje i ekološko stanje voda;
  - f) upravljanje javnim vodnim dobrom u skladu sa ovim zakonom;
  - g) vođenje vodne dokumentacije, jedinstvenoga informacijskog sistema voda i izdavanje vodnih akata;
  - h) stručni poslovi u vezi s davanjem koncesija za korištenje voda;
  - i) stručni nadzor nad sprovođenjem uslova iz vodnih akata;
  - j) praćenje prikupljanje vodnih naknada;
  - k) preduzimanje hitnih mjera na sprečavanju ili smanjenju štetnih uticaja prouzrokovanih iznenadnom opasnosti zagađenjima voda, i priprema plana zaštite voda od zagađivanja;
  - l) učestvovanje u saradnji po pitanju koordinacije izrade razvoja i sprovođenja integralnih planova upravljanja vodama, sa odgovornim organizacijama iz entiteta za potrebe Bosne i Hercegovine, odnosno sa nadležnim međunarodnim tijelima za područja međunarodnih riječnih slivova,
  - m) obavljanje i drugih poslova propisanih ovim zakonom i drugim propisima.
- (2) Za obavljanje stručno-tehničkih poslova iz svoje nadležnosti, Odjeljenje može angažovati fizička ili pravna lica u skladu sa ovim zakonom i drugim propisima.

**Član 180.**  
**(Predmet finansiranja)**

- (1) Poslovi od opšteg interesa koji se finansiraju u skladu sa ovim zakonom su:
- a) uređenje vodotoka i zaštita od štetnog djelovanja voda;
  - b) uređenje i korištenje voda;
  - c) zaštita voda od zagađivanja;
  - d) izgradnja, održavanje i upravljanje melioracionim sistemima;
  - e) izgradnja, održavanje i upravljanje regionalnim i višenamjenskim hidrosistemima;
  - f) ostali poslovi od opšteg interesa utvrđeni ovim zakonom.
- (2) Poslovi uređenja vodotoka i zaštite od štetnog djelovanja voda su:
- a) izrada planova iz člana 88. ovog zakona;
  - b) izgradnja, rekonstrukcija i sanacija regulacionih i zaštitnih vodnih objekata u javnoj svojini i održavanje vodotoka;
  - c) sprovođenje odbrane od poplave i leda;
  - d) izgradnja objekata i izvođenje radova i mjera za zaštitu od erozije i bujica u skladu sa članom 100. ovog zakona.
- (3) Poslovi uređenja i korištenja voda su:
- a) izrada bilansa voda, kontrola stanja zaliha vodnih resursa i mjere za obezbjeđenje njihovog racionalnog korištenja i zaštite;
  - b) izrada bilansa podzemnih voda za pojedinačni resurs, uključujući i raspoloživi resurs, način i dinamika obnavljanja resursa i mjere za obezbjeđenje racionalnog korištenja i zaštitu resursa;
  - c) ispitivanje kvaliteta vode i istražni radovi na izvorištu;

- d) zaštita izvorišta za snabdijevanje vodom;
  - e) izgradnja i rekonstrukcija vodnih objekata iz člana 33. tačka a) ovog zakona, u javnoj svojini.
- (4) Poslovi zaštite voda od zagađivanja su:
- a) klasifikacija vodnih tijela površinskih i podzemnih voda;
  - b) izrada programa monitoringa voda;
  - c) priprema planova za zaštitu voda od zagađivanja, organizacija i kontrola njihovog sprovođenja;
  - d) sprovođenje dugoročnih i kratkoročnih mjera za sprječavanje, ublažavanje i kontrolu zagađivanja voda;
  - e) uređenje vodnog režima zaštićenih područja iz člana 111. ovog zakona i drugih područja koja na njih imaju uticaja;
  - f) izgradnja i rekonstrukcija vodnih objekata za sakupljanje, odvođenje i prečišćavanje otpadnih voda i zaštitu voda iz člana 34. ovog zakona, u javnoj svojini.
- (5) Poslovi koji se odnose na melioracione sisteme su:
- a) održavanje vodnih objekata za odvodnjavanje i navodnjavanje u javnoj svojini;
  - b) upravljanje sistemima za odvodnjavanje i navodnjavanje u javnoj svojini;
  - c) izgradnja vodnih objekata osnovne kanalske mreže za odvodnjavanje.
- (6) Poslovi koji se odnose na regionalne i višenamjenske hidrosisteme su:
- a) upravljanje i održavanje, uključujući i čišćenje akumulacija od plutajućeg otpada, regionalnih i višenamjenskih hidrosistema u javnoj svojini;
  - b) izgradnja, rekonstrukcija i sanacija regionalnih i višenamjenskih hidrosistema u javnoj svojini.
- (7) Ostali poslovi od opšteg interesa, u smislu ovog zakona, kao što su:
- a) izrada planskih dokumenata i normativnih akata;
  - b) priprema i izdavanje vodnih akata i kontrola njihovog sprovođenja;
  - c) izrada i revizija investiciono-tehničke dokumentacije iz oblasti uređenja vodotoka i zaštite od štetnog djelovanja voda, uređenja i korištenja voda i zaštite voda od zagađivanja;
  - d) poslovi međunarodne saradnje;
  - e) uspostavljanje i vođenje vodne dokumentacije i vodnog informacionog sistema.

### **Član 181.** **(Izvori finansiranja)**

Izvori finansiranja za obavljanje poslova određenih ovim zakonom su:

- a) opšta vodna naknada;
- b) posebne vodne naknade;
- c) koncesiona naknada;
- d) prihodi po osnovu zakupa javnog vodnog dobra;
- e) budžet Distrikta;



- f) kreditna sredstva;
- g) zajmovi;
- h) donacije i
- i) ostali izvori finansiranja u skladu sa zakonom.

**Član 182.**  
**(Opšta vodna naknada)**

- (1) Opštu vodnu nakanada plaćaju preduzetnici i pravna lica registrovana za obavljanje privredne djelatnosti.
- (2) Opšta vodna naknada se naplaćuje u visini od 0,02% od osnovice koju čine neto plata zaposlenika u radnom odnosu na neodređeno, odnosno određeno vrijeme i naknada na osnovu ugovora o djelu.
- (3) Naknada iz stava (1) ovog člana je prihod budžeta Distrikta.

**Član 183.**  
**(Posebne vodne naknade)**

- (1) Posebne vodne naknade iz člana 181. tačke b) ovog zakona su naknade za:
  - a) korištenje površinskih i podzemnih voda;
  - b) proizvodnju električne energije;
  - c) zaštitu voda;
  - d) vađenje materijala iz vodotoka i
  - e) zaštitu od poplava.
- (2) Naknade iz stava (1) ovog člana su prihod budžeta Distrikta.

**Član 184.**  
**(Naknada za korištenje površinskih i podzemnih voda)**

- (1) Naknada za korištenje površinskih i podzemnih voda plaća se za zahvatanje vode za:
  - a) snadbijevanje vodom za piće;
  - b) flaširanje vode i mineralne vode;
  - c) navodnjavanje;
  - d) uzgoj ribe u ribnjacima;
  - e) industrijske procese, uključujući i termoelektrane;
  - f) druge namjene.
- (2) Osnovica za obračun naknade iz stava (1) ovog člana je jedan kubni metar zahvaćene vode.
- (3) Stopa koja se primjenjuje za obračun naknade iz stava (1) ovog člana može biti različita, zavisno od namjene i kvaliteta vode.

- (4) Obaveznik plaćanja naknade iz stava (1) ovog člana je fizičko, odnosno pravno lice kojem je izdat vodni akt za korištenje površinskih i podzemnih voda iz stava (1) ovog člana.

**Član 185.**  
**(Naknada za proizvodnju električne energije)**

- (1) Fizičko, odnosno pravno lice kojem je izdat vodni akt za proizvodnju električne energije plaća naknadu za proizvodnju električne energije.
- (2) Osnovica za obračun naknade iz stava (1) ovog člana je jedan kilovat čas proizvedene električne energije.

**Član 186.**  
**(Naknada za zaštitu voda)**

- (1) Naknada za zaštitu voda plaća se za:
- a) korištenje transportnih sredstava, odnosno građevinskih mašina koje koriste naftu ili naftne derivate;
  - b) ispuštanje otpadnih voda;
  - c) uzgoj ribe u ribnjacima;
  - d) upotrebu vještačkih đubriva i hemikalija za zaštitu biljaka.
- (2) Osnovica za obračun naknada iz tačaka a) i b), stav (1) ovog člana je zagađenje voda izraženo preko 1 ekvivalenta stanovnika (1 e.s.).
- (3) Osnovica za obračun naknade iz tačke c), stav (1) ovog člana je kilogram proizvedene ribe i stavljene u promet.
- (4) Osnovica za obračun naknade iz tačke d), stav (1) ovog člana je kilogram proizvedenog ili uvezenog vještačkog đubriva ili hemikalije za zaštitu biljaka.
- (5) Obveznik plaćanja naknade iz tačke a), stav (1) ovog člana je fizičko, odnosno pravno lice na čije je ime registrovano transportno sredstvo, odnosno građevinska mašina.
- (6) Obveznik plaćanja naknade iz tačke b) i c), stav (1) ovog člana je fizičko, odnosno pravno lice kojem je izdat vodni akt za ispuštanje otpadnih voda, odnosno za uzgoj ribe u ribnjacima.
- (7) Obveznik plaćanja naknade iz tačke d), stav (1) ovog člana je fizičko, odnosno pravno lice koje proizvodi ili uvozi vještačka đubriva ili hemikalije za zaštitu biljaka.

**Član 187.**  
**(Naknada za vađenje materijala iz vodotoka)**

- (1) Fizičko, odnosno pravno lice kojem je izdat vodni akt za vađenja materijala iz vodotoka plaća naknadu za vađenje materijala iz vodotoka.

- (2) Osnovica za obračun naknade iz stava (1) ovog člana je metar kubni izvađenog materijala.

**Član 188.**  
**(Naknada za zaštitu od poplava)**

- (1) Naknada za zaštitu od poplava plaća se za zaštitu:
- a) poljoprivrednog, šumskog ili građevinskog zemljišta koje je zaštićeno objektima za zaštitu od poplava,
  - b) stambenih, poslovnih i drugih objekata koji su zaštićeni objektima za zaštitu od poplava.
- (2) Osnovica za obračun naknade iz tačke a) stava (1) ovog člana je hektar zaštićenog zemljišta, a za manje površine kvadratni metar.
- (3) Stopa koja se primjenjuje za obračun naknade iz tačke a) ovog člana može biti različita zavisno od vrste branjene površine.
- (4) Osnovica za obračun naknade iz tačke b) stava (1) ovog člana je metar kvadratni objekta.
- (5) Obveznik plaćanja naknade iz stava (1) ovog člana je vlasnik ili korisnik zemljišta, odnosno objekta iz stava (1) ovog člana.

**Član 189.**  
**(Stope vodnih naknada)**

Stope posebnih vodnih naknada iz člana 183. ovog zakona, utvrđuje Vlada, na prijedlog šefa Odjeljenja.

**Član 190.**  
**(Oslobađanje od plaćanja posebnih vodnih naknada)**

Posebna vodna naknada za zaštitu od poplava iz člana 182. ovog zakona se ne plaća u sljedećim slučajevima:

- a) za nekretnine koje neposredno služe za vazdušni, željeznički i putni saobraćaj, za obezbjeđenje zdravstvene i socijalne zaštite, obrazovanje, kulturu, za groblja ili za objekte vjerske namjene;
- b) za poljoprivredno i šumsko zemljište, ukoliko je vlasnik tog zemljišta član porodice poginulog borca, invalid rata ili lice u stanju socijalne potrebe, ukoliko to zemljište nije dato u zakup drugim licima,
- c) za zaštitne vodne objekte i javno vodno dobro, osim ako je dato na korištenje.

**Član 191.**  
**(Prikupljanje vodnih naknada)**

Vlada, na prijedlog Direkcije za finansije Brčko distrikta Bosne i Hercegovine, utvrđuje način obračunavanja, postupak i rokove za obračunavanje i plaćanje, kao i kontrolu izmirenja obaveza na osnovu opšte vodne naknade i posebnih vodnih naknada.

**Član 192.**  
**(Koncesiona naknada)**

Obaveza plaćanja koncesione naknade, određivanje visine, rokova, uslova i načina plaćanja vrši se u skladu sa Zakonom o koncesijama.

**Član 193.**  
**(Prihod po osnovu zakupa javnog vodnog dobra)**

Prihod od izdavanja u zakup javnog vodnog dobra ostvaruje se u skladu sa Zakonom o javnoj imovini u Brčko distriktu Bosne i Hercegovine.

**POGLAVLJE XVI. INSPEKCIJSKI NADZOR**

**Član 194.**  
**(Nadležnost)**

Inspekcijski nadzor nad primjenom i izvršenjem ovog zakona obavlja vodoprivredni inspektor.

**Član 195.**  
**(Inspekcijski nadzor)**

- (1) Inspekcijski nadzor vrši se u skladu sa Zakonom o inspekcijama Brčko distrikta BiH (u daljem tekstu: Zakon o inspekcijama) i Zakona o upravnom postupku.
- (2) Ako vodoprivredni inspektor prilikom obavljanja inspekcijskog nadzora uoči nepravilnosti, odnosno povrede propisa, a nije nadležan direktno postupati, obavezan je obavijestiti nadležni organ o uočenim nepravilnostima, odnosno povredama propisa i tražiti pokretanje postupka i preduzimanje propisanih mjera.

**Član 196.**  
**(Ovlaštenja inspektora)**

- (1) U obavljanju inspekcijskih poslova, pored ovlaštenja propisanih Zakonom o inspekcijama, vodoprivredni inspektor je ovlašten i dužan:
  - a) spriječiti korištenje vode ako se ona koristi u suprotnosti sa ovim zakonom bez vodnog akta ili ugovora o koncesiji, odnosno suprotno uslovima utvrđenim vodnim aktom, ugovorom o koncesiji, odnosno ovim zakonom;
  - b) spriječiti ili ograničiti sprovođenje prava na korištenje voda, ako se ono koristi u suprotnosti sa vodnim aktom, odnosno ugovorom o koncesiji;
  - c) zaustaviti izgradnju ili sprovođenje drugog zahvata u prostoru, ako se sprovodi bez, ili u suprotnosti sa vodnim aktom ili ugovorom o koncesiji;

- d) odrediti privremenu obustavu rada, odnosno obavljanje privredne djelatnosti ili dijela privredne djelatnosti, ako se obavlja bez ili u suprotnosti sa vodnim aktom, odnosno ugovorom o koncesiji;
- e) odrediti privremenu obustavu rada, odnosno obavljanje privredne djelatnosti ili dijela privredne djelatnosti, ako utvrdi da otpadne vode sadrže opasne materije u količini većoj od dozvoljene ili se zahvataju veće količine od dozvoljenih;
- f) zabraniti upotrebu objekta i uređaja, ako se koriste bez ili u suprotnosti sa vodnim aktom, odnosno ugovorom o koncesiji;
- g) zabraniti ili ograničiti ispuštanje u vode, ako se vrši u suprotnosti sa odredbama člana 113. ovog zakona ili u suprotnosti sa vodnim aktom, odnosno ugovorom o koncesiji;
- h) zabraniti dislociranje ili vađenje materijala iz površinskih voda, ako se preduzima u suprotnosti sa odredbama ovog zakona ili u suprotnosti sa vodnim aktom, odnosno ugovorom o koncesiji, ili tehničkom dokumentacijom;
- i) u saradnji sa urbanističko-građevinskim inspektorom, naredi uklanjanje izgrađenog objekta i postrojenja bez vodnog akta,
- j) narediti radnje radi uspostavljanja prijašnjeg stanja u slučaju postupanja suprotno odredbama ovog zakona;
- k) narediti i druge radnje koje su obaveza vlasnika, odnosno korisnika ili odrediti druge mjere u skladu sa ovim zakonom i drugim propisima;
- l) preko nadležnog organa izvjestiti organ vodoprivredne inspekcije druge države o nedozvoljenim promjenama režima voda na kontrolnim profilima međudržavnih voda;
- m) zabrani preduzimanje radnji koje nisu dozvoljene u skladu sa ovim zakonom;
- n) odrediti sanacione mjere ili predložiti Odjeljenju izvršenje određenih radnji i provođenje sanacionog programa, ako je potrebno da se otklone izvori i posljedice prekomjernog opterećenja voda;
- o) preduzeti i druge mjere u skladu sa ovim zakonom i drugim propisima.

(2) Inspeksijske poslove iz stava (1) tačke e) i g) ovog člana, vodoprivredni inspektor obavlja u saradnji sa inspektorom za zaštitu životne sredine.

### **Član 197.** **(Usmeno rješenje)**

- (1) Vodoprivredni inspektor može donijeti usmeno rješenje i odmah narediti njegovo izvršenje, u skladu sa Zakonom o inspekcijama, u sljedećim slučajevima:
- a) ako bi nastala neposredna opasnost od poplava, izliva voda ili pogoršanja stanja u toku poplave;
  - b) ako bi nastala nestašica vode ili teškoće u snabdijevanju vodom;
  - c) ako postoji opasnost od zagađivanja vode ili je nastupilo zagađenje u obimu u kojem to predstavlja neposrednu opasnost za život i zdravlje ljudi ili u većem obimu za životinjski ili biljni svijet;
  - d) ako postoji neposredna opasnost za zagađenje izvora vode namijenjenog snabdijevanju vodom za piće;
  - e) ako postoji neposredna opasnost za zagađenje površinskih i podzemnih voda;
  - f) ako postoji neposredna opasnost od nastanka odrona zemlje, ulegnuća ili drugih vidova erozije;
  - g) za osiguranje provođenja opšteg korištenja i nesmetanog funkcionisanja javnih službi prema ovom zakonu, ako se vlasnik ili drugi korisnik vodnog ili

- priobalnog zemljišta suprotstavlja prelasku preko svoje zemlje ili obavljanju radova povezanih sa provođenjem poslova od opšteg interesa u skladu sa ovim zakonom;
- h) za osiguranje izvođenja radova povezanih sa istraživanjem voda u skladu sa odredbama ovog zakona;
  - i) u drugim slučajevima, određenim ovim zakonom i drugim propisima.
- (2) U slučajevima iz stava (1) tačke c), d) i e) ovog člana, vodoprivredni inspektor u saradnji sa inspektorom za zaštitu životne sredine može donijeti usmeno rješenje i odmah narediti njegovo izvršenje, u skladu sa Zakonom o inspekcijama.
  - (3) Postojanje prirodnih događaja iz stava (1) tačke c) i e), utvrđuje nadležni organ, u skladu sa propisima iz oblasti zaštite od prirodnih i drugih nepogoda.
  - (4) U slučaju da se lice koje je odgovorno za neželjene posljedice iz stava (3) ovog člana ne može identifikovati ili ako to lice ne postupi odmah po nalogu vodoprivrednog inspektora, vodoprivredni inspektor preduzima neophodne mjere da se eliminišu ili ublaže posljedice.
  - (5) Troškove nastale sprovođenjem mjera iz stava (4) ovog člana snosi Odjeljenje na teret odgovornog lica.

#### **Član 198.** **(Akcidenti)**

U slučajevima pojave akcidentnih situacija, odmah po saznanju za njihovo nastupanje, vodoprivredni inspektor je dužan preduzeti radnje i mjere koje su predviđene ovim zakonom.

#### **Član 199.** **(Saradnja inspekcija)**

- (1) Vodoprivredni inspektor može saradivati sa inspekcijom iz okruženja, i razmjenjivati informacije o pojavama, problemima i načinu rješavanja pojedinih slučajeva.
- (2) Nadležni inspektori iz entiteta, odnosno vodoprivredni inspektor Distrikta imaju pravo zajednički izvršiti inspeksijski pregled u slijedećim slučajevima:
  - a) ako je došlo do iznadanne opasnosti zagađenja na vodama i vodnom dobru, a čije su posljedice evidentne na teritoriji entiteta i Distrikta,
  - b) kod objekata koji imaju režim rada takav da su uticaji evidentni na teritoriji entiteta i Distrikta,
  - c) kod aktivnosti čiji uticaj je evidentan na teritoriji entiteta i Distrikta i
  - d) u drugim slučajevima kada se o tome postigne dogovor.
- (3) U slučaju zajedničkog inspeksijskog pregleda iz stava (2) ovog člana na teritoriji Distrikta, inspeksijski zapisnik i preduzimanje odgovarajućih mjera vrši se samostalno i u skladu sa odredbama ovog zakona.

- (4) U slučaju iz stava (3) ovog člana, vodoprivredni inspektor dostavlja kopiju zapisnika, odnosno drugih pisanih dokumenata nadležnoj inspekciji entiteta.
- (5) U slučaju zajedničkog inspekcijskog pregleda iz stava (1) ovog člana na teritoriji entiteta, vodoprivredni inspektor sačinjava službenu zabilješku i dostavlja je Odjeljenju.

**Član 200.**  
**(Pokretanje prekršajnog ili krivičnog postupka)**

- (1) Ako vodoprivredni inspektor osnovano posumnja da je povredom propisa učinjen prekršaj ili krivično djelo, uz rješenje za čije je donošenje nadležan, obavezan je bez odlaganja, a najkasnije u roku od 15 dana od dana završetka inspekcijskog nadzora, pokrenuti prekršajni postupak, odnosno dostaviti izvještaj o učinjenom krivičnom djelu.
- (2) Vodoprivredni inspektor je dužan obavijestiti šefa Odjeljenja o pokrenutom prekršajnom postupku, odnosno izvještaju iz stava (1) ovog člana.
- (3) Nadležni organ dužan je obavijestiti šefa Odjeljenja o okončanju prekršajnog i krivičnog postupka iz stava (1) ovog člana.

**POGLAVLJE XVII. KAZNENE ODREDBE**

**Član 201.**  
**(Novčane kazne za pravna lica)**

- (1) Novčanom kaznom od 500,00 KM do 15.000,00 KM kazniće se za prekršaj pravno lice ako:
  - a) postupa suprotno odredbama iz člana 20. ovog zakona;
  - b) izvrši prodaju vodnog zemljišta suprotno članu 24. ovog zakona;
  - c) vodni objekat ne koristi, održava, odnosno čuva u skladu sa odredbama iz člana 38. stav (6) ovog zakona;
  - d) koristi vodu u suprotnosti sa članom 61. ovog zakona;
  - e) prilikom istražnih, geoloških, rudarskih i drugih radova naiđe na podzemnu vodu i o tome ne obavijesti nadležni organ (član 65. stav (1));
  - f) ne postupi u skladu sa privremenim ograničenjem iz član 67. ovog zakona;
  - g) koristi vodu za piće u druge svrhe suprotno članu 69. ovog zakona;
  - h) ne izvrši mjerenja količine i kvaliteta vode na vodozahvatu (član 71. stavovi (1) i (2));
  - i) ne dostavi podatke o mjerenjima količine i kvaliteta vode Odjeljenju (član 71., stav (3));
  - j) postupi suprotno uslovima održavanja, odnosno korištenja zona sanitarne zaštite u skladu sa propisom iz člana 74. stav (6);
  - k) koristi vodne snage za proizvodnju električne energije ili za pogon suprotno članu 77. ovog zakona;

- l) koristi vode za plovību u suprotnosti sa članom 78. ovog zakona;
  - m) koristi vodu za uzgoj ribe i drugih akvatičnih organizama suprotno članu 79. ovog zakona;
  - n) vrši dislociranje ili vađenje materijala iz vodotoka i vodi evidenciju suprotno članu 81. ovog člana;
  - o) ne sudjeluje u odbrani od poplava u skladu sa članom 97. ovog zakona;
  - p) ne poduzme mjere i radove u skladu sa članom 99. ovog zakona;
  - q) postupi suprotno članu 98. ovog člana;
  - r) postupi suprotno članu 100. ovog člana;
  - s) ne izvrši sanaciju posljedica štetnog djelovanja voda u skladu sa članom 102. stavovi (3) i (5) ovog zakona;
  - t) vrši radove i radnje suprotno odredbama iz člana 111. ovog zakona;
  - u) postupi suprotno odredbama člana 113. ovog zakona;
  - v) postupi suprotno odredbama člana 114. ovog zakona;
  - w) postupi suprotno odredbama člana 115. ovog zakona;
  - x) postupi suprotno odredbama člana 116. ovog zakona;
  - y) ne obavjesti nadležni organ u skladu sa članom 119. ovog zakona;
  - z) ne preduzme mjere za sprečavanje ili ublažavanje uticaja prouzrokovanih iznenadnom opasnosti i o tome pravovremeno ne obavijesti nadležne organe (član 120. stav (1));
  - aa) primjeti iznenadnu opasnost iz stava (1) član 120. ovog zakona, a tome ne obavjesti nadležne organe (član 120. stav (2));
  - bb) ne vrši praćenje stanja voda i izvještavanje u skladu sa odredbama iz člana 124. ovog zakona;
  - cc) vrši radnje suprotno odredbama iz člana 126. stavovi (1) i (2) ovog zakona;
  - dd) vrši aktivnosti iz člana 131. ovog zakona bez pribavljenog vodnog akta;
  - ee) vrši radnje ili aktivnosti suprotno izdatom vodnom aktu, odnosno ugovoru o koncesiji;
  - ff) ne dostavi podatke u skladu sa članom 163. stav (6) ovog zakona;
  - gg) vrši radove i radnje suprotno odredbama iz člana 172. ovog zakona;
  - hh) ne postupi u skladu sa odredbama iz člana 174. ovog zakona;
  - ii) ne preduzme radnje u skladu sa članom 175. ovog zakona;
  - jj) ne postupi po rješenju vodoprivrednog inspektora.
- (2) Za prekršaj iz stava (1) ovog člana kazni će se kažnjeno odgovorno lice u pravnom licu novčanom kaznom u iznosu od 50,00 KM do 3.000,00 KM.

### **Član 202.** **(Novčane kazne za fizička lica)**

Novčanom kaznom u iznosu od 20,00 KM do 1.500,00 KM kazniće se za prekršaj fizičko pravno lice ako:

- a) postupa suprotno odredbama iz člana 20. ovog zakona;
- b) izvrši prodaju vodnog zemljišta suprotno članu 24. ovog zakona;
- c) vodni objekat ne koristi, održava, odnosno čuva u skladu sa odredbama iz člana 38. stav (6) ovog zakona;
- d) koristi vodu u suprotnosti sa članom 61. ovog zakona;
- e) ne postupi u skladu sa privremenim ograničenjem iz član 67. ovog zakona;
- f) koristi vodu za piće u druge svrhe suprotno članu 69. ovog zakona;



- g) postupi suprotno uslovima održavanja, odnosno korištenja zona sanitarne zaštite u skladu sa propisom iz člana 74. stav (6);
- h) koristi vodne snage za proizvodnju električne energije ili za pogon suprotno članu 77. ovog zakona;
- i) koristi vodu za uzgoj ribe i drugih akvatičnih organizama suprotno članu 79. ovog zakona;
- j) ne sudjeluje u odbrani od poplava u skladu sa članom 97. ovog zakona;
- k) ne poduzme mjere i radove u skladu sa članom 99. ovog zakona;
- l) postupi suprotno članu 100. ovog člana;
- m) ne izvrši sanaciju posljedica štetnog djelovanja voda u skladu sa članom 102. stavovi (3) i (5) ovog zakona;
- n) vrši radove i radnje suprotno odredbama iz člana 111. ovog zakona;
- o) postupi suprotno odredbama člana 113. ovog zakona;
- p) postupi suprotno odredbama člana 114. ovog zakona;
- q) postupi suprotno odredbama člana 115. ovog zakona;
- r) postupi suprotno odredbama člana 116. ovog zakona;
- s) ne obavjesti nadležni organ u skladu sa članom 119. ovog zakona;
- t) ne preduzme mjere za sprečavanje ili ublažavanje uticaja prouzrokovanih iznenadnom opasnosti i o tome pravovremeno ne obavijesti nadležne organe (član 120. stav (1));
- u) primjeti iznenadnu opasnost iz stava (1) član 120. ovog zakona, a tome ne obavjesti nadležne organe (član 120. stav (2));
- v) vrši radnje suprotno odredbama iz člana 126. stavovi (1) i (2) ovog zakona;
- w) vrši aktivnosti iz člana 131. ovog zakona bez pribavljenog vodnog akta;
- x) vrši radnje ili aktivnosti suprotno izdatom vodnom aktu, odnosno ugovoru o koncesiji;
- y) vrši radove i radnje suprotno odredbama iz člana 172. ovog zakona;
- z) ne postupi u skladu sa odredbama iz člana 174. ovog zakona;
- aa) ne preduzme radnje u skladu sa članom 175. ovog zakona;
- bb) ne postupi po rješenju vodoprivrednog inspektora.

## **DIO TREĆI – PRELAZNE I ZAVRŠNE ODREDBE**

### **Član 203. (Podzakonski akti)**

- (1) U roku od tri godine od dana stupanja na snagu ovog zakona će se usvojiti strategija iz člana 45. ovog zakona.
- (2) Vlada je dužna, u roku od 12 mjeseci od dana usvajanja strategije, donijeti plan upravljanja vodama.
- (3) Vlada je dužna, u roku od 12 mjeseci od dana stupanja na snagu ovog zakona, donijeti:
  - a) opšti plan odbrane od poplava i
  - b) plan zaštite voda od zagađivanja.

- (4) Podzakonski akti koji se donose na osnovu ovog zakona donijeće se najkasnije u roku od dvije godine od dana stupanja na snagu ovog zakona, ukoliko ovim zakonom nije drugačije propisano.

**Član 204.**  
**(Reorganizacija Odjeljenja)**

(1) Šef Odjeljenja, je dužan da predloži reorganizaciju i ojača kapacitete u Odjeljenju, sve u cilju implementacije ovog zakona.

(2) Šef Odjeljenja je dužan da u roku od šest mjeseci od dana stupanja na snagu ovog zakona predloži novi organizacioni plan Odjeljenja.

**Član 205.**  
**(Uspostavljanje Savjeta za vode)**

Vlada imenuje članove Savjeta za vode iz člana 177. ovog zakona u roku od godinu dana od dana stupanja na snagu ovog zakona.

**Član 206.**  
**(Javno preduzeće « Luka Brčko » d.o.o. Brčko distrikt BiH)**

Javno preduzeće « Luka Brčko » d.o.o. Brčko distrikt BiH uređuje vodotok rijeke Save na području definisanim posebnim propisima, a u skladu sa ovim i drugim zakonima.

**Član 207.**  
**(Postupci koji nisu okončani)**

Postupci koji do dana stupanja na snagu ovog zakona nisu pravosnažno okončani, završavaju se u skladu sa odredbama zakona koji su bili na snazi do stupanja na snagu ovog zakona.

**Član 208.**  
**(Postojeći objekti i aktivnosti za koje nije izdat vodni akt)**

- (1) Nadležni organ, operator ili drugo pravo lice, koje upravlja objektom koji je izgrađen ili aktivnostima koje su započete prije stupanja na snagu ovog zakona, bez odgovarajućeg vodnog akta, dužni su da, u roku od šest mjeseci od dana stupanja na snagu ovog zakona, podnesu zahtjev za izdavanje vodnog akta.
- (2) Pravna i fizička lica koja koriste vode ili ispuštaju otpadne vode ili druge opasne materije u vode ili vodno i drugo zemljište, dužna su da podnesu zahtjev za izdavanje novog vodnog akta, u roku od godinu dana od dana stupanja na snagu ovog zakona.
- (3) Izuzetak od primjene stavova (1) i (2) ovog člana ima javno preduzeće nadležno za vodovodni i kanalizacioni sistem u Distriktu, koje je dužno podnijeti zahtjeve iz

stavova (1) i (2) ovog člana u roku od pet godina od dana stupanja na snagu ovog zakona.

- (4) Član 132. stav (2) ovog zakona se ne primjenjuje na javno preduzeće iz stava (3) ovog člana do isteka roka iz stava (3) ovog člana.

**Član 209.**  
**(Primjena podzakonskih akata)**

Do donošenja podzakonskih akata propisanih ovim zakonom primjenjuju se podzakonski akti koji su na teritoriji Distrikta bili na snazi do stupanja ovog zakona na snagu, ukoliko nisu u suprotnosti s odredbama ovog zakona.

**Član 210.**  
**(Prestanak važenja propisa)**

Stupanjem na snagu ovog zakona prestaje se primjenjivati Zakon o vodama ("Službeni glasnik Republike Srpske", broj:10/98).

**Član 211.**  
**(Stavljanje van snage)**

Stupanjem na snagu ovog zakona stavlja se van snage Zakon o zaštiti voda ("Službeni glasnik Brčko distrikta Bosne i Hercegovine", broj: 24/05, 1/05 i 19/07).

**Član 212.**  
**(Stupanje na snagu)**

Ovaj zakon stupa na snagu osmog dana od dana objavljivanja u "Službenom glasniku Brčko distrikta Bosne i Hercegovine".

**PREDSJEDNIK SKUPŠTINE**

---